

Huanopa Jesocristo tahimari dsodo inajaro

Juan

Huanopa aba cocorode tojaporaha Jeso pohuadsa huahua nadsapa pocca dodosse tojajari. Puhuapa Carireacca madija. Pocca abipa Sebedeo. Ajajari Huanopa Huano Baotista jarahi.

Huanopa Jeso tahimari dsodo inajaro, madija Jesodsa: –Pajissa, Jesopa Dio Bedi –quinahijine. Pocca dsodonijipi: Jesopa Dio Atti, pohua naco Dio, najaro. Jesopa pina edede cacahuadessa najari, pina jahuissa najari Diodsa bacco inanijine. Jesopa Dio Corime iadsa dosse inaronahitohui huati tajari dsodo inajaro.

Ajajari Huanopa dsotode Jesodsa jehe quinajaridenidsa ima teppe 3 nehe dsodo inajaro. Najaropi Huanocca ima teppe tahidecca (1 Huano), dsotodecca (2 Huano), dsotodemanicca (3 Huano) inajaro.

Dsotode jadahi tocajadsa naco Dio Corimejine pohuadsa ahuato inana-jarocca ima dsodo inajaro. Najaropi Apocalipsis.

Jesopa Dio Attiraha madija tojajari

1 ¹Jesopa ajijaro nami nahato-jera-ccadsama nadsama madipojari. Puhuapa Dio Atti. Puhuapa nadsama Diodsa madipojari. Pohua naco Dio. ²Nami nahato-jeraccadsama Jesopa Diodsa madiridsapojari. ³Nadsama aji huapima tojaridsajaropi Jesona inonaridsajaro. Jeso nohuera-dsapa nassa aja namicca huapima tojaridsa-jaranaja. ⁴Nadsama Jeso pohuapa camittehe jinede. Najari-cca camittehena madijadsa ssiajani tojaridsajaro. ⁵Najaro ssiajanina dsidsinihuaji jororo canadsa tossiaja-baqquijaro. Nadsama dsidsinipi Jeso ssiejene inadidsinijinepi ssamo tani.

⁶⁻⁷Maqquideje onipa *Huano. Puhuadsa: Baotista, quiquinana-jari. (Ettidsapi: Totopade, inajaro.) Puhuana Dio icadossedsa: –Jesona ssiajani jinede –naridsahijine. Nama naridsadsa ssiajani jinede Jesodsa pajissa quinahijine. ⁸Huanopa ssiajani jinede jarahi. Puhuapa ssiajani jinedecca ima cacomerade madijari. ⁹Ssiajani pajissapi aji namihuaji bacco naronajaro. Najaro ssiajanina madija huapimadsa tojaridsajaro. ¹⁰Ssiajani jinede aja namidsa ccaronadsa madijaripaja. Aja huapima cajiridsajaripa pohuana inahatoridsajari. Naraha madijapa pohuadsa noccodeni jidsaqquri najari. ¹¹Pocca madijadsa bacco

naraha pohuadsa jiperaquiri najari. ¹²Naraha madija Jeso-dsa pajissa nadsa: – Jeso ohuadsa tojana – nadsapa najaridsana Dio huati huati tajari: – Occa ejedeni tijajaro bica tani – nanaja najari. ¹³Madija Diocca ejedeni toque-jenahijinecca imapi pina madija tossonajaricca imassa nejerani. Pina maququideje amoneje tohuini nadsa inajadsa ejedeni dsati tossonajaricca imassa nejerani. Naraha Diojine pocca ejedeni toquejenajaripa Dio Pohuajinena bodideni dsati totoja najaro.

¹⁴Dio Attiraha assire tojadsapa Jeso iadsa madijaripaja. Pocca nahatonijipi bicabote deni tojani qqui inade. Nadsama pocca nahatohuepi ojariana nahato tajari. Abi Dio Bedina ojarihi. Pihuapa huati huana tadsa ia todinibaquijari. Pihuapa pajissehe jinede.

¹⁵Nadsama aja Huanopa Jeso tahimari ecomeraridsajaropi: – Najari tahimaria huati onapjarode: Ohua mari mari onaporaha aja dsotode mari mari najarina deni tojajari. Pihuapa nadsama madipojari, ohonanapode –nade Huano atti.

¹⁶Nadsama pocca biquehepi pohuajine iadsa huapi tehe tojeje dsanaponi najaro. ¹⁷Nadsama maittaccadsama *Moisesipa Diocca dosseniji mari mari napojari. Najaro pocca marinaja huarijonania aji iadsa bacco najaropaji. Nadsama jidapapa Jesocristona Diocca tohuati huanehe, pocca pajissehe iadsa ahuato inanajaropaji. ¹⁸Nadsama madija iapi Dio qqui inaja camajarahi. Pohua Bedi ohoharidejinena Abi Diodsa nahatoquiri inajaro. Pihuapa Dio bonoccoricajaja najari.

Huano Baotista Jeso tahimari ecomerapojaro

¹⁹Nadsapa odsa panani Jerosarecca jodiodenicca taminedeni attipa: – ¿Huanopa aja tohui imadijaro ia Idinide Cristo-Mesiaco? – quinadsa *Diodsa dada toqquimade, pohuadeni biji accode *rehuitadeni tedseje huahua inabaquimanajari. Nadsapa pohuadenidsa: – Huano madihihuaji jai tijaji, pohuadsa huati tiquinadsa: “Tiapi ¿nejecojari tijani?” tiquinana – quinadsa dosse inabaquimanajari.

²⁰Nadsapa jai toja, bacco toquina-dsapa poccadeni tamine attideni Huanodsas huati iquimamanajaro. Naraha Huano pohua cacoma-jarajari. Amadsati pohua cacomerade: – Ohuapi Cristo ojajerani –nade.

²¹Naraha pohuadsa huati toquina-pomade: – Nadsapi ¿nejecojari tijani? ¿Maittaccadsamacca *Dio Atti cacomerabote Eria tijaqui? –quinade. Naraha Huanopa: – Ohuapi Eria ojajerani –nade.

Nadsapa: –¿Moisesicca dsodonijsa aja Dio Atti cacomerabote dsotode ccajonahitohui quiquinanajari tijaqui? –quinade. Naraha Huanopa: – Ohuapi najari ojajerani –nade.

²²Naraha denima Huanodsas huati toquinapomade: – Nadsapi ¿nejecojari tijani? –quinapomade. –Jari, iadsa ticca ima tecomeraji. Tetti imittadsapi ia dosse najonadedenidsa huati inaninijine –quinade Huanodsas.

²³Naraha Huanopa pohua cacomerade: – Ohuapi dsama huamoni ssono caji, siba caji tanihuaji ohuatti mohui tadsa madija huahua huahua ohonajonabaquiji najari.

“¡Ia Medsede tedsejema jahui tijjenedeni tobicapoji! Najaroa aji tibodideni pohuatohui tinajoramanaji” ohonana-jaro. Najaro imapi maittaccadsama Dio Atti cacomerabote Isahia huati tapojari –nade Huano atti.

²⁴Aja Huanodsa huati toquinajari-deni dosse najonadedenipa Isaraeri potemahi jodiodeni mota *marinaja onini pariseodsa jehe quinajari. Nadsapa poccadeni dodosse tabaqqui Huanodsa huati toquinapomajari.

²⁵Pohuadeni attipa: –Tettiipi: “Cristo ojajerani. Eria ojajerani. Dio Atti cacomeraqqiri najarideni ojaría ojajerani” tadsapi ¿nejecotohui passodsa madija topa topa titidsana-baqqui najaritta? –quinade.

²⁶Naraha Huano pohua cacomerade: –Ohuapi passodsara topa topa ohodsanabaqqui najari.

Naraha madija ohuaha tiadenidsa madiraha pohuadsa tinoccodeni jidsaqqiri naccani. ²⁷Najarina deni tojajari. Ohuapi tahide mari mari onaporaha pohuapa dsotode mari mari najonahitohui. Ohuapi ajimani ojani. Pina pocca medsesta onanijinepi opajira-jerani. Pohua amoricca sadaria diccade naqui opajira-jerani –nade Huano atti.

²⁸Ajjaro imapi odsa capamema najaro onini Betaniadsa qqí inapode. Betaniapi hueni Jordao maji ccajonahihuaji anijaro. Nahihuaji Huano Baotista madija topade tojadsana pohuadsa huatide jahijonajari.

**Jesopa Diocca daniji pina
Edede bedissa najari**

²⁹Nani Betaniadsa imadicca-dsapi najaro huada ssiajadsa Huano



Jeso ccajonahi qqui tadsa iadsa huati tajaride: –¡Qqui tiquinajo! ¡Ajararipa Diocca daniji madija huapimadsa! Puhuapa *Diocca Edede Bedi bicabote Diodsa da da inajarissa najari. Nidsa dsoqqeedsapa pohuana madija huapimacca imasiri inanamossinitohui –nade. ³⁰ –Nadsa pohua tahimaripi tiadenidsa huati huati onapode: Ohuapi tahide mari mari onaporaaha aja madija dsotode mari mari najonararina deni tojajari. Ohuapi ajimani ojani. Puhuapa nadsama tahide madipojari, ohonanade. ³¹ Ohuapi pohuadsa ssamo onade. Naraha *Isaraeri potemahideni tiadenipi pohuadsa nahatoqquri tiquinanijinepi Dio ohua cadossedsa madija passodsas topa topa onajaro-paji –nade Huano.

³² Huanopa tahide Jeso topa idsanadsa *Dio Corime Jesodsas ccaronahi qqui tadsa iadsa huati tajaride: –Ohuapi Dio Corime qqui onade. Pina midsorissa naha ccaronadsa Jesodsas be tahi qqui onade. ³³ Ohuapi pohuadsa nahato onapo-gerade. Naraha passodsas topa odsanabaqquihijinepa Dio ohua cadossedsa ohuadsa huati tapojaride: “Ocorime ccaronadsa madijadsas be tahi qqui tinahitohui. Najarina Ocorime madijadsas inanaridsahitohui” napode Dio ohuadsa. ³⁴ Jehe, najaripa pajissa ohua qqui onadsa huati onajaro: Ajararipa Dio Bedi, onajaro –nade Huano atti.

**Jesocca mamari
tabaqqui tahidecca**

³⁵ Huada ssiajadsa Huano Baotista pohua huatimade pamaha tedseje domo hua pomade. ³⁶ Nahidsana

Jeso toqqeequimahi Huano qqui tadsa pohuadenidsa huati tajaride: –¡Qqui tiquinajo! ¡Ajararipa Diocca daniji madija huapimadsa! Puhuapa *Diocca Edede Bedi Diodsa da da inajarissa naraha icca imasiri manaconi tojahijine Dio iadsa eccorajari –nade Huano iadsa.

³⁷ Nadsapa Huano huatimade pamaha ima mittamanadsapa Jesodsas tohuedamissade. ³⁸ Jeso natti tohuedamissaraha Jeso pohua natti qqui naninaja pohuadeni huedajonahi qqui inabaqquijaride. Nadsapa Jeso pohuadenidsa huati tade: –¿Nejecotohui ticadajonajaro? –nade. Naraha: –Ia Maride ¿nejecohuaji timadijaro? –quinade. ³⁹ Naraha Jeso: –Jina, qqui tiquinaji –nade pohuadenidsa. Nadsapa jai tojajari. Maji toccadsana pohua madihihuaji bacco toquinadsapa qqui toquinade. Nahi pohuadsa jassi todsadsapas dsomejarode.

⁴⁰ Jehe, Huano huati tahi mittamanadsapa Jesodsas toquejenajaride. Ojariapa Ssino-Pedro imecote Adiri. ⁴¹ Nadsapa Adiri Jesocca odsahuaji qqenadsapa pohua imecote Ssinotohui toccajaride. Pohua imecote Ssinohuaji bacco tadsapa huati tajari: –¡Ssino, iapa aja tohui imadijaro Mesia bacco inahi! –najari. (Jodio attidenidsapa: Mesia, quinaraha dsama *Cresiacca madija attidenidsapa: Cristo, quinaraja. Madija ettidsapa: Madija Tonassijade tojahijine Dio pohua icattejidsapojari, inajaro.)

⁴² Nadsapa Adiri pohua imecote Jesohuaji eccanijari. Jeso Ssino qqui tadsapa pohuadsa huati tade: –Tiapi *Huanocca ejedeni Ssino tijani. Ssino tijaraha jidapapi tia

oni onihira hua onana –najari.
Nadsapa pohua oni hua inadsapa:
–Sepa –nade. (Jodio attideni-
dsapa: Sepa, quinaraha dsama
Cresiacca madija attidenidsapa:
Pedro, quinajari. Madija ettidsapa:
Siba, inajaro.)

**Natanahe Feripe tedseje Jeso
huatimade toquejenajari**

⁴³Huada ssiajapa Jeso: –Dsama
arobeni onini Carireahuaji occana
onajaroa –nade. Nahihuaji tocca-
dsana Jeso Feripe bacco inadsa
pohuadsa huati tajari: –Jina,
ohuadsa ticcaridsaji, ohuatimade
tijadsapi tia onahattanijine –nade.

⁴⁴Nadsama Feripepa Besaida
odsa pananicca. Pedro, Adiri naco
najaro odsa pananicca. ⁴⁵Feripepa
pohua tesse Natanahetohui tocca-
jari. Bacco inadsa pohuadsa huati
tajari: –Iapi Moisesicca dsodoniji-
dsa tahimari ihimitta najari bacco
inahi –najari. –Dio Atti cacomera-
qquiri najarideni pohua tahimari
dsodo quinajari. Pohua onipa Jeso,
Dsodsecca ejedeni. Pohuapa odsa
panani Nasaretihuajicca –najari
Feripe. ⁴⁶Naraha Natanahe attipa:
–A ¿Nasaretihuajicca madijapa bica
tajari caji taco? –najari. Nadsapa
Feripe Natanahedsa: –Jina, nidsa
qqui tinahitohui –nade.


⁴⁷Nadsapa Natanahe Jesohuaji
toccadsapa Jeso Natanahe cca-
jonahi qqui ijidsadsapa pocca ima
naqui pohuadsa ahuato tajaro.
Nadsapa Jeso Natanahe tahi-
mari huati tade: –Qqui, aja
maqquideje ccajonajaripa pajissa
Isaraeri potemahi. Icca idideni-
cca marinaja ecahuanissa tajaro.
Pohuapa maidsera tahi –nade

Jeso. ⁴⁸Naraha Natanahe atti Jeso-
dsa: –¿Nejecoma nadsa ohua qqui
tinadsa ohuadsa nahato tinajaro?
–nade. Naraha Jeso Natanahe-
dsa huati tade: –Nadsa Feripe
tiadsa huati tajaraccadsa ahua
iquiera dopedsa teni tia qqui onapa
–nade Jeso. ⁴⁹Naraha Natanahepa:
–Ia Maride, ¡tiapi Dio Bedi tijani!
¡Tiapi Isaraeri potemahidenicca
tamine tijani! –nade. ⁵⁰Naraha
manaco Jeso pohuadsa huati tade:
–¿Iquiera dopedsa teni tia qqui
onapa onajarodsa ohuadsa pajissa
taqui? –nade. –Nidsa, nahatonaja
deni tojanicca huapi tani qqui tina-
nitohui –nade Jeso Natanahedsa.

⁵¹Nadsama Jesopa ima denima
huati huati tade iadsa: –Pajissara
tiadenidsa huati onajaro: Nidsa
meme tohuabani naqui qqui
tiquinanitohui. Aji ohua Madija
Bedi ojajaro ohuadsa Diocca
dodosse tabaqqi memehuajicca
jahirona jai tojamacossani, jahirona
jai tojamacossani nahi naco qqui
tiquinanitohui –nade Jeso.

Jeso canahatori canapojari

2 ¹Huada 3 bacco tadsapi Cana-
huaji cajicajicca ejete tojajaro.
Canapi dsama arobeni onini
Carireacca odsa panani. Jesocca
ami naqui nani ejete qquide tocca-
jaro. ²Jeso pohua huatimadedeni
ia naqui nanidsa jajjedsimade.
Cajicajicca ejete jinede iadsa jina
nadsa jajjedsimajarode. ³Naraha
uva ppejene jicadsa Jesocca amipi:
–Uva ppejene jicaha –nade Jeso-
dsa. ⁴Nadsapa Jeso atti: –Ami
¿nejecotohui ohuadsa huati tina-
jaro? Occa ima ahuato onananijine
bacco tejeraccaraha –nade Jeso.



⁵Naraha imenipi jijipa dsodsojode-denidsa huati tade: –Jeso tiadenidsa huati tadsapa pohua attissa tinanamanaji –nade.

⁶Naraha nanidsapi siba imeni passojine ccohue todsaridsani 6 nehe cajimanajaride. Najarodsapa jodiodeni –Icca ima bica tanijine –quinadsa pohuadeni dsepetaji ettippamana, idimoramana nanaja najari. Najaro siba imeni ccohue todsani ojariedsapi passo 80 litro ijijaro nitide. ⁷Nadsapa Jeso jijipa dsodsojodedenidsa huati tade: –Siba ccohue todsaridsanidsa passo tinajiridsamanaji –nade. Nadsapi najarodsapa passo inajiridsamanadsapi iponihuaaji bacco bacco teri nade. Nadsapa Jeso canahatori canajarijine passoraha uva ppejene inanajari. ⁸Nadsapa Jeso: –Jari, jidapapa badsira taha huana ticadsanamanadsa cajicajicca ejete cacahuadedsa dsojo ticanamanajo, ecatamahijine –nade. Nadsapa uva ppejene huana icadsanamanadsa

dsojo icanamanade, pina Jeso attissa inanamanajaro. ⁹Nadsapa ejete cacahuadedsa da icanamanadsapa aja passoraha uva ppejene tojajari badsira taha ecatama nade. Naraha ejete cacahuadepa ssamo tadsa pohua bodi: –¿Nejecohuajicca uva ppejene? –najari. Naraha uva ppejene dsodsojode pohuadenina passo ponira dsojo dsojo inanimanajarojine nahatoqqiri nahi. Nadsapa ejete cacahuade aja cacajirebote najaridsa huati tade: ¹⁰ –Madija huapimapa ejete inahatomansapi tahide uva ppejene bica tahiccara da da ihicanaridsa-baqquimana nanaja najari. Madija accaramanadsana ajamani majidera tahicca da da ihicanaridsa-baqquimana najari –nade. –Naraha tiapi uva ppejene denima bica tahiccara teccocco-baqqi, dsotodena da ticanabaqqujarirana –nade ejete cacahuade atti.

¹¹Ajjijaro imapi Carireahuajicca odsa panani Canadsa Jeso tahidecca canahatori canapojari.

Najaropi Jeso pocca deni tojehe ahuato inanapojaro. Nadsapi pohua huatimadedeni iapi Jesodsa pajissa inajarode.

Capernaodsa madijari

¹²Nadsapi coridsa inidicca odsa panani Capernaohuaji jajedsippade. Jeso pohua, pocca ami, pohua imecotedeni, pohua huatimadedeni ia huapima jajedsippade. Nanidsapi huada pamehe imadide.

Diodsa dada toqqimacca odsadsa manaconitohui dadadedeni mohua ininebaquijari

¹³Jodiodenicca ejete imeni onini Pascoa tohuajiradsapi Jesopa *Jerosarehuaji toccade. ¹⁴Naraha nani Jerosarehuajicca *Diodsa dada toqqimadsapi manaconitohui dadadedeni dade toquejenahi Jeso qqui inabaquijari. Bohui, edede, midsori da da quiquinajari. Dsiniro cacajiquimera-manahijine naco dade huihuittariri naridsajari. ¹⁵Nama quinahi Jeso qqui tadsapa cocossi amadsati inahatojaride. Ijinedeni poponeri najari inaccaridsadsa inahapicossa, ppiro-ro nadsa itacossiridsajaride. Nadsapa Diodsa dada toqqimahuajicca dadadedenipa amossinihuaji mohua ininebaquide. Poccadeni ededema, poccadeni bohuima domo toqquenajaride. Dsiniro cacajiquimera-manahijine dsiniro naqui maca maca imeri naridsade. Huahuanari naqui cco cco icanacosseri naridsade. ¹⁶Midsori dadadedeni naco dosse ininebaquide: –¡Ajicca huapihuajina ticcadeni midsori dsojo dsojo tininemanaji!

¡Aji occa Abi tadsaridsapi dada tinanamana tejeraji! –nade Jeso. ¹⁷Nadsapi pohua huatimadedeni iapi eti huatomajarode: –Dio Atti dsodo napojaropi: “Ticca odsa acconipi ohuana ocasserani ohuanitohui” nanaja napode –inade. ¹⁸Naraha dsotodepa jodiodeni Jeso huati icanamanade: –¿Nejecojari tia cadossedsa nema nema tajaro? ¡Jari, ticanahatori canaji! Qqui inadsana pajissa inanijine –quinade.

¹⁹Naraha pohuadenidsa Jeso huati tade: –Jari, ajijaro Diocca odsa ticanajidsomanehi cajicaneje huada 3’pi ocanahatomanie cajicanitohui –nade. ²⁰Naraha jodiodeni Jesodsa huati toquinapomade: –¡A, apaja! Ajijaro odsa Diodsa dada toqqimapi huada huajano 46 naha dsepedeni ijimanade. Naraha tetti: “Ajijaro odsa huada 3’pi ocanahatomanie cajicanitohui” taha. ¡Nema ticanana-gerani! –quinade.

²¹Najaro odsacca ima huati tajaripa pohua assire tahimarini huati tajaride. ²²Iapi pohua huatimadedeni Jeso dsoqquedsa nahatonidsana eti huatomajaropajide. Najaropi pohua huati tadsa imittapojarode. Nadsapi *Dio Atti dsodo napojarocadsa denima jehe pajissa idsanapojarode. Jeso huati huati tajari imittapojarodsa naqui jehe pajissa inajarode.

Jesodsapi madija huapimacca ima ahuato tajaro

²³Jesopa ejete Pascoatohui Jerosaredsa madiccadsapa canahatoriri canaridsajaride. Pocca nahato-
huh qqui toquinadsapa madija

mota pohuadsa pajissa quinade.
 24-25 Naraha Jesopa pohua bodidsa nahato tajari: –Ohuadsa pajissa quinahissa tahi –najarajari. Pohuapa madija bodicca ima mitta-hijine pohuadenidsa: –¿Nejecoma nani tibodidenicca ima? –najarajari. Madija pohuadeni bodicca ima pohuadsa huatide nohueraraha pohua ehuerahi nahato tajari.

**Nicodemopa dsome
 Jesodsa ccahuajajari**

3 ¹Isaraeri potemahi jodiodeni dossede ojaría onipa Nicodemo. Pohuapa *marinaja onini pariseodsa jehe najari. ²Najaripa dsomeraha Jesodsa huati tahijine ccajonajari. Bacco najonadsapa: –Mamaride, iapi nahatoquiri inapode. Tiapi Diocca dosseniji ticcajonajaro madija maride. Nahatohue pina aji ticcassa najaropi madija Dio pohuadsa tojahissa tajarina cajijari. Pohuadsa Dio nohueradsapa caji-jarahi –nade Nicodemo. ³Naraha Jeso Nicodemodsa huati tajari: –Pajissara tiadsa huati onana: Madija *Diocca cacahuehedsa tojahijinepa tossonapomadsana Diodsa tojahitohui. Tossonapoma-jaradsapa Diocca cacahuehedsa toja-jarahitohui –nade Jeso Nicodemodsa. ⁴Naraha manaco Nicodemo huati tajari Jesodsa: –Madija jadahi ijaraha ¿nejecoma inadsa pina ejedeni inehé issenapomanijine? ¿Icca ami dsahuanidsa ittidsa-pomadsapi issenapoma taqui? –nade Nicodemo. ⁵Naraha manaco Jeso Nicodemodsa huati tajari: –Pajissara tiadsa huati onana: Madija bodidenicca imasiri tohuire-ridsadsapi madija Dio Corimecca

nahatonajadsa toquejenadsapa Diocca cacahuehedsa toquejenajari. Naraha madija nama quina-jaradsapa Diocca cacahuehedsa toquejena-jarahi. ⁶Maquideje ejedeni inahatojaripa madija tojajari. Naraha Dio Corimejine nahatojaripa Pohua Corime pohuadenidsa totoja najari. Dio Corime pohuadenidsa tojaridsadsapa pina tossona-pomajarissa quina tahi –nade. ⁷–Nadsama tiadsa huati onana. Ohuattipi: Pina ejedeni tossone-dsatisa tiquinapomaji onajarodsapi huajo tejeraji. ⁸*Dio Corimejine madija bodi dsati tojadsapi pina jojodecca imassa najaro. Jojodepi qqí inejeraraha jojode ponijinena ahahuato najaro. Jojodepi poni jipa tanihuaji tocca tani. Poni mohuini naqui imitta tani. “¿Nejecoma nanicca ccajonajaro?” taraha ssamo tinani. “¿Nejecoma nani toccajaro?” ina tani. Dio Corimejine madija bodi nahatodsati tojadsa naco qqí inajararaha pocca madie dsati tojani nahato inajaro –nade Jeso Nicodemodsa.

⁹Naraha manaco Nicodemo Jesodsa huati tapomajari: –¿Najaro imapi nejecoma najaro? –nade. ¹⁰Manaco Jeso pohua cacomerade: –Tiapi Isaraeri potemahi jodiodeni maride tijaraha ¿najaro ima ssamo tinajaroqui? ¹¹Pajissara tiadsa huati onana: Iapi Djine madija bodideni dsati toquejenahi nahatoquiri inajaro. Aji madijacca madie dsati tojani qqí inajaro naqui tiadenidsa huati huati ihinanaraha timittamana-jerajaro. ¹²Aji namicca icca madieccama tiadeni mari ocana-baqquiraha pajissa tiquinejerani. Aji memehujicca Diocca ima ponira

tiadenidsa huati onadsa naqui pajissa tiquinejerarorane –nade.

¹³ –Nadsama aja namicca madija ojariapa memehuaji toccamacossaja cama-jarahi. Naraha aji *Madija Bedi oजारona ohuapi memehuajicca occaronajaro. ¹⁴Nadsa maittara-nibote dsama huamoni ssono caji, siba caji tanihuaji icca madija jahiridsapodsapa Moisesi macca corime *bronce inahatodsa ahuadsa que inanahi quinade. Madijapa maccajine jicahitohuiraha macca corime que tanihuaji qqui quinadsapa totocassiejera najari. Nadsama aji Madija Bedi oजारoa ohua naqui ahuadsa ohua que inanamana-dsapi nema onanitohui –nade. ¹⁵ –Nadsama madija huapima ohuadsa pajissa quinajaridenipa camittehe jiquejeranicca cajimana-dsanapohuijine –nade Jeso.

Diopa madijadsa huati cahanari canajari

¹⁶ –Diopa madijadsa huati cahanari canahi. Pohua Bedi ojari naraha da inadsapa huapima pohuadsa pajissa quinajaridenipa tocassiejerahijine. Camittehe jiquejeranicca naco cajimana-dsanapohuijine. ¹⁷Diopa Pohua Bedi madija dsahuade dosse inarona-jarajari. Madija tonassiajadera dosse inaronajari –nade.

¹⁸ –Nadsama pohuadsa pajissa quinajaridenipa idsahuabaquijarahitohui. Naraha aja pohuadsa pajissa quina-jarajaridenicca imapi Dio Pohuadsa ahuato taridsaponi. Naraha Dio Attipa: “Occa ejedeni ohojaride. Pohuadsa pajissa tiquinejeradsapi ticcadeni imapi ohuadsa tabaccora tani. Nidsa ticcadeni

ima nema tidsanapomanadsapi *najidsohue jiquejeranihuaji tiquejenanitohui” nahi Dio –nade Jeso. ¹⁹ –Nadsama Dio Bedidsa pajissa quina-jarajaridenipa poccadeni tabaccorehepi ajima najaro: Ssijani aji namidsa bacco naroraha madija motapa dsidsinidsara jipaquqiri najari. Pohuadenipa ima tabaccora tanicca ihinanamana nadsapi ssiajanidsapa jiperaquqiri najaripaja. ²⁰ Madija motapa pohua pohuadeni tonatabaccora-manadsapa ssiajanidna huattajoquqiri najari. Pohuadenipa ssiajanidsa huajijira canaha najarahi, poccadeni ima huapimadsa ahuato tajaro noppineni. ²¹ Naraha madija pajissehedsa madimanadsapa ssiajanitohuira quinajari. Pina Dio-cca dossenijissa inanamanadsapi pohuadeni dsepe ijiridsajarima ahuato tanijine –nade Jeso.

Huanopa Jesocca ima ecomerapomajaro

²² Nani dsotodepi dsama arobeni Jodeahuaji Jeso toccadsapa pohua huatimadedeni iapi pohuadsa jajjade. Nanidsa imadidsana madija topa idsanabaquijaride. ²³ Naraha Huano naco odsa Enohuaji madija topa idsanabaquija najari. Najaropi odsa Sarimadsa huajira tani. Enodsana passo dsaja tanicca caji tajaro. Nahidsana madija jajahijona najari, Huanocca topanijitohui. ²⁴ Huanopa toponi cocorodsa coro idsimamana-jaraccadsama nahidsa madijari.

²⁵ Nadsapa Huano huatimadenipa jodio ojaria tedseje bodideni tohuiremanahijinecca ima ahuaji huati ahuaji huati quinajari.

²⁶Nadsapa Huano huatimadedeni jai tojanidsapa Huanodsa huati toquinade: –Ia Maride, maitta hueni Jordao jippehuaji tiadsa bacco tajari pohua tahimari huati huati titinanajaripa madija topade tojahi. Huapima pohuahuaaji jajahi toja nahi –quinade.

²⁷Naraha Huano pohuadenidsa huati tade: –Diopa madija dsepe ijihijine pohuadsa da inejeradsapi nama najarahi. Naraha Dio madija dsepe ijihijine pohuadsa da inadsapi dsepe ijie cajihí –nade. ²⁸–Nadsa ohuatti timittamanade: Ohuapi Cristo-Mesia ojajerani ohonanade. Diopa Jeso tedsejema ohua cadossepojaride. ²⁹Ohuapi pina dsabisso amoneje cajibote najari pohua tessessa onajaro. Dsabisso cacajirehijinecca ejete bacco tadsapa pohua tessenacono pohuatohui madijari. Pohua tessapa aja cacajirejari atti mittadsapa huatidse tahi. Najaroa ohua naqui Jesodsa madija toquejenadsa omittadsapi ohuatidseri najaro. ³⁰Jeso deni tojajadsanapohui nadsapa bica tani. Ohua ajimani ojanini naqui bica tani, onajaro –nade Huano.

Jesopa memehujicca ccaronajari

³¹Nadsapa Huano pohua huatimadedenidsa denima huati tajari: –Memehuaaji ccaronajaripa aja namihujicca madijassa najarahi. Puhuapa deni tojahi. Ajijaro namiccapa namicca. Ajijaro namicca imara huati huati totoquina najari. Memehuaaji ccaronajaripa huapimadsa deni tojajari. ³²Puhuapa memehuaajicca qqui tajari, mittajari naqui

ecomeraridsajaro. Naraha madija huapimapa pocca huatinajadsa pajissaha quina-jarahi. ³³Naraha pohua attidsa pajissa quinajarina: “Jehe, Diopa pajissehe jinede” quinajari. ³⁴Pohuana Dio icadossejari, huati huati nanaridsa najari. Najarina Dio Atti huati tahissa tajari. Dio Pohua Corime pohuadsa da ineje najaro inapajiranissa tajaro. ³⁵Imehipa Bedidsa huati huana tajari. Pohua Bedidsa pocca nahatonaja huapima pohuadsa inanjaro. ³⁶Nadsapa Pohua Bedidsa pajissa quinajaridenina camittehe jiquejeranicca cajimanadsanapohuijine. Naraha pohuadsa iboqquri najaridenipa camittehe cajimana-jarahitohui. Dio Pohuana najidsohue jiquejeraniccadsa inana-baqquihitohui –nahi nade Huano Baotista.

Jeso Carireahuaji tojoppemanijari

Mateo 4.12; Maraco 1.14; Roca 4.14

4 ¹Nadsapa Jesodsa madija tohuapijaricca ima tojaridsajaro. Nadsapi jodiodeni mota marinaja onini pariseodsa jehe quinajaridenidsa ima bacco tajaro: –Jesodsa toquejenajari deni tohuapihi. Huano Baotistadsa ajamani. Jesona madija denima topa topa ihidsanabaqqui najari –nanaridsamana nahi ima mittamanajari. ²(Naraha Jeso pohuapa madija topa topa ihidsanabaqqui najarahi. Pohua huatimadenina madija topa topa ihidsanabaqqui najari.) ³Nadsapa Jesodsa: –Marinaja pariseodsa jehe quinajarideni titahimari mittamanahi –quinadsapa dsama arobeni

Jodeadsa joppemajari, dsama arobeni Carireahuaji toccanipomahijine.

Samariahuajicca amoneje Jeso tedseje bacco tocanirejari

⁴Jodeadsa jaijanijaro jahuiipi dsama arobeni *Samariahuaji tossoniquimani Carirea bacco tanijaro. ⁵Najaro jahui jaijanidsapi Samariacca odsa panani oninipi Sicadsa iajirajonajaro. Najaro odsapi maittaccadsama Jacobocca dsamabote huajira tajaro. *Jacobo pohua dsamaribotepi pohua bedi Josedsa da inapojaro nade. ⁶Nanidsana –Jacobocca passojinebote –quiquinanjari hui todsajaro. Najaro passojine hui todsanidsa bacco inapojaro. Maji itetepi bacco tabote nadsa Jeso ja tojajonadsa, passojine hui todsani inorinidsa huittarjaride.

⁷⁻⁸Nahidsa Jeso huittarirahia pohua huatimadenipi odsa pananihuaji jaijajaro, itapari mittade. Naraha nahi passojine inorinidsa Jeso huittaridsa Samariacca madija amoneje passotohui ccajonajaro nade. Nadsapa Jeso ponidsa huati tajari: –Ohuadsa ticca passo dse onana –nahi nade.

⁹Jeso atti nama nadsapa ponidsa jidsa tajarossa najaro. Aja, jodiodenipa samaritanodeni dsepedenitajidsapa: –Dsede *oppina tani –quiquinanade. Nadsapi amoneje Jesodsa huati tajaro: –¿Nejecotohui tiapi jodiideni tijaraha ohuadsara passo mitta tajaro? Ohuapi Samariacca madija ojani –nani nade. ¹⁰Naraha manaco Jeso ponidsa huati tajari: –Diocca daniji nahato tinadsapi aja tiadsa

passo mitta todsajaridsa manacora ohuadsa passo mitta tidsanitohuiraha ssamo tinajaro. Naraha ohuadsa nahato tinadsa ohuadsa huati tinadsapi passo camitteheccatiadsa da onanitohuiraha –nahnade Jeso.

¹¹Naraha amoneje poni attinipi: –¿Nejecodsara passo huana ticadsananijine? Hui todsanicca passopi huaji tani. ¿Nejecohuajicca passo camittehecca ohuadsa da ticananijine? –nani nade.

¹²–Ajjjaro passojine hui todsanipi maittaccadsama Jacobo iadsa inebojaro. Ajijaro passopi Jacobo dse dse napojari. Pohua bedideni naco ajijaro passodsa dse dse quinapojari. Poccadeni bani ette tojahi naco ajijaro passodsa dse dse quinapojari. ¿Naraha tiana deni tijajaronane, Jacobona ajamanirana? –nani nade. ¹³Naraha manaco Jeso ponidsa huati tajari: –Ajijaro passopi dse inaraha ibacco dsaripoma tani –nahi nade. ¹⁴–Nadsa aji ohua passo da ocanajaro dse quinahipa baccodeni dsarimanapoma-jarahitohui. Aji occa daniji passona madija bodidenidsa jiquejeranitohui. Camittehe jiquejericca tojanijine –nahi nade Jeso.

¹⁵Naraha amoneje attinipi: –Jari aji ohuadsa huati tinajaro passo ohuadsa da ticanaji, obacco dsaripoma-jeranijine. Nani ajijaro passotohui ohocajona nejeranijine –nani nade. ¹⁶Naraha Jeso ponidsa huati tapomajari: –Ticcanidsa ticca maquidsa huati tinanidsa ahuaji ccajonana –nahi nade Jeso. ¹⁷Naraha poni attinipi: –Maquideje ocappirani –nani nade. ¹⁸Naraha Jeso ponidsa huati

tapomajari: –Jehe “Maqqi-deje ocappirani” tadsapi pajissa. Naraha ticca maqqiipa 5 quinahi. Jidapanacca naco ticca maqqi jarahi. Tetti nema nadsapi pajissa –nahi nade Jeso. ¹⁹Naneje amoneje attinipi: –Tiapi Dio Atti cacomera-bote tijani –nani nade. ²⁰–Icca abidenipa ajijaro ssonodsana Diodsa huahuatidsemanapo najari. Nadsa jodio tiadeni tettidenipi: “*Jerosaredsana Diodsa tetetidsemana nani bica tani” tiquinajaro –nani nade.

²¹Naraha manaco Jeso amonejedsa huati tajari: –Amoneje, ohuatti timittaji. Nidsa imapi cacajiquimeranitohui. Aji ssonohuaji Diodsa tetetidsemana najaropi nebonitohui. Aja Jerosarehuaji Diodsa huahuatidsemana nahihuaji naqui nebonitohui –nahi nade. ²²–Samaritano tiadenipi Diodsa tetetidsemana naraha, najaro imapi ssamoquiri tiquinani. Naraha jodiodeni iana pajissa Diodsa ehetidse najaro. Ia jodiodenidsa tossieje ccajonajarona madija

huapimadsa tojaribaquujaro. ²³Jidapapi ima dsati bacco tani. Madija pajissa Abidsa huatidsemanaha madimanajaridenipa pohuadeni bodicca pajissehema Dio Pohuadsa jehe quinadsapa huatidsemanahitohui. Abipa madija nama quinajaridenidsapa jipa tahi. ²⁴Diopa assire jarahi, corime. Nadsama madija Dio Pohuadsa huatidsemanajaripa pohuadeni corimema huatidsemanahina bica tani. Madsamana-jaradsa huatidsemanahina bica tani onajaro –nahi nade Jeso.

²⁵Naraha amoneje attinipi: –Jehe, ohuapi nahato onani: Mesia pohua oni ohuahapa Cristo quinajari. “Najari ccajonahitohui” quinahipa ohomitta nade. Nidsa pohua bacco nadsapa pocca marinaja huapima iadsa ahuato inananitohui –nani nade. ²⁶Nadsapa Jeso ponidsa huati tade: –Ohuapi Mesia tiadsa huati huati onajaro –nahi nade.

²⁷Naraha pohua huatimadedeni iapi Jeso pohua huittarihidsa bacco



inanineje Jesopa amonejedsa huati huati tahi qqui inadsapi ijabojo nade. Ibodidsa: –¿Nejecotohuira ponidsa huati huati tajari? –inade. Jeso pohuadsa naqui: –¿Nejeco imara poni tadsajani huahuatiti tinajaroneje? –inanitohuiraha huati inejerade. ²⁸Nadsapi amoneje ponicca jajari inebo, odsa pananihuaji toccanide. Odsa panani bacco tanidsapi madija huapimadsa huati tanijaro: ²⁹ –Jari, aja maqquideje nahatobote occa ima huapima ohuadsa huati huati tajari qqui tiqinajo. Pohuapa aja tohui imadijaro ia Idinide *Cristo-Mesia itidija –nani nade. ³⁰Nadsapa najaro odsa pananicca madija mota jahininedsa Jesohuaji jahijonajari.

³¹Amoneje odsa pananihuaji huati huati teje naraha iassa Jesodsa: –Ia Maride, tijipaji –inade.

³²Naraha Jesopa: –Jijipa ohuaha ocajini –nade iadsa. ³³Nadsapi iara imahaha icanadsa: –¿Madija ohuaha pohuadsa jijipa dsojo inajonajari itide? –inade. ³⁴Nadsapa Jeso iadsa huati huati tajari:

–Ohuapi Dio ohua cadossejari. Pohua jipa tahicca odsepe ijijaro. Najaropi pina occa jijipassa najaro. Dio Pohua dsepe ihiji nahicca najaro onajicanijine, onajaro. Najaropi occa jijipa –nade Jeso.

³⁵–Naraha tettidenipi ajima tiqinani: “Abadsico 4 canadsana huidsajacca ppa nahi bono jadahi pore nahi bica tahi” tiqinara ha ohuattipi: ¡Ajana qqui tiqinanaja! Aja huidsajacca ppa nahipa jada bote tojahi. Pore nahi bica tahi –nade. –Madija Dio Atti mittamanahijinepa najoramanahi. Pina huidsajacca ppa nahi jadajarissa

quinahi. ³⁶Madija huidsajacca ppa nahi bono porede dsepedeni ihijimana najaripa ima bicani cacajimana najari. Pohuadeni jinena madija camittehe jiquejericca cacajimana najari. Nadsapa huidsaja ppadedeni, bono porededeni tedsejepa huatidsemana tahi. ³⁷Nadsama ajijaro imapi pajissa: Huidsaja ppadedenipa ohuaha, huidsajacca bono jadadsa porededenipa ohuaha quinajari. ³⁸Nadsama ohuapi huidsajacca bono jadahi porede tiadeni dosse onabaqqina. Aja ticcadeni ppaniji jarahi. Najaridsapa madija ohuadenina dsepedeni ijimanapojari. Naraha tidsepedeni ijimanajaro cca huapimapi tassaqqujaro. Aja dsepedeni ijimanapojaricca naqui tiadenidsa ima bicani tojani –nade Jeso iadsa.

³⁹Nadsapi amoneje Samariacca odsa panani Sica huaji Jesocca ima huati huati tadsa madija mota huapi taha Jesodsa pajissa quinajari. Aji amoneje poni attinipi: –Aja otahimari huapima nahato tajari, ohuadsa huati huati tapa –najaro mittamanadsapa pajissa quinajari.

⁴⁰Nadsapa Samariacca madijadeni iahuaji bacco najonamanadsapa Jesodsa huati toquinade: –Iadsa timadiccapi –quinade. Nadsapi nanidsa icca huada pamaccanijine imadiccade. ⁴¹Jeso nahidsa ibodsapa madija denima Jeso atti mittamanadsapa pohuadsa pajissa quinade. ⁴²Nadsapa amonejedsa huati toquinade: –Tahidepi tettidsaha “Jesopa Cristo-Mesia” inapojaro. Naraha jidapapi Jeso pocca marinaja imittadsapi pohuadsa pajissa inajaro. Tettidsaha

imittani ojari-gerani. Jidapapi pocca marinaja imittadsapi nahatoququiri inani: “Pohuapa dsama huapimaccca madija Tonassijade” inajaro –quinade.

⁴³Nadsapi dsama arobeni Samariadsa icca huada pama nadsapi Jeso pohuadsa jaijanide dsama arobeni Carireahuaji. ⁴⁴Nahidsana Jeso Dio Atti cacomeraququiri najarideni tahimarideni huati tajaride: –Poccadeni madijapa pohuadenidsa: “Deni tijani” quina-jaraha nama najonamanajari –najaride Jeso. ⁴⁵Nadsapa Carireahuaji bacco nanidsapacatidsemaneri nade. Aja odsapanani Jerosarehuaji madimanapodsapa ejete Pascoadsa pohuacanahatori canahi qqui toquinapojanajari.

**Canahuaji toccanidsa
tamine biji accodecca
ejedeni inanomijari**

⁴⁶Carireacca odsapanani Canahuaji ejetedsa Jeso pohuajine passoraha uva ppejene ihinana nanihuaji jaijanipomajaro. Naraha tamine biji accode bedipa odsa onihi Capernaohuaji coma tajari. ⁴⁷Naraha tamine biji accodepa: –Jeso dsama arobeni Jodeahuaji ccanidsa Carireadsa bacco nanihi –quinahi imamittadsapa Canahuaji ccajonajari Jesodsas. Bacco najonadsapa Jeso pohuadsa huati tade: –Occa odsahuaji ohuadsa ticcaccaji, occa ejedeni dsoqquebote nahi tinanomihijine –nade. ⁴⁸Naraha Jeso attipa: –Tiadenipi ocanahatori canani qqui tiquinejeradsapi ohuadsa pajissa tiquinejerani. Qqui qqui tiquinapojerajarrocca ahuato onana-geradsa

naqui ohuadsa jehe tiquinejerani –nade. ⁴⁹Naraha tamine biji accodepa: –Ohua Medsedede, occa ejedeni dsoqqe-jaradsama ticcaccaji –nade.

⁵⁰Nadsapa Jeso pohuadsa huati tade: –Ticcaniji, ticca ejedenipa dsoqqe-jarahi, tonomihi –nade. Nadsapa Jeso pohua attidsa pajissa nadsapa toccanide. ⁵¹Nadsapa toccanijari, huada ssiaja pocca odsa bacco tanibote naraha pocca medsedeni bacco ijidsabaququijari. Nadsapa huati toquinajari: –¡Ticca ejedenipa tonomidija! Madihi –quinahi nade. ⁵²–¿Maji nejecodsas occa ejedenipa tonomijaritta? –nahi nade. –Maittadsama maji itetepidsa huapi ppocone totappajaridija –quinahi nade. ⁵³Nadsapa imehi bodi huatojari: –Maittadsama maji itetepidsa Jeso huati tajaride: “Ticca ejedenipa tonomihi” najaride –nahi nade. Nadsapa tamine biji accode pocca odsaccca huapima naco Jesodsas pajissa quinajari nade.

⁵⁴Ajjijaro imapi Jeso Jodeahuaji ccanidsa Carireadsa bacco nanidsapanahi Carireadsacanahatori canapomajari.

**Passo inorinidsa coma
tajari Jesojine tonomijari**

5 ¹Jodiidenicca ejete bacco tapomadsapi Jeso Jerosarehuaji toccanipomajari. ²Nani Jerosarehuajipi edede ihieqquedsimamana nahicca noccobiji huajira tanidsasiba ppajani tohuittidsanani dsajatajaro. Najaro passo onini jodiideni atti ebreodsapi: Besata, quiquinanajari. Nani passo inorinidsapimadija comaququiri najaridenicca

odsa 5 canehe cacahitteri najarode.
³Najaro odsadsapa madija coma-
 qquri najarideni domo podsaridsa,
 noccodeni siri domo podsaridsa,
 issodeni siri domo podsaridsa, ide-
 deni tone biqueradsa issodeni ssomi
 toquejenarideni domo podsaridsa
 najaride. Pohuadenipa: –Passo
 ccomororo canadsa opodsippadsa
 onominijine –quiquinanajari. [⁴Aji
 passo ccomororo cacana najaropi
 Diocca dodosse memehuaiccacajine
 huajiji tadsa ccomororo cacana
 najaro, quiquinanajari. Passo
 ccomororo canadsa madija tahide
 toquedsippapods podsippajarina
 totonomimana najari, quiquina-
 najari nade.] ⁵Naraha nahicca
 comaqquri najarideni ojariapa
 huajano 38 naha coma tajari.
⁶Najarina ponahi Jeso qqui inadsa
 nahidsa coma taha maitta madi-
 rahi ima mittadsapa pohuadsa
 huati tajaride: –¿Tinominijine
 jipa tinaqui? –nade. ⁷Naraha
 pohua cacomerade: –Jehe, jipa
 onaraha passo ccomororo cana-
 dsa ohua napodsippade ocappira-
 dsa ajidsa onominijine ssamo
 tani –nade. –Passohuaji ccobo
 odsipparaha mijira onadsapi madija
 ohuahadenina tahide bacco bacco
 totodsippamanapo najari –nade.
⁸Nadsapa Jeso aja coma tajaridsa
 huati tade: –¡Titehemaji! Titaboro
 tididsa ticcaniji –nade.
⁹Nanaja amadsati tonomidsapa
 totehema, pohua taboro idi toccani-
 ni naraha najaro huadapi sabado
 tojajarojine pohua taboro dsojode
 *oppina tani, quiquinanajari.
¹⁰Nadsapa jodiodenipa pohuadsa:
 –A, jidapapi icca *jassinajacca
 huada sabadoraha titaboro dsojo

taridsani. Najaro imapi bica tejerani
 –quinade. ¹¹Naraha tonomi-
 jaripa pohua cacomerade: –Ohua
 tonanomide attipa: “Titaboro
 tididsa ticcaniji” nadsapa –nade.
¹²Naraha: –¿Nejecojarina tiadsa:
 “Titaboro tididsa ticcaniji” najari-
 naja? –quinade.

¹³Naraha tonomijaripa pohua
 tonanomide oni ssamo tajari:
 –¿Nejecojarinaja? –nade. Aja Jeso
 madija inanomihidsapa madija
 huapi taja najari. Nahi pohuadeni-
 dsa quejemadsapa amossi najari.
¹⁴Dsotodena Jeso pohua inanomi-
 jaripa Diodsa dada toqqimahuaji
 bacco inajari. Nahidsana pohuadsa
 huati tajaride: –Jidapapi tinomi-
 dsama imasiri tinanapoma-
 jerana. Imasiri tinanapomadsapi
 denima ocasserehe tiadsa ssonarinitohui
 –najaride Jeso pohua inanomijari-
 dsa.

¹⁵Nadsapa tonomijari jodiodeni-
 dsa huatide toccajari: –Jesona ohua
 tonanomijari –nahi nade. ¹⁶Naraha
 pohua atti nama nadsapa jodiodeni
 Jeso jara quinajari, inanadsoque-
 manahijine. Sabado huajijiradsa
 madija ihinanomibaqqui nadsapa
 pohuadsa huadimanajaride.
¹⁷Naraha nidsa dsotodena Jesopa
 pohuadenidsa huati tade: –Occa
 Abipa dsepe ijhipaja nadsapa ohua
 naqui nema onajaro –nade.

¹⁸Jeso atti nama nahi mittamana-
 dsapa jodiodeni paja icahadimana-
 rihi nade. Attidenipa: –Sabadopi
 *oppina tani inajarods ibora
 tajaradsapa madija inanomihi
 –quinajari. Jeso pohua atti onihi
 naqui: –Diopa occa Abi –nahi
 mittamanadsapa pohuadenidsa
 pina Diossa nahi quinadsa Jeso

dsoqquehijine tohui inacomamanageri.

**Dio Bedipa Imehi tedseje
canahatoquimerajari**

¹⁹Naraha Jesopa jodiodenidsa pohua tahimari ecomerade: –Pajissara tiadenidsa huati onajaro: Dio Bedipa pohua ehuerahipa nahatora tahi. Naraha pocca Abicca nahatohue qqui tadsana pohua naco nema inanajaro. Pina Imehicca nahatohuessa najaro ihinahato najaro Bedi naco –nade. ²⁰ –Imehi pohua Bedidsa huati huana tadsapa pohuadsa pocca nahatohue nohue inajaro. Najaro nahatohue Abijinepi denima denima dsanaponitohui. Najaro qqui tiquinadsapi huajo ticanirenitohui –nade. ²¹ –Abi inahatonibaquijaripa camittehe pohuadenidsa da da ihinaridsa najaro. Najarossa najaro pocca Ejedeni naco pohua jipa tajaridsa pocca camittehe da da ihinaridsa najaro. ²² Abipa Pohua Bedidsa dacorehe da inadsapi Pohua Bedi icadossejari: “Tiana madija poccadeni imasiri manaconi pohuadenidsa tinassonariji” najari. Nadsapa Abi Diopa madija poccadeni imasiri manaconi pohuadenidsa inassonari-jeranitohui. Pohua Bedina pohuadenidsa inassonarinitohui. ²³ Nadsana dsama huapimacca madijapa Dio Bedidsa: “A, nahato tahi” quinahijine. Pina Imehidsa: “A, nahato tahi” quinajarissa quinahijine. Naraha Pohua Bedidsa: “Nahato tahi” quina-jaradsapa pocca Abi pohua Cadossedsa naco: “Nahato tahi” quina-jarajarissa najari –nade Jeso.

²⁴ –Pajissara tiadenidsa huati onana: Ohuatti mittamanajaridenipa aja ohua Cadossede Abi

Diodsa pajissa quinadsa naco camittehe jiquejeranicca cajimana-dsanapohuitohui. Poccadeni imasiri manaconipi pohuadenidsa ssonari-jeranitohui. Tahide Diodsa ssamoqquri nadsapa pina dsoqque-manajarissa quinaraha najaro inebomanadsa camittehe jiquejeraniccadsa toquejenajari –nade. ²⁵ –Pajissara tiadenidsa huati onana: Jidapapi ima bacco nabote nani: Diodsa ssamoqquri najarideni naco Dio Bedi ohuatti mittamanahitohui. Ohuattidsa iboraqquri nadsapa camittehe jiquejeranicca cajimanageri hitohui –nade. ²⁶ –Abi Diopa camittehe jinede. Ohuapi Pohua Bedi ohuadsa naqui camittehe da inajaro. ²⁷ Occa Abijine ohuatti ocajjaropi nidsa dsama jicadsa madijadenicca imasiri manaconi pohuadenidsa onassonarinitohui. Ohuapi Madija Bedi ojararode. ²⁸ Ajijaro ima timittamanadsapi huajo ticanirejeraji. Nidsa aja jicapjarideni ohuatti mittamanadsapa nahatonimanahitohui. ²⁹ Nadsapa bicani inanamanehe jicajarideni nahatonimanadsapa camittehe jiquejeraniccadsa toquejenahitohui. Naraha imasiri inanamanehe jicajarideni nahatonimanadsapa poccadeni imasiri manaconi idsahua-baqquidsapa *najidsohue jiquejeraniccadsa madimana-dsanapohuitohui –nade Jeso.

**Abi naco Pohua Bedi
tahimari ecomerajaro**

³⁰ Jesopa jodiodenidsa huati huati dsanapjaride: –Nadsama ohua mottapi madija poccadeni imasiri manaconipi pohuadenidsa onassonari-jerajaro. Abi Dio Pohua Atti omittadsana imarideni

ohocattema najaro. Ohuapi ohua motta ohua tohuini onanicca onanajerajaro. Naraha aja ohua Cadossedeh Pohua Attissa onanadsana imarideni ocattemadsa onapajiranissa tajaropaji. ³¹“Ohuapi Dio Bedi ojani” onajaro ohua motta huati huati onadsapi tiadenipi ohuadsa: “Pohua motta pohua atti iadsa ehecomera najaro pajissa jerani” titiquina najaro –nade Jeso. ³² –Naraha otahimari cacomeradepa ohuaha madihi. Najaripa Huano. Pohnuapa otahimari pajissara huati huati tajari nahato onajaro –nade Jeso. ³³ –Nadsama Huanocca imatohui dosse tinabaquimanapodsas naco otahimari ecomerajaro. Pohnuapa pajissacca imara huati huati tajari –nade pohuadenidsa.

³⁴ –Naraha madija otahimari cacomerade nohueradsa naqui epeje. Ohuapi Dio Bedi ojani otahimari ima onihidsa naqui ahuato tajaro. Aji otahimari Huano ecomerapojaro cca tiadenidsa huati huati onajaropi tossiejehe ticajimananijine. Huanocca huatinajadsa pajissa tiquinapodsapi ohuadsa naqui pajissa tiquinanijineraha. ³⁵ Huanopa pina jororotoquehessidsa jororo canapojarissa najari. Pohua jororonepa aja pocca huatinaja tiadenidsa bica tade. Pohnuadsa tetetidsemana naraha amossi nadsapa epeje tiquinade. ³⁶ Nadsama Huanocca huatinajapi ajimani. Occa nahatohuena deni tojajaro. Occa nahatohuepi occa Abicca dosseniji. Najaro nahatohuejinena ima ahuato tajaro: Pajissa occa Abi ohua cadossejari.

³⁷ –Nadsama Abi ohua cadossejarijinena occa ima ahuato tani qqui tiquinajaropaji. Naraha Pohua Atti mohuini timittamana-jerani.

Pohua assire naco qqui tiquinajarahi. ³⁸ Pohua Atti naqui tibodidenidsa madidsa-jerani, Abi Dio icadossejaridsa pajissa tiquinejeraroline. ³⁹ Nadsama tiadenipi *Dio Atti dsodo nani timittamananissa tanijine hua hua titiquina nani. Tettidenipi: “Dio Atti dsodo nanidsa camittehe jiquejeranicca bacco inanijine” titiquina najaropi nani Dio Atti dsodo nanidsa otahimari anini. ⁴⁰ Naraha tiadenipi ohuadsa pajissa tiquinejerajaro. Pajissa tiquinadsapi camittehe jiquejeranicca ticajimanadsanaponitohuiraha –nade.

⁴¹ –Madija attidenipa: “Tiapi deni tijani. Bica tinani” quinahijine occajona-jerajaro. ⁴² Ohuapi tibodideni nahato onani: Diocca tohuati huanehepi tiadenidsa nohuerani. ⁴³ Ohuapi occa Abi onima pocca dosse-niji occajonajarode. Naraha tiadenipi ohuadsa: “Iadsa tijaji” tiquinejerani. Naraha madija ohuaha pohua pocca imadsa ccajonajaridsapa: “Iadsa tijaji” tiquinanitohui. ⁴⁴ Naraha ¿nejecoma tiquinadsa ohuadsa pajissa tiquinanijine? Tiadenipi aja titessedeni tiadenidsa: “Tijine ima bica tani” quinahitohuina tiquinajaro. Naraha Diona ojarihi. Pohua Attipa tiadenidsa: “Tijine ima bica tani” nahijine tohuinipi tibodideni huatoma-jerani. ⁴⁵ Tibodidenipi ajima najaro: “Dsama jicadsa Cristo-Mesia iadsa ima inassonariniene Abi Diodsa huati tahitohui” tiquinaraha aja tiadenidsa ima inassonariniene Moisesina paja. Tibodidenipi: “Moisesicca marinaja ecahuanissa tadsapi icassiejeranitohui” tiquinaraha tecahuamananijinepi tipajiramana-jerani. ⁴⁶ Nadsama Moisesipa otahimari dsodo inapojaro. Moisesidsa jehe tiquinadsapi ohuadsa naqui jehe

tiquinanijneraha. ⁴⁷Naraha Moisesicca dsodonijidsa pajissa tiquinejeradsapi ¿nejecoma nadsa ohuattidsa pajissa tiquinanijine? –nade Jeso.

Jeso madija 5 mil quinajarideni inajipabaquijari

Mateo 14.13-23; Maraco 6.30-44;

Roca 9.10-17

6 ¹Nani dsotodepi dsama aro-beni Carireacca coridsa onini onihipi Tiberiaccia coridsa quiquina-najari jippehuaji Jeso pohuadsa jaijajarode. ²Madija huapima naco Jesotohui inatti jajahimissa najaride. Pocca nahatohuedsa comaquiri najarideni tonomiridsamanahi qqui toquinapoja najarijine Jeso pohuatohui quinajari. ³Nadsapa Jeso ssonohuaji toqqemoradsa pohua huatimadedeni ia naqui pohuadsa jaijemorade. Nanidsa jassi inadsapi Jeso naco iadsama huittajaride. ⁴Ajjijaro ima tojajaropi jodiodenicca ejete onini Pascoa bacco tabote nadsade. ⁵Nanidsa jassi inadsana madija bacco namissamanahi Jeso

qqui inabaquijaride. Nadsapa Jeso pohua huatimade Feripedsa huati tade: –¿Nejecohuaji madija huapima jipamanahijine taparideni mitta inapadsaja? –nade Jeso. ⁶Jesopa madija inajipabaquihijine nahato taporaha ecomadsa: –¿Feriye atti nejecoma nahi? –nadsa huati tajari. ⁷Naraha Feripe attipa: –Dsiro huemani pina 200 *denariodsas madija taparideni mitta inadsapa badsira badsira taridsaraha motadenipa dsori tocanirehitohui –nade.

⁸Naraha Jeso huatimade ojaria onipa Adiri, pohuapa Ssino-Pedro ohuaha najarina dsabisso pan cajihi qqui tadsapa Jesodsa huati tajaride: ⁹–Ajajari dsabissona pan 5, aba pama naha cajiraha madija huapima jipamanahijine pajirajarahi. Madijapa huapi tahi –nade.

¹⁰Nadsapa Jeso iadsa huati tade: –Madija jassi taridsahijine huati tinabaquimanajo –nade. Nadsapa huati inabaquidsa nahi dsero bica tanidsa jassi taridsade. Maqqi-deje pohuarapa 5 mil quinajaride.



¹¹Nadsapa Jeso pan inaccadsa Diodsa huati tajari: –Jehe, epejeni. Ticca daniji iadsa bica tahi –najari. Nadsapa Jeso canahatori canajarijine pan tohuapidsapa madija jassi jassi teri najaridenidsa da inabaquiridsade. Aba naco najari-ssa inanjari. Nadsapa huapimadsa inapajirabaquihissa tade. ¹²Madija huapima jipamanaha accaramanadsapa Jeso iadsa huati tade: –Mota tojadsapa tinaccaniridsa-manajo. Mota tinebomana tajarajo –nade. ¹³Nadsapa pan 5 najari jipamanajari ajarideni mota inaccaniridsadsapa quiqui 12 naha ijiridsade.

¹⁴Nadsapa Jeso canahatori canahi qqui toquinadsapa imahaha canade: –Pajissa ajajaripa Dio Atti cacomerabote. Maittaccadsama ima imittapjaropi: “Ajijaro dsamadsa bacco nahitohui” quiquinanapode –quinade huapima. ¹⁵Nadsapa madija attideni: –Jari, Jeso dama inadsa icca tamine tojahijine iaccanina –quinaraha Jeso pohuadsa nama quinahijine nahato tapodsapa madija inebobaquipomadsa pohua motta madihijine ssonohuaji denima toqqemorade.

Jeso passo tetepi ccamissajari

Mateo 14.22-33; Maraco 6.45-52

¹⁶Nadsapi maji amossi nabote nadsa Jeso huatimade iapi coridsahuaji jajiedsippajarode. ¹⁷Jesotohui imadidsapi dsomebote tojaraha Jeso qquedsippa-jaradsapa canoadsa jajiedsadsa coridsa jippehuajicca odsa panani Capernaohuaji iaccade. ¹⁸Nadsapi coridsa nocconi iaccaraha jojode jo jo nadsapi coridsa ssoda ssoda nade. ¹⁹Nani coridsa nocconi iaccanaja inattihuaji passo

tetepi Jeso ccajonahi qqui inadsapi icappina nade. ²⁰Naraha pohua cacomerade: –¡Ticappinamana tejeraji, ohuapi ohua! –najonade. ²¹Nadsapi etidsedsa pohuadsa: –Canoadsa tiqqedsaji –inade. Nadsapi amadsati Capernaohuaji bacco inade.

Jesotohui quinajarideni Capernaohuaji jahimissajari

²²Najaro ssiajadsa madija mota aja coridsa jippehuaji ibomanajarideni huatideni huatomadsa: –Jeso huatimadedenipa canoa cajarie caponajarodsas jai tojaraha Jesopa pohuadenidsa tocca najarade –quinajari. ²³⁻²⁴Nadsapa nahidsa Jesotohui, pohua huatimadedenitohui qqui naridsamanaraha bacco inabaquimana-jaradsapa: –Jina, jippehuaji jajiana –quinanaja odsa panani Tiberiahuajicca canoa onihi bacco bacco canajona-manajaro quinade. Nahi Jeso pohua Diodsa huati tadsa: –Jehe, epejeni. Ticca daniji iadsa bica tahi –napodsapan da da ihinabaquini nahi huajira tanihuaji huana huana canajona-manajaro. Nadsapa nahidsa ibomanajarideni najaro canoa onihidsa onihidsa jai tojedsaridsadsapa Capernaohuaji jahimissajaride Jesotohui.

Jesopa madimana- dsanapohuijinecca pan tojajari

²⁵Jesotohui dsotode jahimissajarideni canoa onihidsa bacco bacco namissamanade. Nadsapa Jesodsahuati toquinade: –Ia Maride ¿nejecoma nadsa ahuaji bacco tajonajarotte? –quinade. ²⁶Naraha Jeso pohuadenidsa huati tade: –Jehe, pajissara tiadenidsa huati

onana: Ohuapi tiadeni onajipa-baqquidsa teccaramanajarojine otohui tiquinajaro. Naraha occa marinaja, ocanahatori canani timittamananissa tejeradsapi najaro occa marinajatohui ohua qquidso tajonamana-gerani –nade Jeso pohuadenidsa. ²⁷ –Naraha tiadenipi ticcadeni jijipa jicaca tahicca tohuira tibodideni huato-geraji, onajaro. Jijipa jicaquera tahicca tohuira tibodideni huato-manaji –nade. –Ohuapi Madija Bedi ojajaroa jijipa jicaquera tahiccara tiadenidsa da onaridsahijine, onajaro. Nadsama najaro cacahuehepi occa Abi Dio ohuadsa da inadsa occajonajaro –nade Jeso.

²⁸ Naraha manaco pohuadsa huati toquinade: –Dio jipa tahicca inananijinepi ¿nejecoma inanijine? –quinade. ²⁹ Naraha Jeso pohuadenidsa huati tapomade: –Diopa ajima tiquinadsana jipa tajari. Aji ohua Diocca dossenijidsa pajissa tiquinadsana Dio jipa tahi –nade.

³⁰ Naraha manaco pohuadsa huati toquinapomade: –¿Nejecora innocodsa ticanahatori canani qqui inadsa tiadsa pajissa inanijine? ¿Nejecora tinahatohuijine tipajirani? Qqui inana –quinade. ³¹ –Jari, pina maittaccadsama icca idideni dsama huamonihuaji Moisesidsa jahiridsadsapa jijipa oni *mana jijipamana nahi quinade. Najaro ima Dio Atti dsodo nanidsapi ajima najaro: “Pohuadenidsa memehujicca pan da inadsapa jijipamana najari” quiquinanade –quinade Jesodsa.

³² Naraha Jeso pohuadenidsa huati tapomade: –Pajissara tiadenidsa huati onana: Najari pan memehujiccapa Moisesicca daniji

jarahi. Abi Diona pohuadenidsa da da nanaja najari. Naraha jidapanaccapa memehujicca pan pajissacca occa Abi Dio tiadenidsa da inajari. ³³ Najaripa Diocca daniji memecca ccaronajari, dsama huapimadsa camittehe jiquejeranicca da inaridsanijine –nade Jeso. ³⁴ Naraha pohuadeni attipa: –Jari, Mamaride, najari pan iadsa da da tidsanapojo –quinade.

³⁵ Naraha Jeso pohuadenidsa huati tade: –Aji ohuapajia pan timadimana-dsanaponijinepi. Ohuadsa pajissa quinajaridenipa pemimana-jarahitohui, baccodeni naco dsarimana-jarahitohui.

³⁶ Nadsa tahide tiadenidsa huati huati onapode. Ohua qqui tiquinaraha ohuadsa pajissa tiquinejerani, onapode. ³⁷ Naraha ohuapi occa Abicca daniji ohuadsa jahijonajarideni huapimapa ohuattajobaqqui-jarahitohui. ³⁸ Aji ohua memehujicca occaronajaropi ohua ohua motta tohuini onanicca onananijine jerani. Occa Abi ohua cadossejari. Pohua jipa tahicca tohuini onadsa odsepe ijiridsajaro. ³⁹ Ohua cadossejari pohua jipa tahiccapi ajima najaro: Abi Dio ohuadsa madija inanabaqquijaripa ohuacahuabaqquihissa tadsapa amossi naja cama-jarahitohui. Nidsa huada jicarinicca bacco tadsapi huapima onahatoni-baqquihitohui. ⁴⁰ Nadsama occa Abi Pohua jipa tahicca onihipi ajima najaro: Madija huapima Dio Bedi qqui toquinadsa pohuadsa pajissa quinadsapa camittehe jiquejeranicca cajimannahitohui. Nidsa huada jicarinicca bacco tadsapi najarideni huapima onahatoni-baqquihitohui –nade Jeso.

⁴¹⁻⁴²Nadsapa jodiodeni Jeso atti: –Ohuapi pan memehuaicca occaronajaro –nahi mittamana-dsapa pohuama attitti cosseri nade: –Ajajari Jesopa Dsodse bediraha “Ohuapi memehuai occaronajaro” naha. ¿Pocca abi amidenidsa inocco jidsaqquri najaroqui? ¡Nahatoqquri inani! –quinade.

⁴³Naraha Jesopa pohuadenidsa huati tade: –¡Ponima attitti ticossajaropi tinebomanaji! ⁴⁴Occa Abi Dio ohua Cadossedepa madija ohuadsa inanabaqqui-jaradsapa ohuadsa toquejena-jarahi. Naraha occa Abi ohuadsa inanabaqquijaridenina ohuadsa totoquejena najari. Najaridenipa nidsa huada jicariniccadsa onahatoni-baqquihitohui, onajaro. ⁴⁵Dio Atti cacomeraqquri najarideni dsodo quinapojarodsa naqui ajima nani: “Diona madija huapima mari icanabaqquihitohui” quinapohui nade. Najaroa aja madija huapima Abi Dio Atti mittamanadsa tocahatterjaridenina ohuadsa totoquejena nahitohui.

⁴⁶ –Nadsama madija huapimapa Abi qqui toquina-jararaha ojariana Abi qqui tajari. Najaropi ohua. Ohuapi Dio pocca occajonajaro. ⁴⁷Ohuapi pajissara tiadenidsa huati onajaro: Madija ohuadsa jehe quina-jaripa camittehe jiquejericca cajimana-dsanapohuitohui, onajaro –nade Jeso.

⁴⁸ –Jehe, ohuapi pan timadimana-dsanaponijinecca. ⁴⁹Nadsa maittaccadsama ticcadeni idideni dsama huamonihuai jahiridsadsapa pan oni mana jipamanapojaripa huapima jicaridsajari. ⁵⁰Naraha aja pan memehuaicca ccaronajari tahimari huati huati onajaro

jipamanajaridenipa jicamana-jarahijine, onajaro. ⁵¹Ohuapi pan camittehecca ojani memehuaicca occaronajaro. Najari pan madija jipamanajaripa madimana-dsanapohijine, onajaro. Tiadenidsa pan da onajaripa ohuassire. Madija dsama huapimacca tocassiejarahijinepa ohuana ohua ohuaccoranitohui –nade Jeso.

⁵²Nadsapa jodiodeni Jeso atti mittamanadsa pohuadenira ahuai huati ahuai huati quinajaripa: –¿Pohua pohua assire nejecoma inanadsa ia tonajipabaqquihijine? ¡Samo tani! –quinajaride.

⁵³Naraha Jeso pohuadenidsa huati tade: –Pajissara tiadenidsa huati onapomana: Ohuapi *Madija Bedi ojararoa ohueme tijipamanajeradsapi camittehe jiquejericca ticappiramananitohui. Ohuemene dse tiquinejradsa naqui camittehe jiquejericca ticappiramananitohui. ⁵⁴Naraha ohueme jipamanajarideni, ohuemene dse quina-jaridenina camittehe jiquejericca cajimana-dsanapohuitohui. Nadsapa nidsa huada jicarinicca bacco tadsapi najaridenina onahatoni-baqquihitohui, onajaro. ⁵⁵Nadsama ohuemepi jijipa pajissacca, ohuemene naqui dsedse pajissacca ojani. ⁵⁶Aja ohueme jipamanajarideni, ohuemene dse quinajaridenipa ohuadsa madiridsamanajari. Ohua naqui pohuadenidsa omadiridsajaro. ⁵⁷Abi Dio camitta tajarina ohua dosse naronajaride. Najari Pohujine camitta onajaro. Najarossa onanajaroa madija ohua jipamanajaridenipa najaro camittehe jiquejericca cajimanahijine. ⁵⁸Aja pan memehuaicca ccaronajari

tahimari huati onajaropi pina pan oni mana ticcadeni idideni jipamanajarissa najarahi. Ididenipa najari mana jipamanaraha najaridenipa tojicahi. Naraha aji ohuapi pan memehujicca ojajaro. Najari pan jipamanajaridenipa madimanasanapohuitohui –nade Jeso.

⁵⁹Najaro imapi Capernaohujicca Dio Atti mamarihuaji Jeso madija mari icanabaquijaride.

Jeso attina camittehe jiquejeranicca

⁶⁰Nadsapa Jesocca marinaja pohua ime tahimarini mittamandsapa aja pohuadsa jahiridsajarideni motapa imahaha canade: –Aja Jeso huati huati tajaripa imittanijine najo tani. ¿Nejecojarina mittadsa jehe nahijine? –quinade. ⁶¹Pohuadenira attitti cosseri nahi Jeso nahato tadsapa pohuadenidsa huati tade: –¿Aji ima huati huati onajaropi tiadenidsa ocassera tajaroqui? ⁶²Naraha ohuapi Madija Bedi ojajaroa nidsa omadiponihuaji occamacossanini qqui tiquinadsapi ¿nejecoma tiquinapadseje? Nadsana tibodideni huatomanitohui. ⁶³Dio Corimena madijadsa camittehe da inajaro. Madijapa pohua tesse-dsa camittehe da inanijine ssamo tani. Ohuatti tiadenidsa huati huati onajaropi Dio Corimecca daniji. Camittehe jiquejeranicca tiadenidsa da inanijine pajirani. ⁶⁴Naraha tiadeni motapi ohuattidsa pajissa tiquinejaraccani –nade Jeso. Madija mota pohuadsa pajissa quina-jarajaridenidsa naco nahato tapojari. Pohua ccaccoradedsa naco nahato tapojari. ⁶⁵Nadsapa denima huati tajari: –Najaroa ohuattipi:

Occa Abi Diopa madija ohuadsa inanabaquui-jaradsapa ohuadsa toquejena-jarahi. Naraha occa Abi ohuadsa inanabaquuijaridenina ohuadsa totoquejena najari –nade Jeso.

⁶⁶Jeso najaro ima huati huati tadsapa madija pohuadsa jahiridsajarideni huapi taraha motapa jai tojaniridsade. Jeso pohuadsa jahiridsaraha ineboqqui-manajaride. ⁶⁷Nadsapa Jeso pohua huatimade 12 inajarods huati tade: –¿Tiadeni naqui: “Jaijanina” tiquinaqui? –nade. ⁶⁸Naraha Ssino-Pedro pohua cacomerade: –Ia Medsede ¿nejecojaridsara jaijanijine? Tettina ojarini camittehe jiquejeranicca. ⁶⁹Iapi tiadsaha pajissa inapode. Tiadsana nahatoqquri inajaro: Tiapi Diocca Ejedeni Bicabote tijani –nade Pedro. ⁷⁰Nadsapa Jeso huati tapomade: –Aji 12 tiquinajaropi tiadeni ocattejidsa-baqquijarode. Naraha ojariapa pina occa huadi *Satanassa nahi –nade.

⁷¹Aja Jeso huati tajaripa Simon Iscariote bedi *Joda tahimari huati tajaride. Jeso pohua huatimade 12 inaraha najari ojariana Jeso ccaccorade tojajaride.

Jeso pohua imecote pohuadsa pajissa quina-jarajari

7 ¹Nahi dsotodepa dsama arobeni Carireadsana Jeso madiccadsa odsa onihi, onihidsa mari mari naridsajaride. Dsama arobeni Jodeahuajipa jodiodeni Jeso pohua dsoqquehijine tohui quinadsapa nahihuaji madide jipera tajari. ²Naraha jodiodenicca idideni *odsa huahuaqquidedsa madiridsamanapojaridenicca ejete

tohuajirajarode. ³Nadsapa Jeso pohua imecotedenipa pohuadsa huati toquinade: –Ajidsapi timadi tejeraji. Jodeahuaji ticcaji. Nahihuaji madimanajari titohui quinaridenidsa naqui ticca nahatohue nohue nohue taridsaji –quinade. ⁴ –Madija ohuaha nahatohue cajimanajaridenipa pohuadeni tahimari tojaridsanijinepi poccadeni nahatohue ihinajimamana nejerajaro. Madija huapima qqui toquinahijine nahatohue ahuato ihinanamana najaro. Tia naqui nahatohue ticajidsapi madija huapima qqui toquinahijine nema taridsaji –quinade pohua imecote attideni. ⁵Jeso pohua imecotedeniraha pohuadsa pajissa quina-jaradsapa attideni nama quinajaripaja. ⁶Naraha Jeso pohua imecotedenidsa huati tade: –Tiadenipi huada ponimaccadsa tohuini tiquinaraha otahimari tojaridsanijinecca huada bacco tejeraccani –nade. ⁷ –Nadsama tiadenidsapa ajijaro dsamacca madija nacasseraququiri najarahi. Naraha ohuadsana nacasseraququiri najari, ohuapi poccadeni imasiri cacomera onadsa. ⁸Nadsapi tiadenira ejetehuaji jai tijaji, ohuapi oqqejerani. Ohuadsa nahatoququiri nahijinecca huada bacco tejeraccani –nade. ⁹Jeso atti nama nadsapa Carireadsa ibojaride.

**Jesopa *Odsa huahuaququidecca
ejetedsa quejemajari**

¹⁰Nadsapa Jeso imecotedeni ejetetohui jai tojadsapa pohua naco dsotode nahi madija huapi tahidsa toquejema-dsanapode. Naraha pina pohuadenidsa toqquerahi nahijine

pohua cacomajaride. ¹¹Nadsa ejete tojadsapi jodiodeni taminedenipa Jeso bacco quinahijine qqui naridsamanadsapa: –¿Nejecohuaji maququideje nahatobotepa? –quinajaride. ¹²Nadsapa madija huapima Jeso pohua tahimari imahaha canade. Madija motapa: –Najaripa maququideje bicabotea –quinade. Naraha madija ohuahadenipa: –Iadsapa bica tararahi. Puhuapa toponi mamaisade –quinade. ¹³Naraha Jesodsa jipaququiri najaripa jodiodeni noppine cappinamanadsa ojidsa imahaha canade. ¹⁴Ejete mota tohuannaccaraha Diodsa dada toquimahuaji Jeso toququedsimadsa madija mari icanabaququijaride. ¹⁵Nahidsa Jeso mari icanabaququidsana jodiodeni huajo caniredsa imahaha canajaride. –¿Nejecoma nadsa tohuattajaritta? Mari mari ihicanamana najararaha –quinade. ¹⁶Naraha Jesopa pohuadenidsa huati tade: –Occa marinajapi occa jerani, ohua Cadossedejine –nade. ¹⁷ –Aji tibodidenipi: “Pocca marinajapi ¿Diocca dossenijiqui? ¿Pohua motta pohua attirane?” tiquinajaro nitide. Naraha Dio Pohua jipa taticcara tinanamanadsapi otahimari tiadenidsa ahuato tanitohui: Occa marinajapi Diocca. ¹⁸Aja madija pocca ima huati huati tataja najaripa madija ohuaha pohuadsa: “A, tiapi nahato tinani” nahijine huati huati tataja najari. Naraha madija ohuaha huati huati tataja najaripa: “Ajijaro imapi ojine jerani, ohua cadossedecca ima, pohuadsara tetidsemanaji” najari. Najarina pajissacca ima huati huati tataja najari. Madsa-jarajari –nade Jeso.

¹⁹ –Naraha ¿*Diocca dosseniji Moisesi dsodo inajaropi tiadenidsa nohuerajarrotaqui? Ticajimana- raha najarodsa iboqquri tiquina- jaro. ¿Nejecotohuira ohua tinana- dsoqquemananjine tohuini tiquina- jaro? Najaropi Diocca dosseniji jerani –nade Jeso.

²⁰ Nadsapa madija huapima Jesodsa huati toquinade: –Tiapi tocorime ticajijaroline mona tijaro nitidija. ¿Naraha nejecojarideni “Tia inandsoquena” quinajari? –quinade.

²¹ Naraha Jeso pohuadenidsa huati tade: –Icca *jassinajacca huada sabadodsa occa nahatohue ojari naraha huajo ticanirejarode. ²² Aji Moisesicca marinajadsapi: “Maqqi- dejedeni *huissinaja cacajimana nahijine” napohui nade. (Naraha najaro imapi Moisesi huati tadsa jerani. Abarahao madipodsama nema najonajaro.) Najaro aji ejedeni huadari 8 nadsapa sabadoraha huissinaja titinacajibacquimana najaripaja. ²³ Tibodideni huato- manaji: Pina Moisesicca marinaja- ssa titinanamana nanijine sabado- dsa maqquideje bedi huissinaja titinacajimana naraha ¿aji ojinepi bica tejerajari? Ojinepi sabadodsa madija assire namanaha tonomiraha ¿nejecotohui ohua ticahadimanajaro? ²⁴ Nadsapi ajijaro ima tibodideni huatonissa taji. Ponima “Tabaccora tani” tiquinejeraji. Ima nattomede tiquejenadsa pajissara nattome tiquinanissa taji –nade Jeso.

**Jesopa Diocca dosseniji
ccaronajari**

²⁵ Nadsapa Jerosarehuaji madi- manajarideni motaha Jeso qqui

toquinadsa imahaha canajaride:

–“¿Ajajaria inandsoquena” quiquinajarico? ²⁶ ¡A, naraha aja madija mari mari najonaha! Taminedenipa: “Mari tejeraji” quina-jarajarirana. ¿Icca tamine- denipa: “Pajissa, Cristo-Mesia” quinajarico? –quinade. ²⁷ –Naraha iapi ajajari madija pohua cca- jonahihuajipa nahatoqquri inani. Nassa Cristo-Mesiapa pohua cca- jonahihuaji ssamoqquri inaneje –quinade.

²⁸ Jesopa nahi Diodsa dada toqqimahuaji maride tojaraha pohuadeni atti mittadsa jadsirema huati tajaride: –¡Jehe, tiadenidsa jidsera onajarorane! ¡Ohua occa- jonanihuaji naqui nahatoqquri tiquinajaroraneje! Naraha ohuapi occa imadsa occajona-jerani. Aja ohua Cadossedena pajissehe jinede. Naraha tiadenipi Pohuadsa tinocco- deni jidsaqquri nani –nade. ²⁹ –Naraha ohuapa qqui onaja najari, nani Pohuahuaaji occajona- jaro. Pohuana ohua cadossejaride –nade Jeso.

³⁰ Nadsapa nahidsa Jeso pohua- deni dsepedsa tojahijine dama quinahitohuiraha dama quina- jarade. Jeso dsoqquehijinecca ima Diojine najo taccajaro.

**Jiodideni motapa: –Jeso
dama inana –quinajari**

³¹ Naraha madija mota pohuadsa pajissa quinajaridenipa imahaha canade: –Jesocca nahatohue deni tojajaro. Pina Cristo-Mesiacca ima imittapojarossa nani. Najarina Cristo-Mesia pohua. Nidsa madija ohuaha pina Jeso canahatori cana- jarissa najarahitohui –quinade.

³²Madija – Jesopa Cristo-Mesia – quinajari imahaha canadsa jodio-deni mota marinaja onini pariseo-dsa jehe quinajarideni mittamandsapa dada toqquimade taminedeni tedseje nahihuaicca cacahuadedeni Jeso dama quinahijine dosse inabaquimanajari: – Jeso dama tiquinadsa teccanimanana – quina-jari. ³³Jai tojadsapa Jesodsa bacco toquinajari. Naraha Jeso pohuadenidsa huati tade: – Ohuapi tiadenidsa badsira tehe omadi naccanijine. Nidsa dsotodepi aja ohua Cadossedsa occaninitohui. ³⁴Nadsapi otohui qqui taridsamananitohui, naraha ohua bacco tiquinejeranitohui. Ohua omadinhuaaji “Bacco inana” tiquinaraha nanihuaaji bacco tiquina-jeranitohui –nade Jeso.

³⁵Najaro ima madija mitta-manadsapa pohuadenira imahaha canade: – ¿Dsama nejecoma nahihuaaji toccahijine iadsa: “Ohua bacco tiquinejeranitohui” naha? –quinade. –¿Jodiodeni dsama onihihuaaji tojaribaquijaridenihuaaji toccahijineco? ¿Nahihuaicca jodio quejena-jarajarideni mari icanabaquihijineco? –quinade. ³⁶–Pohua atti ¿nejecoma najari? Aja “Otohui qqui taridsamanaraha ohua bacco tiquinejeranitohui. Omadinhuaaji naqui ‘Bacco inana’ tiquinaraha nanihuaaji bacco tiquinejeranitohui” najari –quinade.

**Passo camittehecca
huati tajari Jeso**

³⁷Odsa huahuaquidecca ejete huada jicaniccana denima bica tajaro. Najaro huadadsana Jeso

huadsa jadsirema huati huati tajaride: –Tibacco dsaridsapi ohuadsa ticcajonadsa dse taji –nade. ³⁸–Madija ohuadsa pajissa najaripa passo camittehecca caji-hitohui. Najaro pohua bodicca qquenadsapi tojaribaquinitohui. Najaropi Dio Atti dsodo nanidsa dsodo napojaro –nade Jeso.

³⁹Aja Jeso huati tajaripa pohuadsa madija pajissa quinajaridenina Dio Corime cajimanahitohui, najari. Naraha Jesopa dsoqqe, nahatoni, toccamacossani najaraccadsapa Dio Corime tojaridsa-jaraccajaripajade.

**Jeso tahimarijine madija
carobemanajari**

⁴⁰Jeso huati huati tahi mitta-manadsapa madija mota pohuadenira imahaha canade: –Pajissa ajajari madijapa Dio Atti cacomerabotea –quinade. ⁴¹Naraha madija mota attidenipa: –Ajararipa Cristo-Mesia –quinade. Naraha madija mota attidenipa: –¡Nohue-rahi! Cristo-Mesiapa Carireahuajicca jarahi. ⁴²Aji Dio Atti dsodo napojarodsapi ima ajima najaro: “Mesiapa tamine *Dabi Potemahi. Dabicca dsamabote odsa panani Berenehuajina ccajonahitohui” nani Dio Atti dsodo napojarodsapa –quinade.

⁴³Najaroa aji Jeso tahimarijine madija carobemanajaride. ⁴⁴Madija motapa: –Toponi cocorohuaaji Jeso dsojo inana –quinaraha cappinamanadsa dama quina-jarade.

**Jodiodeni taminedeni
huadimanajari**

⁴⁵Nadsapa marinaja pariseo-dsa jehe quinajarideni, dada

toqqimade tamededeni quinadsa
 odsa bodihuaji queriqquimana-
 dsa nahi Diodsa dada toqqimacca
 cacahuadedeni Jeso damade jai
 tojaraha Jeso jiraha bacco nani-
 manadsa tamededeni huati toquina-
 jari: –¿Nejecotohui teccanimana-
 jarajari? –quinahi nade. ⁴⁶Naraha
 cacahuadedeni huati toquinajari:
 –Jeso attipa deni tojadsa pina
 madija ohuaha attissa najaradsapa
 –nanimanahi nade. ⁴⁷Nadsapa
 pariseodeni cacahuadedenidsa huati
 toquinapomajari: –¿Tiadeni naqui
 Jeso tiadeni tocamaidsaqquijari
 itidija? ⁴⁸Naraha ¿jodiogenicca
 tamededeni Jesodsa jehe naja cama-
 jarico? Nohuerahi ¿Pariseodeni
 naco Jesodsa jehe naja cama-
 jarico? Nohuerahi. ⁴⁹Aja madija
 pohuadsa jahiridsajaridenipa iassa
 quina-jaraha. Pohuadenipa Dio
 Atti ssamoqquri nahi. Najidsohue
 jiquejeraniccadsa toquejenahitohui
 –quinahi nade.

⁵⁰Naraha aja pariseodeni ojarai
 oni Nicodemo dsome Jesodsa
 huatide tocchahuajarina pohua-
 denidsa huati tajari: ⁵¹– ¡Titahari-
 bobo canaji! Icca marinajapi ajima
 ihinanajaro: Madija pocca ima
 ecomera-jeraccadsapi idsahua-jara-
 ccahi. Tahidepa madija tahimari-
 tohui huati inaridsadsa, pocca
 ima nahato inadsa, tabaccora tahi
 ahuatato tadsana ihidsahua najari
 –nahi nade Nicodemo. ⁵²Naraha
 Nicodemodsa huati toquinajari:
 –¿Tia naqui Carireahuajicca tijaro
 nitidija? Carireacca imatohui Dio
 Atti hua timaninissa taji. Carirea-
 huajipa Dio Atti cacomerarquiri
 najarideni qqenaja cama-jaraha
 –quinahi nade Nicodemodsa.

⁵³Nadsapa poccadeni odsahuaji
 jai tojaniridsahi quinade.

**Amoneje maqqi cajiraha
 maqquideje ohuaha
 inajajaricca ima**

8 ¹Nadsapi ssono Oribohuaji Jeso
 toqqemoradsa pohuadsa jaije-
 morade. ²Huada ssiaya jaijedsippa-
 nidsapi Diodsa dada toqqimahuaji
 Jeso toqquedsimapomadsa madija
 ecahua-huajanimana najaride.
 Nahidsa Jeso huittaridsa madija
 mari icanabaqquijaride.

³Nahidsana jodiogenicca
 marinaja maridedeni, *marinaja
 pariseodsa jehe quinajarideni
 tedsejepa amoneje eccajona-
 manajaro. Ponipi maqqi cajiraha
 maqquideje ohuaha najade tojadsa
 qqui toquinadsapa johua icana-
 baquimanajari. Nadsapa amoneje
 dama quinadsa Jesodsa eccajona-
 manajaro. Jeso boronidsa mari mari
 nahihuaji inahuamana najarode.

⁴Nadsapa pariseodeni Jesodsa huati
 toquinade: –Mamaride, ajijaro
 amonejepi maqqi cajiraha maqqui-
 deje ohuaha inajahi qqui inadsa
 tiadsa eccajonajaro. ⁵Moisesicca
 marinajadsapi: “Amoneje maqqui-
 deje ohuaha najadsapi dsoqquena.
 Sibadsa tiquinaquimanaji” nade.
 ¿Naraha tettipi nejecoma tani?
 –quinade Jesodsa.

⁶Nama quinajaripa pohuadeni
 bodi: –Jeso ima dsori inanadsapi
 pohuadsa ima inassonarinijine
 –quinajari. Naraha Jesopa tocatte-
 dsada nadsa ssiquidsa pohua dsopedsa
 dsodo dsodo nade. ⁷Jesopa ssiqui-
 dsada dsodode tojaraha pariseodeni
 denima huati dsanapomanajaja
 Jeso totehemadsa pohuadenidsa

huati tade: –Jehe, tiquinaqqi-manaji. Naraha imasiri cappirajarina tahide siba ididsa iquinapona –nade Jeso.

⁸Nadsapa tocattedsanipomadsa ssiquidsa denima dsodode tojapomade. ⁹Naraha Jeso atti mittamanadsa bodideni huatodsapa maqquideje jadahidenina tahide toqquena, toqquena jicamana nade. Huapima naco jai tojenaha jicadsapa Jeso pohua, amoneje poni tadsajanira ba najaride. ¹⁰Nadsapa Jeso toتهمadsa aji amoneje huarodsapa huati tade: –Asi ¿nejecodsajidacca madija tia ccaccajondenipa? ¿Najarideni ojariapa imasiritinanani manaconi tiadsa: “Tia onanadsoquena” naja cama-jaraco? –nade Jeso. ¹¹Naraha Jesodsahuati tade: –Ohua Medsede, nohuera-paja –nade. Naraha Jeso ponidsahuati tapomade: –Jehe, ohua naqui tidsoqqeji onejerani. Nadsama ticcanina. Jidapapi maqquideje ohuaha naja tejerana. Imasiritinanapoma tejerana –nade Jeso.

Jeso ssiejenepa madija huapimadsa ahuatoridsajaro

¹²Jeso madija huapima mari icanabaqqipomajari: –Ohuapi dsama huapimadsa ossiejene ahuatoridsajaro. Madija ohuadsa toquejenaripa ossiejene cajimanahi. Ossiejene cajimanadsapacamittehe jiquejeranica naco cajimanahi. Nadsama camittehe jiquejeranica cajimanadsapaimasirica dsidsinidsa toquejenarajahitohui –nade Jeso. ¹³Naraha marinaja pariseodsajehe quinajari attideni Jesodsas: –Tia motta titahimari tetecomera najaro. Ia motta

itahimari ecomerani bica tejerani, inajaro –quinade.

¹⁴Naraha Jeso pohuadenidsahuati tade: –Jehe, ohua motta otahimari ohuacomerara huattipi pajissa. Ohuapi ohua occajonanihuaji nahato onani. Ohua jara onanihuaji naqui nahato onani. Naraha tiadenipi occajonanihuaji ssamoqquri tiquinani. Ohua jara onanihuaji naqui ssamoqquri tiquinani –nade Jeso. ¹⁵–Naraha tiadenipi ajijaro namidsa madimanajaridenicca marinajadsaramadijacca ima nattomede nahatoqquri tiquinajaro. Madijajine ima bica tejerani tiadenidsa ahuato tadsapi: “Pocca ima tabaccora tani. Icca marinajassa nejerani” titiquina naraha ohuapi nema onejerani. Madijacca ima nattome onejerani. ¹⁶Naraha ohua madijacca ima nattome onanijinepi ohua motta nattome onejerani. Occa Abi ohua Cadossede tedsejena madijadenicca ima nanattome ihinanajaro. Nema inajaropi madijacca imadsa: “Tabaccora tani” onadsapi ohuattipi pajissa. ¹⁷Naraha ticcadeni marinajadsodo nanidsapi: “Madija pamahaqqi toquinajari poccadeni ima najarossa najaro ecomeramanadsapipohuadeni attidsa pajissa tiquinaji” nade. ¹⁸Ohuapi ohua motta otahimari ohohuacomera naraha Abi ohua Cadossede naco otahimari ehecomera najaro –nade Jeso. ¹⁹Naraha Jesodsahuati toquina-pomade: –Ticca abipa ¿nejecohuajimadijari? –quinade. Naraha Jesopahuhuadenidsahuati tapomade: –Ohuadsa tinoccodeni jidsa tani, occa Abidsa naqui tinoccodeni jidsa tani. Ohuadsa tinoccodeni jidsera

tadsapi occa Abidsa naqui tinocconeni jidsera tanitohuiraha –nade Jeso.

²⁰Najaro imapi Diodsa dada toquimahuajicca dsiniro huahua-dsa baho cacahittidseri naridsani-huaji mari icanabaqquijaride. Nahidsapa Jeso dama quina-jaraccade, pohuadsa ima tojanijinecca huada bacco tejeraccadsa.

–**Ohua occaninihuaji jai
tijanijine tipajiramana-
jerani –najari**

²¹Naraha Jeso pohuadenidsa huati tapomade: –Ohuapi occaninitohui. Occanidsapi otohui qqi taridsamananitohui. Naraha ohua occaninihuaji jai tijanijinepi tipajiramana-jerani. Tiadenipi ticcadeni imasirima tijicanitohui –nade Jeso. ²²Naraha jodiodenipa: –¿Pohua nanadsoqquehijineco? ¿Nejecotohuira “Ohua occaninihuaji jai tijanijinepi tipajiramana-jerani” naha? –quinade.

²³Nadsapa Jeso pohuadenidsa huati tade: –Tiadenipi ajijaro namicca tiquejenani. Naraha ohuapi ajijaro namicca ojajerani. Ohuapi memehujajicca ojaní. ²⁴Aji ohuatti tiadenidsa: “Ticcadeni imasirima tijicanitohui” onajaropi ohuadsa pajissa tiquinejerajaro. Ohuapi aji huati huati onajaro ojaní onajarodsa pajissa tiquinejeradsa naqui ticcadeni imasirima tijicaridsanitohui, onajaro –nade Jeso.

²⁵Naraha manaco Jesodsa huati toquinade: –Tiapi ¿nejeco madija tijani? –quinade. Naraha Jesopa: –Ohuapi tahide otahimari tiadenidsa huati huati onajonajaro aji jidapana tiadenidsa huati huati

onajaropaji. ²⁶Nema nadsapi ticcadeni tabaccorehe huapima tiadenidsa huati onadsapi tiadenidsa ima ssonarinitohuiraha nema onejerani. Naraha ohua cadossejarina pajissa huati huati tajari. Pohuapa ohuadsa huati huati tahi omittadsana ajijaro dsamacca madijadsa huati huati ohoqquima najaro –nade Jeso.

²⁷Naraha pohuadenipa Jeso pocca Abi Diocca ima huati huati tajaripa mittamanahissa tajarajari. ²⁸Najarojine Jeso denima huati tapomajaride: –Ohuapi Madija Bedi ojajaro nidsa ahua porimacossanidsa ohua acca ticanamacossamanadsa que onanitohui. Nadsana nahatoqquri tiquinanitohui: Aji huati huati onajaro ojaní onajaropi pajissa. Ohua mottapi ohua jipa onanikka onana-jerani. Occa Abi ohua mari canadsana huati huati ohonanajaro. ²⁹Nadsama ohua Cadossedepa ohuadsa madihi. Occa Abipa ohua motta ojanijine ohua nebo-jarahi, huajjiradsa Pohuadsa bica tanicca ohonana nadsapi –nade.

³⁰Najaria Jeso huati huati tadsapa madija mota huapi taha pohuadsa pajissa quinajaride.

**Ohuahadenipa Diocca ejedeni
toquejenajari, ohuahadenipa
imasiricca medse toquejenajari**

³¹Nadsapa Jeso jodiodeni mota pohuadsa pajissa quinajaridenidsa huati tade: –Ohuattidsa disseraqquri tiquinadsapi pajissa occa tiquejenanitohui –nade. ³²–Occa tiquejenadsapi pajissehera nahatoqquri tiquinanitohui. Najaro pajissehe nahatoqquri tiquinadsapi tiadeni medse tabaccora tajaridsa

medse tiquejena-jeranitohui
–nade Jeso.

³³Naraha manaco Jesodsa huati toquinade: –Iapi *Abarahao potemahi iquejenajaro. Medse iquejena-jerehe nema inajonajaro. Naraha ¿nejecotohui iadsara: “Medse tiquejena-jeranjine” tajaro? –quinade. ³⁴Naraha manaco Jeso pohuadenidsa huati tade: –Pajissara tiadenidsa huati onana: Madija imasiri inana dsapi najaro imasiricca *medse tojajari. ³⁵Madija medse tojaripa pohua medsedecca medse tojaraha pohua medsededsa nama dsanapojara tahi. Medse tojaripa pina madija pohua pocca ejedenissa najarahi. Madijacca ejedenipa pocca abidsa nama dsanapojari. ³⁶Nadsama Dio Bedina tiadeni tappa tabaqquidsapa pajissa medse tiquejena-jerehe timadimananjine onajaro. ³⁷Jehe, tiadenipi Abarahao potemahi tiquejenani nahato onani. Naraha ohuattidsa pajissa tiquinejeradsapi ohua tinanadsoquemanabote nani. ³⁸Nadsama ohuapi occa Abi ohuadsa nohue inajarocca huati huati ohonanajaro. Naraha tiadenipi ticcadeni abi huati huati tataja nahi titimittamana najarora najarossa titinanamana najaro –nade Jeso. ³⁹Naraha manaco huati toquinade: –¿Icca abipa Abarahao! –quinade. Naraha Jeso huati tapomade: –Pajissa Abarahao potemahi tiquejenadsapi pina Abarahaojinessa tinanamannitohuiraha. ⁴⁰Dio pajissa ohua mari canajaricca tiadenidsa huati huati onajaroraha

ohua tinanadsoquemanabote nani. Abarahaojinepi ima nema nejerani. ¡Nohuerani! ⁴¹Naraha tiadeni naqui pina ticcadeni abijinessa tinanamanajaro –nade Jeso. Naraha manaco huati toquinajari: –¿Abi ohuaha icappirani! ¡Icca Abipa Diona ojarihi! –quinade.

⁴²Naraha Jeso pohuadenidsa huati tade: –Pajissa Dio ticcadeni abi tojadsapa nassa ohuadsa naqui tetideni huanaquiri nanitohuiraha nema tiquinejerani. Ohuapi Diohuaji occajonajaro aji omadini. Ohuapi ohua ehuerani occajonajeraraha Abi Dio ohua cadossedsa occajonajarode. ⁴³Naraha ¿nejecotohui ohuatti timittamananissa tejerajaro? Occa imadsa jiperaquiri tiquinadsapi aji timittamananissa tejerajaropaji. ⁴⁴Ticcadeni abipa Diocca huadi *Satana. Pohuadsa tiquejenani. Pohua jipa tahiccadsa disseraqquri tiquinajaropaji. Satanapa ijine ahuahijinera tohuattapoja najari. Pajissa huati tahijinepa ssamo tahi. Pohuapa maidsehe jinedeja najari. Najaria maidsehedsa huati huati nanaja najaripaja. ⁴⁵Najarojine tiadenidsa pajissara huati huati onaraha tiadeni naqui ohuadsa pajissa tiquinejeraropaji. ⁴⁶¿Nejecojarina imasiri ocajini ecomeranjine nahato tahi? Nohuerahi. Ohuapi pajissara huati huati onadsapi ohuadsa pajissa tiquinanijine bica taraha ¿nejecotohui ohuadsa pajissa tiquinejerajaro? ⁴⁷Madija Diocca quejenajaripa Dio Atti mittamanahijine jipaqquiri najaripaja. Naraha Diocca tiquejena-jeradsapi aji Dio Atti

mittade jiperaqu岸ri tiquinajaropaji
–nade Jeso.

**Cristopa tahide madipojari,
Abarahaopa dsotode**

⁴⁸Naraha manaco jodiodeni
Jesodsa huati toquinade: –Tiapi
*samaritano tijani. ¿Tiadsa jipera-
qu岸ri inani! Jidacca huati inapo-
jaropi pajissa. Tocarime ticajijaro
nahatoqu岸ri inani –quinade
Jesodsa. ⁴⁹Naraha Jeso huati
tapomade: –Ohuapi tocorime
ocappirani. Ohuapi: “Occa Abipa
deni tojahi” ohonanjaro. Naraha
tiadenipi ohuadsa: “Jesopa deni
tojahi” titiquina nejerani. ⁵⁰Naraha
ohuapi madija ohuadsa: “Deni
tijani” quinahijine tohuini onejera-
jaro. Naraha ojariana ohuadsa:
“Deni tijani” quinahijine jipa
tajari. Pihuana occa ima huapima
nahato tajari. Pihuana madijacca
ima huapima tocattejidsade nahato
tajari. ⁵¹Nadsama ohuapi pajissara
tiadenidsa huati onajaro: Ohuatti-
dsa iboraqu岸ri tiquinadsapi paji
tijjarini nejeranitohui –nade Jeso.

⁵²Nadsapa manaco jodiodeni
huati toquinade: –Jidapapi nahato-
qu岸ri inani tocorime ticajijaro.
Abarahaopa maittaccadsama
dsoqqepohui. Dio Atti cacomera-
qu岸ri najarideni naco jicaridsahi.
Naraha tia tettiapi: “Ohuattidsa
iboraqu岸ri tiquinadsapi paji
tijjarini nejeranitohui” taha.
⁵³¿Ajina tiapi icca idi Abarahao-
dsa deni tijjarorane? Abarahaopa
dsoqqepohui. Dio Atti cacomera-
qu岸ri najarideni naco jicaridsa-
pohui. Naraha tiapi tibodi: “Ohuapi
deni ojani” ¿tajaroqui? –quinade
Jesodsa.

⁵⁴Naraha Jeso pohuadenidsa
huati tapomade: –Ohua mottapi
ohua deni onanani pajira-gerani.
Naraha occa Abi ohua deni tonana-
dsana pajirani. Occa Abipa Dio.
Pohuadsa: “Icca Dio” tiquinaraha.
⁵⁵Pohuadsa ssamoqu岸ri tiquinani.
Ohuana Pohuadsa nahato onani.
“Nahato onejerani” onadsapi
mamaidsade ojani, pina tiadeni-
ssa onanitohuiraha. Naraha ohuapi
pajissa Pohuadsa nahato onajaro.
Pohua Attidsa naqui ibora onajaro-
paji. ⁵⁶Nadsama ticcadeni idi
Abarahaopa maittaccadsama occa-
jonanicca ima nahato tapodsapa
huatidsedsa otohui madijari. Pajissa
Diojine occaronani qqui tadsapa
huatidseri najaride –nade Jeso.

⁵⁷Naraha jodiodenipa Jeso-
dsa huati toquinapomade: –Tiapi
ticca huajano 50 bacco tajararaha
¿Abarahao qqui tinajarittaco?
–quinade. ⁵⁸Naraha Jeso pohua-
denidsa huati tapomade: –Pajissara
tiadenidsa huati onajaro: Ohuapi
Abarahao tosona-jaraccadsa tahide
omadipojarode –nade Jeso.

⁵⁹Nadsapa jodiodeni huadimana-
dsa siba nacca-cca quinade, Jeso
iquinaqu岸ri-manahijine. Naraha
Diodsa dada toqqumahuaji madija
huapi taja najari. Jesopa najari
madijadenidsa quejemadsa amossi
najaride. Diodsa dada toqquima-
huaji toqqunenajari.

**Jesopa nocco siri nama naha
tossonahi nocco ssire inanajari**

9¹Jeso itedseje ccaridsadsapa
maqu岸ri nocco siri qqui
inade. Najaripa nama naha tosona-
jari. ²Nadsapi ia pohua huatimade-
deni huati inade: –Ia Maride

¿nejecotohui ajajari maquidejepa nocco siri tossonajari? ¿Imehidenicca imasiri manaconico? ¿Pocca imasiri manaconirana? –nade.

³Naraha Jeso iadsa huati tade: –Pocca imasiri manaconi jarahi. Imehidenicca imasiri manaconi jarahi. Nama naha tossonajari, nahi dsotodepa Diocca nahatohuejine tobicahi ahuato tahijine.

⁴Nema nadsapi ssiaja taccadsama ohua cadossejaricca dosseniji idsepe ijina, onajaro. Nidsa dsomedasapi idsepe ijiniijine ssamo tani. Nidsa odsoquedsapi pina dsomejarossa nanitohui. ⁵Najaroa aji namihuaji omadiccadsapi ajijaro namidsa madimanajaridenicca ssiajani ojaccani –nade Jeso.

⁶Najaro ima huati taha jicadsapa Jeso pohua nassope namidsa ppito inadsa sica sica inadsa maquideje nocco siri nocco sse inajaride. ⁷Nadsapa Jeso nocco siri dosse inade: –Ajicca siba hui todsanicca passo onini Siroedsa tinocco ssahua tana –nade. (Siroe ettidsapi: Dosse tahi, inajaro.) Nadsapa toquedsippajari, pohua nocco ssahua nadsa pocca odsahuaji toccanidsapa nocco ssire taha toccanide. ⁸Nadsapa pohua inoricca madija, ohuahadeni tedseje nocco tobicahi qqui toquinajari. Pohuadenipa dsinirotohui huihuitta nahi qqui qqui toquina-poja najari pohua tahimari imahaha canajaride: –¿Ajajaripa danijitohui huihuitta najari jaraco? –quinade. ⁹Naraha madija ohuahapa: –Najari-dija –quinade. Naraha madija ohuahapa: –Najari jarahi. Pina najarissa najari –quinade. Naraha pohua attipa: –Jehe, ohuapi ohua –nade.

¹⁰Nadsapa pohuadsa huati toquinade: –¿Nejecoma tadsa tinocco ssire tajaro? –quinade.

¹¹Naraha pohuadenidsa huati tade: –Aja maquideje oni Jeso quinajari ssicarini inahatodsa onocco sse inajaropa. Nadsapa ohuadsa: “Ajicca passo Siroedsa tinocco ssahua tana” nadsa oquedsippadsa onocco ssahua onadsapi onocco ssire tajaropa –nade. ¹²Nadsapa pohuadsa huati toquinade: –Naraha najari maquidejepa ¿nejecohuajinaja? –quinade. Naraha: –Ssamo onani –nade.

**Marinaja onini pariseodsa
jehe quinajarideni nocco
ssire nimanihidsa huati
huati toquinajari**

¹³⁻¹⁴Jesopa jodiodenicca jassinajacca huadadsa ssicarini inahatodsa madija nocco siri nocco ssire inajarari. Najaro jassinajacca huadadsa nama najarijine madijadenipa nocco ssire nimanihi iaccamanajaride, marinaja pariseodsa jehe quinajaridenihuaji. ¹⁵Nadsapa najaridenina aja nocco ssire nimanihidsa huati toquinade: –¿Tia nejecoma tonanadsa tinocco ssire tajarotte? –quinade. Nadsapa: –Jehe, ssicarinidsa onocco sse inajaro. Nadsapi passodsa ssahua onadsa onocco ssire tajarodija –nade. ¹⁶Nadsapa pariseodeni mota attidenipa: –A, najari madijapa Dio icadosse-jarahi. Jassinajacca huadadsa: “Odsepe iji-gerana” najarahi –quinade. Naraha mota attidenipa: –Canahatori canadija bica tahi. Madija imasiri cajimanajaridenipa nama quina-jarahi –quinade. Nama quinaadsapa Jeso tahimarijine carobemanajaride.

¹⁷Nadsapa nocco ssire nimanihidsa huati toquinapomade: –¿Tiapi nejecoma tani tinocco ssire tonanadesapi? –quinade. Naraha nocco ssire nimanihhi attipa: –Ohuattipi Dio Atti cacomerabote, onajaro –nade.

¹⁸Naraha jodiodenicca taminedenipa Jesojine nocco ssire nimanihidsa: –¡Pajissa jarahitidija! Nadsama nocco bicahiraha –quinade. Nadsapa nocco ssire nimanihhi imehi imenidenitohui huahua quinade.

¹⁹Huedajonadsapa pohanidenidsa huati toquinade: –¿Ajajaripa ticcadeni ejedenico? “Najaria nocco siri tossonahi” ¿tiquinajarottaqui? Naraha jidapapa nocco ssire tajarirana –quinade. ²⁰Nadsapa imehi imenidenipa huati toquinade: –Ajajaripa icca ejedeni nocco siri tossonajaride nahatoto inani. ²¹¿Naraha nejecoma nadsa nocco ssire tajari? Ssamomo inani. Pohua nocco ssire tonanade naco ssamomo inani. Pohanadsara huati tiquinaji, pohanapa ejedeni jarahi. Pohanaha nahato tahi –quinade imehi imeni attideni.

²²Aja imehi imenidenipa cappinamanajarijine: –Pohanadsara huati tiquinaji –quinajaride. Jodiodenicca taminedeni atti nahatoto tapoja najari. Aja madija Jesodsa: –Najaripa pajissa Cristo-Mesia –nadsapa ettajohuitohui. –Icca Dio Atti mamarihuaji qquedsimapoma-jarahijine –quinapoja najari. ²³Najaria imehi imeni attidenipa: –Pohanadsara huati tiquinaji, pohanapa ejedeni jarahi –quinajaripajade.

²⁴Nadsapa jodiodenicca taminedeni nocco ssire nimanihhi pohanadsa huahua quinapomade. Ccajonadsapa pohanadsa huati toquinade: –Diopa tetti mittahi. Pajissara

iadsa huati tinaji. Iapi nahatoququiri inani: Najari maququidejepa imasiri jinede –quinade. ²⁵Naraha manaco huati tade: –Ohuapi ssamo onani. Imasiri cajihitide, caji-jarahitide. Ajijaro imana nahato onani ojarini. Tahidepi onocco siriraha jidapapi qqui onani –nade.

²⁶Naraha pohanadsa denima huati toquinapomade: –¿Tia nejecoma tonanajari? ¿Nejecodsara tinocco tonanabicajari? –quinade jodiodenicca taminedeni. ²⁷Naraha huati tapomade: –Nadsa huati onapohaha ohuatti timittamana-jerajaro. ¿Nejecotohui ima huati huati omacca nanitohui tiquinajaro? ¿Tiadeni nacqui pocca tiquejenanijinerane? –nade.

²⁸Nadsapa jodiodenicca taminedeni huadiedsa nocco ssire nimanihhi itamassomanadsa huati toquinade: –¡Tiapi najari maququidejepa tijana! Naraha iapi Moisesicca *mamari tabaqqi iquejenajonajaro. ²⁹Iapi Moisesidsa Dio huati tapojaripa nahatoququiri inani. Naraha najari maququidejedsapi nahatoququiri inejerani. ¿Nejecoma nahiccatta? –quinade jodiodenicca taminedeni.

³⁰Naraha nocco ssire nimanihhi huati tade: –¡A, ticcadeni ima jidsa tani! Pohua ccajonahihuaji ssamoququiri tiquinaraha, pohanapa onocco ssire tonanajari. ³¹Nahatoququiri inani: Aja madija imasiri cajijari attipa Dio mita-jarahi. Naraha madija Diodsa dissera tajari, Dio jipa tahicca inandana pohua atti Dio mittahi. ³²Maitta-ccadsama dsama nahatoponidsama maququideje nocco siri tossonahi nocco ssire inanamanahi ima ihmittajona nejerajarode. ³³Nassa najari maququideje Diocca jaradsapa ssamo tanaja –nade nocco ssire nimanihhi atti.

³⁴Nadsapa manaco huati toquinade: –Tiapi imasirima tissonaraha ¿nejecotohui iara ia mari ticanabaquijaro? –quina-dsapa nocco ssire nimaníhi mohua quinade: –¿Icca Dio Atti mamari-huaji tiqquedsimanipoma tejeraji! –quinade.

**Jesodsa pajissa quina-
jarajaridenipa pina
noccodeni sirissa quinajari**

³⁵Jodiodeni poccadeni Dio Atti mamaridsa nocco ssire nimaníhi qquedsimanipoma-jarahijine mohua quinahi Jeso mittajaride. Nadsapa pohua tedseje bacco tocanire-pomadsapa pohuadsa huati tade: –¿Tiapi Madija Bedidsa pajissa taqui? –nade. ³⁶Naraha nocco ssire nimaníhi Jesodsa huati tade: –¿Nejecojarina paja Madija Bedi? nani pohuadsa pajissa onanijine –nade. ³⁷Naraha Jeso pohuadsa huati tade: –Nadsa ohua qqí tinaha, ohuapi Madija Bedi ojani. Ohuadsa huati huati tinajaro –nade.


³⁸Nadsapa nocco ssire nimaníhi pohua nocco ssire tonanade bacco-huaji pohua pitodsa huitta nadsa: –Jehe ohua Medsede, tiadsa pajissa

onani –nade Jesodsa huatidse-dsa. ³⁹Nadsapa Jeso huati tade: –Ohuapi ajijaro dsamadsa occa-jonajaro madija huapimacca ima cattemade. Nahi noccodeni siripa noccodeni ssire onanabaquid-sa qqí toquinahijine. Naraha noccodeni bicahi qqí toquinajari-denipa noccodeni sirissa quina-hijine –nade Jeso. (Jeso atti nama najaripa pohuadsa pajissa quina-jarajaridenipa pina noccodeni sirissa quinajari.)

⁴⁰Naraha jodiodeni mota marinaja pariseodsa jehe quina-jari nahidsa queriiquimanajarideni Jeso atti mittamanajari. Nadsapa Jesodsa huati toquinade: –¿Naneje inocco sirirane? –quinade Jesodsa. ⁴¹Naraha manaco Jeso pohuadeni-dsa huati tade: –Nassa tinoccodeni siridsapi ticcadeni imasiri nohuera-nitohuiraha “Iapi inocco bicani” tiquinadsapi ticcadeni imasiri tiadenidsa jiquejeraccani –nade Jeso.

Edede cacahuadecca ima

10 ¹Nadsapa Jeso huati tapomade: –Pajissara tiadenidsa huati onajaro: Madijapa aja edede tadsaricca noccobijidsa



toquedsima-jaradsa noccobiji nohueranihuajina joppa todsima-jaripa bobotide. ²Naraha aja madija edede tadsaricca noccobijidsa toquedsimajaripa edede cacahuade pohua. ³Edede cacahuade edede tadsarihuaji bacco tadsapa pocca dodosse noccobiji icatabojidsa tani. Ededepa cacahuade atti mitta-mana tahi. Pocca edede onidenidsa huahua nadsapa iaquena-baqqui tahi. ⁴Nadsa pohuajine edede jahininedsa cacahuadepa tahide toja tahi. Ededepa pohuadeni cacahuade atti nahatoqquri nadsapa pohua natti jai toja tahi. ⁵Naraha madija ohuaha nattipa jai tojera tahi. Atti jidsa tadsa, pohuadeni cacahuade attissa najaradsapa domo tocca tahi –nade Jeso.

⁶Jeso edede tahimari huati tajaripa pocca madija tahimari huati, pohua tahimari huati taraha nahidsa madija domo huajari mitta-manaraha pohuadenidsa ssamo tajaro.

Jesopa edede cacahuade bicahi

⁷Nadsapa Jeso madija mittamana-hijine huati tapomade: –Pajissara tiadenidsa huati onana: Ohuapi edede tadsarihuajicca noccobiji ojani. Najaro noccobijidsapa edede jajahi tojedsima najari. ⁸Ohua occa-jona-jeraccadsapi bobotidedenina jahijonapojari. Naraha ededepa bobotidedenidsa huaribodeni siba-qquri najari –nade Jeso.

⁹–Ohuapi noccobiji ojani. Madija ohuadsa jajahidsima najaripa tossiejehe cajimanahitohui. Pohuadenipa pina occa ededessa quina-jari. Dsomepa edede pohuadeni tadsaridsa jajahi tojedsimani nadsa

cacahuadepa nahidsa ehacahua-baqqui najari. Ssiajapa cacahuade ehéquenabaqqui najari, dsero bicani jipamanahijine. Ohuapi occa madija ohuacahuabaqquihissa tajari –nade Jeso.

¹⁰–Aja bobotidepa botihijine, toponi nanadsoqquehijine, toponi tonatabaccorahijinera cca-jona tahi. Naraha ohuapi toponi tonassiajadera occajonajaro, madija bodidenidsa madie bicanicca cajimanahissa tahijine. ¹¹Ohuapi edede cacahuade bicahi. Edede cacahuade bicahipa pocca edededsa tossiejehe da ina tani. Pocca edede tocassiejerahijinepa pohuana pohua ccaccora tahi. ¹²Naraha madija ohuahapa manaconitohuira edede ecahuabaqquids dsomaji ccajonahi qqui tadsapa edede inebobaqqui... joppa tahi caji tahi. Pohuapa edede jinede jarajari. Nadsapa edede inebobaqquidsapa dsomaji edededsa ssonaridsapa motapa tojaribaqqui tahi. ¹³Aja edede cacahuade manaconitohuira tarabidsa najaripa edededsa huati huana tajararajijine inebobaqqui tahi –nade.

¹⁴⁻¹⁵–Naraha ohuapi edede cacahuade bicahi ojani. Nema onajaropi madija ohuadsa toque-jenaripa ohuacahuabaqquijari. Occa Abipa ohuadsa nocco jidsera tahi. Ohua naqui occa Abi Pohuadsa onocco jidsera tani. Najarossa najaro ohuapi occa edededsa onocco jidsera tajaro. Manaco occa edede ohuadsa noccodeni jidseraqquri najari. Nadsama ohuapi occa edede tocassiejerahijinepa ohuana ohua ohuaccoranijine. ¹⁶Edede ohuadeni naco huapi taha ocajini. Aja

tadsaricca jarahi. Najarideni naco ohuaccani-baqquihijine. Pohua-denipa ohuattidsa iboraqqiri nahi. Nadsapa cacahuade ojariadsana queriqquihijine. Nadsapa ojariqqi-manahitohui —nade Jeso. (Pohua atti nama najaripa madija jodio quejena-jarajarideni naco pohuadsa toquejenahijine.)

Jeso pohua dsoqquehicca ima

¹⁷ —Ohua ohuaccoradsa odsoqque-
raha occa camittehe ohuadsa
tojapomanitohui. Najaro ima onana-
nijine ibora onadsapi occa Abipa
ohuadsa huati huana tajari —nade.
¹⁸ —Aji odsoqquejaro naqui madija
ohuahajine jerani. Ohuana ohua
ohuaccoradsa ohua inanadsoqque-
mananitohui. Occa camittehe
ohuaccoranijine opajirani. Occa
camitthedsa bacco onanipoma-
nijine naqui opajirani. Ajijaro dosse-
nijipi occa Abijine —nade Jeso.

Ima inapamamanajaro

¹⁹ Nadsapa jodiodeni najaro ima
mittamanadsapa Jeso tahimari-
jine carobemanajaride. ²⁰ Nadsapa
mota huapima imahaha canade:
—¿Nejecotohui pocca ima imitta-
nijine? Satanacca dodosse tocorime
cajjari. Pohua bodi tossamo-
jaria —quinade. ²¹ Naraha madija
motapa: —Madija tocorime
cajidsapa atti nama najarahi.
¿Tocorimepa madija nocco siri
nocco ssire inana taco? —quinade.

Jodiodenipa Jesodsa huattajoqqiri najari

²² Dsadsajade bacco tadsapi
Jesopa odsa panani Jerosare-
dsa madijari. Nahidsa madidsapa

*jodiodenicca Dada toquima
Diocca tocajanipomajarrocca ejete
bacco tade. ²³ Nadsapa Jeso Dio-
dsa dada toquimacca boroni inidi
tetepini cajini onini Portico de
Saromodsas ccaridsajari. ²⁴ Nahi-
dsana jodiodenipa Jeso icahua-
hujanimanadsa huati icanaqqi-
manajaride: —¿Nejecoma nadsa
ticca ima nahatoqqiri inanijine?
Tiapi Cristo-Mesia tijadsapi iadsa
tia tecomeranissa taji, inajaro
—quinade.

²⁵ Naraha Jeso huati tade:
—Nadsa huati huati ohonaha.
Naraha tiadenipi jehe tiquine-
jerani. Aji ohonahato najaropi occa
Abicca deni tojehedsa ohonahato
najaro. Aji occa nahatoniji qqui
tiquinadsapi najarojinea aji occa
ima nahatoqqiri tiquinajaro-
paji. ²⁶ Naraha tiadenipi pajissa
tiquinejerani. Occa edede tique-
jena-jerajaro. ²⁷ Occa ededepa
ohuatti nahatoqqiri nahi. Manaco
ohua naqui pohuadenidsa onocco
jidsera tani. Pohuadenipa ohuadsa
jahiridsajari. ²⁸ Ohuapi pohuadeni-
dsa camittehe jiquejeranicca da
onaridsajaro. Pohuadenipa paja
dsoqquemanari-jarahitohui. Pohua-
denipa ohuacahuabaqquihissa
tajari. Odsepeccapa idinibaqqi-
mana-jarahitohui. ²⁹ Aja ohuadsa
toquejenajaridenipa occa Abina
ohuadsa inanaridsajari. Occa Abina
deni tojajari. Naraha huapima
motadenipa ajamani toquejenahi.
Abi pohua dsepedsa toquejena-
dsapa idinibaqquimana-jarahitohui.

³⁰ Ohua occa Abi tedsejepi pina
ojariassa inajaro —nade Jeso.

³¹ Nadsapa jodiodeni siba
nacca-cca quinapomade Jeso

iquinaqqui-manahijine. ³²Naraha Jesopa pohuadenidsa huati tade: –Occa Abicca dacorehema madijadsa ima bicanira onanaridsa-jaro qqui tiquinajaroa. Naraha ¿nejecoma najaro occa nahatonijiacconi ohua tiquinaqquimananijine? –nade Jeso.

³³Naraha jodiiodeni huati toquinade: –Ticca nahatoniji bicani acconipi tiadsa edijerani. Naraha Diodsa tettiopi oppina tajaroinena “Tia iquinaqquina” inajaro. Tiapi madija tijaraha “Dio ojani” teteje nadsa –quinade jodiiodeni.

³⁴Naraha Jeso pohuadenidsa huati tapomade: –Maittaccadsama Diopa madija ima cacattemadede toquejenajaridenidsa huati tajari. Pohua Atti pohuadenidsa: “Tiadenipi diodeni tiquejenajaro, ohonanade” nahi nade Dio Pohua Atti dsodo naniccadsa. ³⁵Aji Dio Atti dsodo naniccadsa nahatoqquri inani. Najarodsa: “Maidsehe” inanijine oppina tani. Diopa pocca dosseniji cajimanajaridenidsa huati tajari. Pohuadenidsa: “Tiadenipi diodeni” nahi nade Dio. ³⁶Naraha Diopa ohua tocattejidsadsa ajiijaro namidsa ohua dosse naronajari. “Ohuapi Dio Bedi ojani” onajaroraha ¿nejecotohui ohuadsa: “Tettiopi oppina tani Diodsa” tiquinajaro? ³⁷Occa nahatohue pina occa Abijinessa nejeradsapi ohuadsa pajissa tiquinejeraji. ³⁸Naraha occa nahatohue pina occa Abijinessa nadsapi najarodsana pajissa tiquinaji. Ohuattidsa pajissa tiquinejeraranidsa tibodideni huatonissa tadsapi occa ima ahuato tanitohui. Abipa ohuadsa, ohuapi Abidsa, iapi pina ojarijarissa inajaro –nade Jeso.

³⁹Nadsapa Jeso dama quinapomahitohuiraha toqquenadsa dsoritarajide.

Jeso toccanijari hueni Jordaohuaji

⁴⁰Nadsapa Jeso hueni Jordao jippehuaji toccanipomajari. Nahidsa Huano madija topa topa ihidsanabaquipo nahidsa ibojaride. ⁴¹Nahidsa madidsapa madija huapi taha Jeso qquide jai tojajari. Nahidsana Huano Baotista tahimari bodideni huatoma-manadsa imahaha canajaride: –Jehe, pajissa. Huanopa canahatori cana-jararaha pocca huatinajapi Jeso tahimari huati tapossa nadija –quinade.

⁴²Nadsapa nahidsa Jeso pohuadsa madija huapi taha pajissa quinarajide.

Lasaro huatijari

11 ¹Odsa capamema najaro onini Betaniadsa madija coma taha madijari onipa Lasaro. Nanidsapi Maria poni onihi Marta tadsajani madimanajarode. ²Najaro Maria Lasaro caripenepi majojodsa Jeso amori capamehe ssohoho icanaridsa poni tatini conanidsa amori sse sse ihippi najaro. ³Nadsapa Lasaro coma tadsa caripenedeni Jesodsa ima dosse inajonamanajarode: –Pohuadsa teti huana tajaro coma tahi –quinade. ⁴Najaro ima Jeso mittadsapa huati tajari: –Lasaro coma tajaripa paja dsoqquerihijine jarahi. Najaropi Diocca deni tojehe ahuato tanijine, Dio Bedicca deni tojehe naqui ahuato tanijine –nade. ⁵Jesopa Martadsa, Mariadsa, Lasarodsa huati huana tajari. ⁶⁻⁷Naraha Jeso

–Lasaro coma tahi –mittadsapa nahi pohua madihidsa najocajari. Huada pamehe tossoniqquimadsana Jeso pohua huatimadedeni iadsa huati tade: –Jina, Lasaro qquide jodiodenicca dsama Jodeahuaji jaijapomana –nade.

⁸Naraha pohuadsa huati inade: –Ia Maride, maittadsama onihima nadsa nahihuaicca jodiodeni attidenipa: “Sibadsa tia iquinaquina” quinade. ¿Nanihuaji ticcanipomanijinequi? ¡Paji, tidsoqquerana! –inade. ⁹Naraha Jeso attipa: –Nohuerani. Huada ojarie maji ssiejene 12 horas cajjaro. Maji ssiejene ssiaja tadsa iccaridsadsapi emori doi cana-gerani, dsama ssiaja tajarjone. ¹⁰Naraha dsomepi dsidsi tani. Dsome iccaridsadsapi emori doi cana tani –nade.

¹¹Nadsapa denima huati tapomade: –Itesse Lasaro huadara huahua onadsa nocco tojahitohui –nade. ¹²Naraha Jesodsa huati inade: –Ia Maride, Lasaro huadadsapa nidsa tonomihitohui –inade. ¹³Jesopa Lasaro huatiahicca imana huati taraha ssamoqquri inadsapi: –Lasaropa huadajari –inajarode. ¹⁴Imittanissa tejeradsapi Jeso iadsa huati nimanjaride: –Lasaropa huadahi onaraha huada-jarahi, huatiajari. ¹⁵Naraha nanihuaji omadi-jeradsa huatiadsapa epeje, bica tani. Ohuatidsejaro. Nani tiadeni qqitiquinadsa ohuadsa pajissa tiquinanijine. Jari, jidapanana nanihuaji jaijana –nade. ¹⁶Naraha Tomas, pohua tessedeni pohuadsa: Baba quiquinanajaria iadsa huati tade: –Jina, ia naqui nani jaijana, pohuadsama ijica nana –nade.

Jesopa nahatonie jinede camittehe jinede najari

¹⁷Nadsapi odsa onini Betaniasa bacco inanipomade. Nanidsa bacco inanidsapi Jeso ima mittajaride: –Lasaro ppa idsamannahicca huadapi 4 nani –quinade. ¹⁸Betaniapi odsa panani Jerosaredsa huajira tajaro, dsidsidasmassa babacco. ¹⁹Nema najaro jodiodenipa Maria Martadenicca odsahuaji jajahi toja najari, huatinideni inassonabaquimananijine. ²⁰Marta –Jeso ccajonahi –quinahi ima mittadsapi qqunadsa iaccanijine ccajonajaro. Naraha Mariapi nani odsa bodidsa ibojaro.

²¹Marta Jeso bacco inadsapa pohuadsa huati tade: –Ohua Maride, ajidsa timadidsapi ohueme-cote dsoqqe-jaranaja. ²²Naraha nema nehe Diodsa huati tinadsapi ticca huatinajassa inananitohui nahato onani –nade Marta Jesodsa. ²³Naraha Jeso attipa: –Timecote nahatonihitohui –nade. ²⁴Naraha Marta huati tade: –Jehe, nidsa dsama jicadsa jicapojarideni huapima assiredenima Dio inahatonibaqquihitohui. Nahidsa Lasaro naco nahatonihitohui. Najaro imapi nahato onaponi –nade Marta.

²⁵Naraha manaco Jeso Martadsa huati tade: –Ohuapi nahatonie jinede oiani. Ohuapi camittehe jinede oiani. Ohuadsa jehe quina-dsapa jicaraha ojine camitte-manimana-pomahitohui –nade. ²⁶–Ohuadsa jehe quinajaridenipa paja jicarihi najarahitohui. Jicaraha nahatonimanadsapa

madimana-dsanapohuitohui.
 ¿Najaro imadsa pajissa taqui?
 –nade Jeso Martadsa. ²⁷Nadsapi
 Jesodsa huati tade: –Jehe ohua
 Medsede, nahato onani tiadsa.
 Tiapi *Cristo-Mesia, Dio Bedi
 tijani, aji namihuaji ticcajona-
 nitohui quiquinanapode –nade
 Marta.

**Lasaro pohua noccobirihuaji
 Jeso ojijari**

²⁸Nadsapi Marta Mariatohui
 odsahuaji toqqedsimanidsapi
 ahuatoranidsa Mariadsa huati
 tajaro: –Ia Maride bacco najonahi
 titohui huahua napaja –nani nade.
²⁹Maria ima mittadsapi totehema,
 qqenadsa Jeso qquide ccajonajaro.
³⁰Jesopa ponidenicca odsahuaji
 bacco tajaracchahi. Nahi Marta poni
 bacco inahidsa madiccade. ³¹Jodio-
 deni Maria poni huatini ina-
 ssonamananijine ponicca odsadsa
 queriquimanajaridenipa toccani
 qqui toquinadsapa nattini jahijona-
 jaride, –Lasaro cahuahihuaji
 ojide toccajaro nitide –quinadsa.
³²Naraha Maria Jeso huahihuaji
 bacco nadsapi poni pitonidsa huitta
 nadsa pohuadsa huati tade: –Ia
 Medsede, ajidsa timadidsapi nassa
 ohuemecote dsoqqe-jaranaja
 –nade.
³³Nadsapa Jeso Maria oji oji nani
 qqui, jodiodeni ponidsa jahijona-
 jarideni oji quinahi qqui tadsapa
 badi qqedsajaride. ³⁴Nadsapa
 Jeso pohuadenidsa huati tade:
 –¿Nejecohuaji tequibedsamanatta?
 –nade. Nadsapa: –Jina, qqui tajo
 –quinade. ³⁵Nadsapa Jeso ojide.
³⁶Nadsapa jodiodeni: –A, pajissa
 Lasarodsa huati huana tajariraha

–quinade. ³⁷Naraha jodiodeni
 motapa imahaha canade: –Jeso-
 jinepa nocco jijirade nocco ssire
 nimanide. Jeso ajadsa madidsapa
 nassa Lasaro dsoqqe-jaranaja
 –quinade.

Lasaro nahatonijari

³⁸Naraha Jeso bodi qquedsa-
 pomadsapa Lasaro noccobirihuaji
 toqqessijari. Pohua noccobiripi
 ssono bacconidsa tohuajarode.
 Noccobiridsapi siba huacossajaro.
³⁹Naraha Jeso: –Siba cco tijidsa-
 manaji, tohuabanijine –nade.
 Naraha aja dsoqqejaricca asi
 Marta attinipi: –A, ia Medsede,
 pohua dsoqquehicca huada 4
 najaro. Bettene jirahi –nade.
⁴⁰Naraha Jeso attipa: –Tiadsa huati
 huati onapode. ¿Timitta-jerajarotta-
 rane? Pajissa tadsapi Diocca deni
 tojehe qqui tinanitohui, ohonanade
 –nade Jeso.
⁴¹Nadsapi siba cco ijidsamanade.
 Nadsapa Jeso memehuaji tocatta-
 macossa nadsa huati tade: –Abi,
 ohuatti timittadsapi epejeni
 bica tani, onajaro. ⁴²Huajijira-
 dsa ohuatti titimitta nani nahato
 onaraha ajadsa madija madi-
 manajarideni ohuadsa: “Pajissa
 Diocca dosse naronaniji” quina-
 hijine tiadsa nema onajaro –nade.
⁴³Nadsapa Diodsa huati taha
 jicadsapa jadsirema huahua nade:
 –¡Lasaro tiqqenaji! –nade.
⁴⁴Nanaja Lasaro huatiaraha Jeso-
 jine camittemanidsa qqenade.
 Assire eterodsa jore tamarohua
 nama naha qqenade. Pano naco
 eterodsa teppe nade. Nadsapa Jeso:
 –¡Dicca tiquinajo, toccanijijine!
 –nadsa nama inanamanade.



**Jeso todsepe tojahijine
ima najoramanajari**

Mateo 26.1-5; Maraco 14.1-2;

Roca 22.1-2

⁴⁵Nadsapa jodiideni Mariadsa queriquimanajari motapa Jesojine Lasaro camittemanihi qqui toquinadsa Jesodsa pajissa quinade. ⁴⁶Naraha motadeni Jesodsa jiperaqqui najaridenina marinaja pariseodsa jehe quinajaridenihuaaji jai tojajari. Jesojine Lasaro camittemanihicca ima pohuadenidsa huati toquinajari. ⁴⁷Nanaja pariseodeni, dada toquimade taminedenipa najaro ima mittamanadsapa poccadeni *ima cacattemadedeni deni toquejenajaridenidsa huahua quinajari, pohuadenidsa queriquimanahijine. Queriquimanadsapa pohuadenidsa huati toquinajari:

—¿Iapi nejecoma inapadseje? Jeso canahatoriri canahi. Pocca deni tojehe ahuato tani —quinahi nade.

⁴⁸—Naraha Jeso nama dsanapohijine inebodsapa huapima pohuadsa pajissa dsanapomanahitohui. Nema nadsapi icca dada toquimahuajipi romanodeni botta icanamananitoahui. Icca dsamacca icca cacahuehe inajicamananitoahui —quinahi nade.

⁴⁹Naraha ima cacattemadedeni ojaría onipa Caipa, najarina najari huajanodsa dada toquimadedenicca tamine deni tojajari madijari. Pahuapa huapimadsa huati tajari: —¡Tiadenipi ssamoqqui tiquinani! ⁵⁰Tibodidenidsa ajiaro ima ahuato tejerani: Madija ojaría huapima manaconedeni dsoqquehina bica tahi, ia icca dsamacca huapima naco inajicamana-jeranjine —nahi nade Caipa.

⁵¹Naraha najaro imapi Caipa pohua mottacca jerani. Pohuapa dada toqqumadedenicca tamine deni tojajarijine Dio Corime pohuadsa huati tajari. Caipa pohua attidsapi Jeso tahimari iadsa ahuato tajaro. Najaroa aji Jesopa pocca madija jodiodeni huapima tocassiejerahijinepa dsoqquehitohui.

⁵²Naraha Jesopa jodiodeni pohuadeni motta manaconedeni tojahijine jarahi. Huapima Diocca madija madiridsamanajarideni manaconedeni naco tojahijine. Nadsapi Diocca ejedeni madiridsamanajarideni ijariquinissa tanijine.

⁵³Nadsapi najaro huadadsa, aja Caipa atti: –Jehe dsoqquehi bica tahi –nadsa ima cacattemadedeni huapima Jeso dsoqquehijinecca ima idimamanapodsapa ima najoranijine imahaha imahaha cadsanapojari.

⁵⁴Jeso ima nema nani mitta-dsapa jodiodeni madimanahihuaji ahuatonidsa ccaridsade jipera tajari. Nadsapa Jodeahuaji nebo, odsa onini Efrainhuaji madihijine toccajaride. Efrainpi dsama huamoni ssono caji, siba caji tani huajira tanidsa anijarode. Nanidsana ia pohua huatimadedeni Jeso tedseje imadijarode. ⁵⁵Nanidsa imadidsana jodiodenicca ejete imenibote onini *Pascoa tohuajirajarode. (Pascoa ettidsapi: Dio tossoquimajari, inajaro.) Nahi Jerosaredsa madija dsama onihicca, dsama onihicca jahijonana canajari. Diodsa da quina-hijine queriquini-pomajari, ejete Pascoatohui najoramanapohuijine.

⁵⁶Madija –Jeso qqui inana –quina-dsapa Jesotohui qqui naridsamanajari. Diodsa dada toqqumadsa naco pohuadenira huati tocanirere

canajari: –¿Ejetedsa Jesopa ccajona-jarapadsaja? –quinahi nade.

⁵⁷Naraha pariseodenipa dada toqqumade taminedeni tedseje attideni najoramanapoja najari: –Jeso qqui tiquinadsapa iadsa huati tiquinana, nahi dama inahijine –quinajari nade.

Jeso amori majojods Maria sso icanarijaro

Mateo 26.6-13; Maraco 14.3-9

12 ¹Jodiodenicca ejete onini Pascoa tohuajirajonadsa huada 6 nehe dsori taccadsapi Jeso inadsa odsa capamema najaro onini Betaniadsa bacco inani-pomade. Nahidsapa Lasaro madijari. Pohuapa dsoqqueraha Jeso pohua inahatonijaride. ²Nahi Betaniadsana Jeso jipahijine najoramanajari. Lasaro caripene Martapi dsamatapa qquerode tojajaro. Lasaropa huahuanarihuaji jassi tarijaridenidsama Jeso tedseje jipamanajaride. ³Naraha Lasaro caripene onih Mariapi majojo majoni bica tajarods Jeso amori ssohoho icanarijaro. Najaro majojo oninipi nardo. Najaro majojopi passods quejemerani, huatini ccara tani. Nadsapi poni tatini conanidsa amori sse ippijaride. Odsa bodidsa majojo majoni tocca nade.

⁴Naraha Jeso huatimade ojaria Joda Iscariote Jeso ccaccorede tojahijine pohua attia: ⁵ –¿Nejecotohui najaro majojopi manaconitohuira da icana-jerajaro? Najaro majojo manaconidsa da icanadsapi dsiniro ccarara 300 *denario iadsa da inadsa madija cappiramanajaridenidsa da iquimanitohuiraha –nade Joda.

⁶ Joda atti nama nadsapa pina cappiramanajaridenidsa huati huana tajarissa naraha pohuapa dsiniro-tohuira bodi huatojari. Pohuana botijide rajari. Pohuadeni huapimacca dsiniro pohuana ecahuaraha motapi pohuadsa ihinana najaro. ⁷ Naraha Jeso attipa: –Epejina, poni sso icanarijaro bica tani. Najaropi pina odsoqquedsa ohua nema inamanadsa ohua ppa idsamananijinessa najaro najorapojaro –nade. (Jodiodenipa poccadeni madija dsoqquedsapa nama quiquinanajari.) ⁸ Nadsapa Jeso denima huati tajari: –Madija cappiramanajaridenina tinoridenidsa madimana-dsanapohuitohui. Naraha ohuapi tiadenidsa omaidisanapojeranitohui –nade Jeso.

–Lasaro naco dsoqquena
–quinajari

⁹ Jeso Betaniadsa bacco nanipomahi jodiodeni mittamandsapa mota huapi taha Jeso qquide jahijonajari nade. Jeso qquidea ojari-jarahi. Lasaro qquide naco jahijonajari. Lasaropa Jeso pohua inahatonija najari. ¹⁰⁻¹¹ Lasarocca imajine jodiodeni motapa Jesodsana pajissa quinajari nade. Nama quina-dsapa *Diodsa dada toqquimahuajicca taminecca imadsa apaja quinajari. Nadsapa dada toqquimade tamedenedi attipa: –Lasaro naco dsoqquena –quinahi nade.

**Jeso Jerosaredsa bacco
todsimadsapa huapima
pohuadsa huatidsemanajari**

*Mateo 21.1-11; Maraco 11.1-11;
Roca 19.28-40*

¹² Nadsapi ejete onini Pascoatohui madija dsama onihi onihipca naco

Jerosarehuaji jahijonana canajari. Huada ssiajapa ima mittamanajari: –Jeso aja Jerosaredsa bacco nabote nahi –quinadsa huatidsemanajari. ¹³ Nadsapa poccadeni huatidsehe bica tanijine birijari eppe ti quina-dsa –Jeso bacco ijidsana –quina-dsa jahijonajari. Madija motapa birijari eppepsa jahui bina inajonamanajaro, –Jahui bica tanijine –quinadsa. Madija motapa birijari eppe dsojojo dsojojo canajonadsa huahua najonamanajari: –¡Diopa deni tojahi, deni tojahi! ¡Ja Medsede onima ccajonajaridsa biquehera tojana, tojana! –najonamanajari. –¡Pohuapa ia Isaraerj potemahideni icca tamine! ¡Pohuadsa biquehera tojana, tojana! –najonamanajaride.

¹⁴ Jesopa jahuidsas bojo namidsadsa qqui tadsapa najaridsa tohuittari-dsanapojaride. Najaropi pina Dio Atti cacomerabote Sacaria dsodo inapojarossa najarode:

¹⁵ –Odsa panani *Siohuaji timadimanajaropi ticappinamana tejeraji. Ajana ticcadeni taminepa bojo namidsadsa napidsatidsa bacco najonahitohui –napojaro Dio Atti dsodo nanidsa.

¹⁶ Najaro imapi Dio Atti dsodo napojarodsa ahuato taporaha tahide ia pohua huatimadepi ibodidsa ima ahuato tejeraccade. Dsotodena Jeso porimacossanidsa dsoqquedsa nahatonihni nattina Dio Atti dsodo napojarocca ima ibodidsa ahuatomajarode. Nadsana ettipi: –Jehe, nema najaropi Jeso pohuadsana tojani qqui inapode –inajarode.

¹⁷Madijapa Lasaro ppa todsaraha Jeso huahua nadsa nahatoni-jari qqui toquinajaridenipa pohua tahimari huati nimanimana-pomajaride. ¹⁸Nadsapa madija huapimapa: –Jeso jahuidsa bacco ijidsana –quinadsa Jesotohui jahijonajari. Pohuadenipa –Jeso canahatori canahi –quinahi ima mittamanapoja najari. ¹⁹Naraha jodiodeni mota marinaja pariseodsa jehe quinajaridenipa pohuadeni ehuerahi imahaha canajari nade: –Ajina, iapi ijoneridsani taji. Pohuaha deni tojahi. Madija huapima pohuadsa toquejenahi –quinahi nade.

**Dsama Cresiahuajicca
madijapa: –Jeso qqui
inana –quinajari**

²⁰Dsama Cresiaccia madija sibera taha naco Jerosaredsa bacco najonamanade. Najarideni naco Pascoacca ejetedsa Diodsa huatidsemanahijine jahijonajaride. ²¹Jeso huatimade Feripe bacco quina-dsapa pohuadsa huati toquinajari. Feripepa dsama arobeni Carireacca madija. Odsa Besaidadsa madijari. Nadsapa pohuadsa huati toquinajari: –Jeso qqui inana –quinahi nade. ²²Nadsapa Feripe pohua tesse Adiritohui toccajari, Cresiadenicca ima huati tahijine. Nadsapa Jeso madihihuaji ima huatide tohuedajari.

²³Nadsapa Jeso pohuadenidsa huati tajari: –Aji ohuapi Madija Bedi oजारoa occa deni tojehe ahuato tanijinepi tohuajirani –nade. ²⁴–Jehe, pajissara tiadenidsa huati onajaro: Aroso jidsadsa trigo nocco namidsa dappo

tiquinadsapa imepa bote tahi. Nocco namidsa tojadsa moro tahijine accora tadsapa pohua ime boteraha bodicca moro tajarina nocco tohuapi tahi. Naraha nocco pohua ime acco tadsapa bodicca moronine-jarajari –nade. ²⁵–Madija naco pocca madie ajijaro namiccadsa huati huanera tadsa ohuadsa eccoradsapi Diohuaji camittehe jiquejeranicca caji-dsanapohuitohui. Naraha madija pocca madiedsa huati huana tadsa ohuadsa acco tadsapa camittehe jiquejeranicca caji-jarahitohui. ²⁶Madija occa dossenijidsa iboraqquri nadsapa ohua nebomana-jarahijine. Ohuadsa jahiridsadsanapohuijine. Ohua omadindisana pohuadeni naco madimana-hijine. Madija occa dossenijidsa iboraqquri najaridenipa Abi Dio Pohuana pohuadenidsa: “Bicaqquri tiquinani” nahitohui –nade Jeso.

**Jesopa: –Odsoqueedsana ima
bicani tojaridsanitohui –najari**

²⁷Amadsati Jesodsa ocasserehe ssonaridsa pohua attipa: –¡Jaho, ojabojeriri canani! ¿Nejecoma onanijine? “Abi, ajijaro ima bacco tabote nani ohua tinassiajaji” ¿onanijinequi? Naraha ohuapi ajijaro imatohui occajonajarode. ²⁸¡Abi, ticca deni tojehera ahuato tana! –nade. Naneje memehuaji atti mittaronade: –Ohuapi occa deni tojehe ahuato onanapode. Jidapana naqui occa deni tojehe ahuato onanapomanijine –nade atti memehuaji. ²⁹Nadsapa nahidsa madija domo huajari huapima mohuini mittamanadsapa: –Ttottorode –quinaraha motapa:

–Dio Atti ccaccaronade pohuadsa huati huati tajari –quinade.

³⁰Naraha Jesopa: –Najaro mohuinipi ohua omitteranijine jerani. Tiadeni timittamananijine mohuini mittaronajaro. ³¹Ajijaro dsamacca ima tabaccora tadsapi Dio idsahua-baqquihitohui. Najidsohue naqui najorahitohui. Ajijaro dsamacca tabaccorehe dodossede Satanapa huahuattajo tojahitohui. ³²Naraha nidsa madijajine que onadsana madija huapimapa ohuadsana toquejenahitohui –nade Jeso.

³³Najaro ima Jeso huati tadsana ahuatomajarode, pohua ahua porimacossanidsa dsoqquehicca ima.

³⁴Naraha madija ohuaha attidenia: –Icca Dio Attidsa hua inadsapi “Mesiapa madi-dsanapohuitohui” nanipi imittade. Naraha tiapi: “Madija Bedi acca icana-macossa-manadsapa que tahitohui” teteje naha. Nadsapa ¿nejecoma najarina Madija Bedi? –quinade.

³⁵⁻³⁶Naraha Jeso attia: –Ohuapi ssiajani ojani. Ossiejene tiadenidsa ahuato taccani. Naraha tiadenidsa badsira tehe omadiccani. Tiadenidsa omadiccadsama ohuadsa jehe tiquinaji, ohuadsa tiquejenanijine. Najaro imapi ssiaja taccadsama jai tijaridsaji. Nani dsidsinijine tijabojo mana nejeranijine. Aja madija dsidsinidsa ccaridsadsapa pohua jahine ssamo tahi –nade.

Najaro ima Jeso huati huati taha jicadsapa pajamarahihuaji toccajari, madija pohua qqui toquina-jarahijine.

Jodiodeni motapa Jesodsa pajissa quina-jarajari

³⁷Jodiodenipa pohuadeni noccodsa Jeso canahato-huajapohui

canaridsahi qqui toquinaraha pohuadsa pajissa quina-jarade.

³⁸Nama quinajaripa pina Dio Atti cacomerabote Isahia dsodo inapopjarossa inanamanajaro. Isahia attipa:

–A, ia Medsede, icca imadsa pajissa naja cama-jarahi. ¿Nejecojaridenidsana Diocca dacorehe ahuato tapadseje? –napohui nade.

³⁹Jehe, jodiodenipa Jeso canahato-huajapohui canahi qqui toquinaraha pajissa quina-hijine bodideni ssamoqquri nade. Isahiapa poccadeni ima onihi naqui dsodo inapojaro:

⁴⁰–Diopa noccodeni ecossabaqquijari, qqui toquina-jarahijine.

Diopa bodideni inassamobaqquijari, tohuattamanajarahijine.

Dio Attipa: “Bodideni cacajiquimeradsapa onabica-baqquihitohuiraha bodideni cacajiquimera-manaha najarahi”

–napohui nade Isahia dsodo inapojaro.

⁴¹Isahiapa Jesocca deni tojehe qqui tapodsapa tahimari dsodo inapopjaropaji.

⁴²Naraha jodiodenicca tamideni motapa Jesodsa pajissa quinaraha marinaja pariseodsa jehe quinajarideni noppine pohuadeni cacomamanajari, –Icca Dio Atti mamarihuaji ia tohuattajobaqqi-manarana –quinadsa. ⁴³Pohuadeni bodipa: –Madija iadsa huatidsemanana –quinajari. Dio pohuadenidsa huatidsehijine tohuini quina-jarajari.

**Jeso attidsa iboqquri
najaridenipa najidsohuedsa
toquejenahitohui**

⁴⁴Nadsapa Jeso jadsirema huati huati tade: – Ohuadsa pajissa najaripa ohuadsaha pajissa nahi ojari-jarahi. Occa Abi ohua dosse naronajaridsa naco pajissa najari. ⁴⁵Madija ohua qqui tararipa ohua Dosse naronade naco qqui tahi. ⁴⁶Ohuapi ssajani jinede ojani aji namihuaji occaronajaro, ohuadsa pajissa quinajaridenipa dsidsinidsa madimana-jarahijine. ⁴⁷Naraha madija ohuatti mittamanaraha pina ohuatti mittamanerahi najarideni naco odsahuabaqqi-jarahi. Ohuapi madija dsahuade occarona-gerade. Madija tocassiejerahijinera occaronajarode. ⁴⁸Madijapa ohuadsa huattajoqquri najari. Ohuatti mittamanaraha iboqquri nadsapa dsama jicadsa Abi Dio imasiri manaconi huatide tojadsapa pohuadenidsa ajama nahitohui: “Tiadenipi occa ejedeni atti mittade jiperaqquri tiquinadsapi najidsohue jiquejericcadsa tiquejenanitohui” nahitohui. ⁴⁹Naraha ohuapi ohua mottacca ima huati huati ohona nejerani. Abi ohua Cadossedena: “Ajima najaro ima mari ticanabaqquina” nadsa huati huati onajaropaji. ⁵⁰Naraha ohuapi nahato oneje najaro. Abi pocca dossenijipi camittehe jiquejericca. Aji huati huati onajaropi Abi ohua cadossejaricca –nade Jeso.

**Jeso pohua huatimade
amorideni ssahua inabaqqijari**

13 ¹*Pascoacca jipacqueie tojanijine huada ojarie dsori taccaraha Jesopa pohua

tedsejemacca ima nahato tapo-jari: ajijaro namidsa madide nebohujijinecca huada bacco tabote nani. Ajijaro nami inebodsa Imehihuaji tojanipomahijine. Jesopa pocca madija ajijaro namidsa madimanageridenidsa huati huana taha nama najonajaria pohua dsoqquehi bacco tararipajade.

²Dsome ijipanijine inajoraraha tahide imasiri mamaride Satana-jine Simon Iscariote bedi Joda bodi najorajari, Jeso todsepe inahijijine. ³Jesopa Dio Pohuahujaji ccaronahicca nahato, Diohuaji toccamaccossani-hijinecca nahato, Pohua Imehicca deni tojehe cajihi naco nahato tajari. ⁴Najaro pocca deni tojehecca ima iattanijine ia mari tocanabaqqijaride. Jipade iquejenanaja Jeso totehemadsapa pocca etero huapiccapi ssiti inadsa tohuamori ssesera pohua dorodsa ssoque inade. ⁵Nadsapa tasao imehidsa passo sso idsadsa pohua huatimadedeni ia emori ssahua tabaqqijaride. Nadsapa pohua dorocca etero ssoque nacossajaro-dsa emori sse tabaqqijaride.

⁶Naraha Ssino-Pedro amori ssahua inahijineraha: – Ohua Medsede çohuamori ssahua tanijinequi? –nade. ⁷Naraha Jeso attia: –Aji jidapana temorideni ssahua onaridsajarocca imapi ssamo tinaraha nidsa dsotodena timittanitohui –nade. ⁸Naraha Pedro attipa: –¡Ohuapi poni! Ohuamori ssahua taji onejerani –nade. Naraha Jeso attipa: –Temori ssahua onejeradsapi occa tija-geranitohui –nade. ⁹Naraha Ssino-Pedropa: –¡Ohua Medsede ohuamoria ojari-gerana, odsepe ssahua, otati ssahua

taji! –nade. ¹⁰Naraha Jesopa pohuadsa huati tade: –Japi idsatipi huire inajaro, ia ssahua imanipomajerani. Naraha emorina ssahua ssahua ihmmani nanijine –nade. –Tiadenipi tibodideni huireqquri naraha huapima jerani –nade Jeso. ¹¹Jesopa pohua ccaccorade nahato tapoja najari. Najaria aja: –Huapima huireqquri tiquinejerani –najaripajade.

¹²Emori ssahua tabaquia jicadsapa pocca etero huedsapomadsa huahuanaridsa tohuittarinide. Nadsapa iadsa huati tade: –¿Aji temorideni ssahua onaridsajarocca imapi nahatoqquri tiquinaqui?

¹³Tiadenipi ohuadsa huahua titiquina nanipi: “Ia Maride, ia Medsede” titiquina najaropi pajissa.

¹⁴Nema onajaroa ohuapi tiadeni Medsede, tiadeni Maride ojaraha pina ticcadeni medsessa onadsa temorideni ssahua onaridsajaro. Najaropi tiadeni naquí temorideni ahuaji ssahua ahuaji ssahua tataridsamana nana. ¹⁵Ajjaro mari-najapi tiadeni mari ocanabaqqujaro. Pina aji ojinessa tinanamani-jine, onajaro. ¹⁶Jehe, pajissara tiadenidsa huati onajaro: Madija pocca medsedenipa pohuadeni medsededsa deni toquejena-jarajari. Pohuadenipa ajamani toquejenajari. Madija pocca dodosse tabaqqu naco pohuadeni dossededsa deni toquejena-jarajari. Pohuadenipa ajamani toquejenajari. ¹⁷Nadsapi ajjaro ima timittamananissa tadsa nema tinanamadsapi tetidsemananitohui, onajaro.

¹⁸–Ajjaro imapi tiadeni huapimadsa huati onejerani. Ohuapi nahato onani. Aja

ocattejidsa-baqquijaripa occa toquejenahitohui. Naraha pina Dio Atti dsodo napojarossa nehe tojanitohui: “Ohuadsama jipa jipa najarina ohuadsa ima inananitohui” napojaro Dio Atti dsodo nanipi. ¹⁹Najaro ima ohuadsa toja-jeraccadsama tiadenidsa huati onapojaro. Nidsa najaro ima tojani qqí tiquina-dsapi ohuadsa pajissa tiquinanitohui. Ohuapi ohua –nade Jeso. (Pohua atti nama nadsapa: Ohuapi Dio, najari.) ²⁰–Pajissara tiadenidsa huati onajaro: Madija occa dossenijidsa jahiridsajaridenidsa: “Jai tijedsimaji” quinadsapa pina ohuadsa: “Tiquedsimaji” quinarissa najari. Madija ohuadsa jehe quinadsapa ohua cadossejaridsa naco jehe quinajari –nade Jeso.

**Jesopa pohua Joda
eccorahijinecca ima ahuato
inanapojaro**

*Mateo 26.21-25; Maraco 14.18-21;
Roca 22.21-23*

²¹Jeso ima huati taha jicadsapa bodi qqedsajari. Ima ahuato inananijine huati tajari: –Pajissara tiadenidsa huati onana: Aji tiadeni ojariapa ohua ccaccorahitohui –nade.

²²Nadsapi pohua huatimadedeni iara qqí icanirere canade. –¿Nejecjaridsa Jeso atti nama najari? –inade. ²³Nadsapa pohua huatimade ojaría Jeso pohuadsa huati huana tajaria pohua inoridsa jipajaride. ²⁴Nadsapa Ssino-Pedro aja Jeso inoridsa huittarijaridsa pohua dsepedsa: –¿Nejecjaridsa atti nama najari? huati ticanajo –nade. ²⁵Nadsapa aja Jeso inoridsa huittarijaripa Jesodsá huajira tadsa

pohuadsa huati tade: –¿Nejecojari?
 –nade Jesodsa. ²⁶Naraha Jesoa:
 –Aja pan arobe bani ppejenedsa
 ohuedsippa pohuadsa da onana.
 “Najaripajaha” tiquinanijine –nade.
 Nadsapa pan arobe edsippa, Simon
 Iscariote bedi Jodadsa da inade.
²⁷Nadsapa Joda pan arobe idija,
 pohua bodidsa Satana jaro nade.
 Nadsapa Jeso Jodadsa huati tade:
 –Aji “ima onanana” tajaropi ama-
 dsati tinanaji –nade.

²⁸Naraha huapima jipade jassi
 inarijaropi aja Jeso Jodadsa huati
 tajari imittaraha ibodi ssamoqquiri
 inade. –¿Nejecotohui nama najari
 Jesopa? –inade. ²⁹Jodapa icca
 dsiniro cacahuadeja najari. Naraha
 itesse mota attidenipa: –Jehe,
 ejetejinecca mittade Jeso dosse
 inajari itide. Cappiramanajari-
 denidsa da tanijine toccajari itide
 –quinade.

³⁰Nadsapa Joda pan jipaha jica-
 dsapa dsomeraha toccade.

Jesocca dosseniji dsati

³¹Joda toccahi nattipa Jeso huati
 tade: –Ohuapi *Madija Bedi ojararoa
 jidapanana occa deni tojehe qqui
 tiquinanitohui. Diocca deni tojehe
 naqui ohuadsana ahuato tanitohui.
³²Diocca deni tojehe ohuadsa ahuato
 tadsapi manaco Dio occa deni tojehe
 ahuato inananitohui. Najaropi bacco
 tabote nani. ³³Occa ejedenideni,
 jidapapi tiadenidsa omadinijine
 huada huapi tejerani. Ohua nohue
 ojiradsapi tiadenipi otohui qqui
 taridsamananitohui. Najaropi maitta
 tahide jodiodenicca taminedenidsa
 huati onajarossa najaro tiadenidsa
 huati onajaro. Ohua occanihuajipi
 jai tijanijine ssamoqquiri tiquinani.

³⁴Nadsama ajijaropi occa dosseniji
 dsati: Tiadenipi tetideni cahanerara
 canana. Pina aji ohua tiadeni-
 dsa ohuati huana tajarossa najaro
 tiadeni naqui ohuadsa pajissa quina-
 jaridenidsa tetideni huanaqquiri
 nana, onajaro. ³⁵Pajissa tetideni
 cahanerara canadsapi ticcadeni ima
 aji occa madija tiquejenani madija
 huapimadsa ahuato tanijine –nade
 Jeso.

Pedro pohua namaidshicca ima Jeso ahuato inanapojaro

*Mateo 26.3-35; Maraco 14.27-31;
 Roca 22.31-38*

³⁶Naraha Ssino-Pedropa Jesodsa
 huati tade: –Ia Medsede ¿nejeco-
 huaji ticcanijine? –nade. Naraha Jeso
 Pedrodsa huati tade: –Aji ohua occani-
 huajipi jidapapi ohuadsa tiqqejerani-
 tohui. Naraha dsotodena omadini-
 huaji ticcanitohui –nade. ³⁷Naraha
 Pedropa Jesodsa huati tapomade: –Ia
 Medsede ¿nejecotohui jidapapi tiadsa
 oqqejeranijine? Naraha tissiajanijinepi
 ohuana onajorani, ohua ohuaccora-
 nijine –nade. ³⁸Naraha Jeso Pedro-
 dsa huati tade: –¿Pajissa ossiajanijine
 tia teccorapadseje? Naraha ohuapi
 pajissara tiadsa huati onajaro: Nidsa
 dsotodepi tacara huahua najaracca-
 dsa tia tinamaidsanitohui. Ohuadsa:
 “Onocco jidsa tani” tanitohui, “onocco
 jidsa tani” tapomanitohui, “onocco
 jidsa tani” tapomanitohui –nade Jeso
 Pedrodsa.

Jesopa: –Jahui ojani. Ojinena Abidsa bacco bacco toquinahijine –najari

14 ¹Nahi dsotodepa Jeso iadsa
 denima huati huati tade:
 –Tibodidenidsa ticappinamana

tejeraji. Diodsara pajissa tiquina-
nissa taji. Ohuadsa naqui pajissa
tiquinanissa taji. ²Occa Abicca
odsahuaji timadimananjinepi
mamadi caji tani. Timadimana-
nijine mamadi nohueradsapi
nassa tiadenidsa huati onaponeje
onade. Nadsama ohuapi ticcadeni
mamadi onanajoranjine Abihuaji
occaninitohui. ³Abihuaji occanidsa
ticcadeni mamadi onanajordsapi
titohuideni occaronapomanitohui.
Nadsapi ohua ohomadi nanidsa
tiadeni naqui timadimananjine
tiadeni ohuaccani-baquininitohui.
⁴Tiadenipi aji occanihuaji ojahine
nahatoqquiri tiquinani –nade Jeso.

⁵Naraha Tomas attia: –Ia Maride
¿nejecohuaji ticcanijine? Najaro
imapi ssamoqquiri inani. ¿Nejecoma
nadsa najaro tijahine nahato-
qquiri inanijine? –nade. ⁶Naraha
Jeso huati tade: –Ohuapi jahui
ojani. Ojinena madija Abidsa bacco
toquinahijine. Ohuapi pajissehe
jinede ojan. Ohuapi camittehe
jinede ojan. Nassa ohua nohue
ojiradsapi madijapa Abidsa bacco
toquina-jaranaja. ⁷Ohuadsa tinocco-
deni tojidseradsapi occa Abidsa
naqui tinoccodeni tojidseranitohui.
Aji jidapana ohua qqui tiquinajaropi
Abidsa tinoccodeni tojidserajona-
jaro –nade.

⁸Naraha Feripe attipa:
–Ia Maride, jari, icca Abi ia
qqui tinanabaquiji. Najari qqui
inadsapi epejena, denima inejerani
–nade. ⁹Naraha Jeso Feripedsa
huati tade: –Feripe, ohua tiadeni-
dsa maitta omadijonerade naraha
¿ohuadsa tinocco tojidsera-jera-
ccaqui? Aja madija ohuadsa nocco
tojidserajaripa occa Abidsa naco

nocco tojidserajari, onajaropajia.
Naraha ¿nejecotohuira ohuadsa:
“Icca Abi ia qqui tinanabaquiji”
tajaro? ¹⁰Ohuapi Abidsa, Abipa
ohuadsa, najaropi Abi Dio Pohua
ojarihi. ¿Naraha najarodsapi
pajissa tejerajari? Aji ohuatti huati
huati ohonanajaropi ojine jerani.
Occa Abina ohuadsa madijari.
Pohuana ohua totocanahato najari.
¹¹Nadsama ohuattipi: “Ohuapi Abi-
dsa, Abipa ohuadsa” onajarodsapi
pajissa tiquinajari. Naraha najarodsapi
pajissa tiquinanijine ssamo tadsapi
aji occa nahatohue qqui tajona-
manapojardsa: “Pajissa Jesopa Dio
Bedia” tiquinajari –nade Jeso.

–Nohue ojiradsa naqui
tiadenidsa ima bicani da da
onanitohui –najari Jeso

¹² –Ohuapi pajissara tiadenidsa
huati onana: Ohuadsa: “Pajissa ia
tonassijabaquihijine” tiquina-
dsapi pina aji ojinessa tinanamana-
nitohui. Occa Abi madihihuaji
occanini onattipi pina ojinessa
tinamananaraha denima bica tani-
cca tinamanananitohui. ¹³Diodsa
huati tiquinadsa ohua onima huati
huati titiquina nadsapi da da onani-
tohui. Nani Abi Diocca deni tojehe
tiadenidsa ahuaato onananijine.
¹⁴Jehe, ohuadsa huati huati tiquina-
dsapi ticcadeni huatinajassa onana-
nitohui –nade.

¹⁵ –Jehe, ohuadsa tetideni
huanacquiri nadsapi occa dosse-
nijissa tinamanana. ¹⁶Nadsama
ohuapi Abidsa huati onanitohui.
Nahi tiadeni Acco Camade ohuaha
dosse inaronahijine. Najaripa Pohua
Corime Pajissehe Maride tiadeni-
dsa madhipaja nahijine. ¹⁷Diodsa

jehe quina-jarajari ajijaro dsamacca tohuini quinajaridenidsapa Pohua Corime Pajissehe Maride pohuadenidsa toja-jarahitohui. Pohuadenipa Dio Corime qqui toquina-jarahi. Pohuadsa ssamoqquri nahi. Naraha tiadenidsapa jidsera tahi. Najaripa tiadenidsa madihi. Tiadenidsa madi-dsanapohuitohui.

¹⁸ – Ohuapi tiadeni ohuaquibobaquinitohui. Naraha tiadenidsa omadipomanijine occanipomanitohui. ¹⁹ Naraha nidsa denimapi ajijaro dsamacca madijapa ohua qqui tomanimana-jarahitohui. Naraha tiadenipi ohua qqui timanimanaitohui. Odsosqqueraha onahatonidsapi omadinitohui. Nema onadsapi tiadeni naqui tinahatonimanadsa timadimanapomanitohui. ²⁰ Jehe, occanipomadsapi tibodideni huatoma-manaitohui: Ohuapi occa Abidsa. Tiadenipi ohuadsa. Ohua naqui tiadenidsa, onajaro. ²¹ Occa marinaja tiadenidsa tojadsa nema tinanamanadsapi ticcadeni ima ahuato tanijine: Pajissa ohuadsa tetideni huanacquiri nani. Ohuadsa tetideni huanacquiri nadsapi occa Abi naco tiadenidsa huati huana tahitohui. Ohua naqui tiadenidsa ohuati huana tanitohui. Tiadenidsa ahuato onaitohui –nade Jeso.

²² Nadsapa *Joda (ajajaripa Joda Iscariote jarahi) najari huati tajari: –Ia Maride ¿nejecotohui iadsara ahuato tinanijine naraha ajijaro dsamacca madijadsapi ahuato tinejeranijine? –nade. ²³ Naraha Jeso huati tade: –Madija ohuadsa huatideni huanacquiri nadsapa ohuatti ecahuamanaitohui. Nadsapa Abi naco pohuadenidsa huati huana tahitohui. Occa

Abi tedseje pohuadenidsa imadinitohui. ²⁴ Madija ohuadsa huatideni huaneraquiri nadsapa ohuattiecahuamana-jeranitohui. Aji ima timittamanajaropi ohuatti jerani, Abi Dio ohua Cadossede Atti.

²⁵ –Aji tiadenidsa omadidsama huati huati onajaropaji. ²⁶ Naraha nidsa nohue ojiradsapi Abi Dio tiadeni Acco Camade dosse inaronahitohui. Najaripa *Dio Corime pina ojinessa inananitohui. Denima tiadeni mari tocanabaquihitohui. Aji huati huati onajarocca naqui pohuajine tibodideni huatomanissatanitohui –nade.

–**Occanibote nani,
dacoco tijiraji –najari**

²⁷ –Nadsama ohuapi occanibote nani. Tibodideni bicaquiri nanijine tiadenidsa occa jonehe da onaridsani, pina ajijaro dsamacca madija pohuadeni tohui quinahiccas nejerajaro. Nadsama occa daniji ticajimanadsapi tibodideni huatoto canejeraji. Occaninitohui onajaro noppineni naqui ticappinamanajeraji, onajaro. ²⁸ Ohuapi occanini, ocanajorani-pomanitohui onanipi timittamanade. Occa Abi Pohuadeni tojajari. Pajissa ohuadsa tetideni huanacquiri nadsapi occa Abihuaji occanina onadsa tetidsemananijine bica taraha nema tiquinejerajaro.

²⁹ –Jehe, aji itedsejemacca ima huati huati onajaro toja-jeracadsama tiadenidsa huati onajaro. Nidsa najaro ima tojadsapi ohuadsa: “Pajissa huati tajaria” tiquinaitohui. ³⁰ Naraha ohuapi occa ima denima tiadenidsa huati odsanapojerana. Ajijaro dsamacca dodossede

*Satanapa bacco nabote nahi. Naraha pocca dacorehepi ohuadsa deni toja-gerani. ³¹Nema nehe ohua ohuaccoradsapi odsoqquenitohui. Nema onajaropi madija huapima nahatoqquiri nahijine: Ohuapi occa Abidsa ohuati huana tajaro. Pohuapa ajijaro imatohui ohua cadossedsapa Pohua Attidsa ibora onajaro –nade Jeso.

Maride jicadsapa: –Jina, jaijana –nade iadsa.

**Jesocca marinaja uva
ede tahimari**

15 ¹Nadsapa Jeso iadsa denima huati huati tade: –Ohuapi uva ede pajissacca ojani. Occa Abipa huidsajacca uva cacahuade-ssa najari. ²Ohuapi huidsajacca uva edessa onadsapi madija ohuadsa toquejenajaridenipa pina uva inine-ssa quinajari. Nadsama uva inine cabononora tajaripa uva cacahuade ca icajidsa tahi. Naraha uva inine ohuaha cacabono najarina denima cabono-dsanapohuijine uva cacahuadeapa ininedsa moroninedsatira ba ba ihippi najari. Eppe bote naco pore pore ihinanajari. Nadsapa inine huire tadsapa bono caji-dsanapohuijine. ³Aji tiadeni naqui najarossa tiquinajaro. Ohuatti

tiadenidsa huati onajarojine huire-qquiri tiquinajaro. Nadsapi tibonomananijine tinajoramanajaro.

⁴Nadsama ohuadsa paji timadimantarini naridsaji. Ohuapi tiadenidsa paji omadirini nanitohui. Inine edeccana cacabono najari. Inine pohua mottapa cabononora tahi. Najarossa tiquinajaro. Tiadeni ohuadsa timadimananissa tejersapi ima bicani tinanamananijine tipajiramana-geranitohuiraha.

⁵ –Nadsama ohuapi uva ede ojani. Tiadenipi uva inine tiquejenani. Ohuadsa timadimananissa tadsapi tiadenidsa omadinitohui. Nadsama tiadenipi pina uva inine cacabonojide rajarissa tiquinajaro. Nassa tiadenidsa omadi-geradsapi ima bicani tinanamana-geranitohuiraha. ⁶Ohuadsa madimanahissa tajarajaripa huahuattajo toquejena-hitohui, pina uva inine ca toppidsa hua tajarissa quinahitohui. Uva inine dsequeri nadsa inaccamandsapa botta botta tajarissa quina-hitohui.

⁷ –Naraha ohua tinebomanajeradsa occa marinaja naqui tinebomanajeradsapi tohui tiquina-niccatohui ohuadsa huati huati titiquina nana. Nadsapa ticcadeni huatinaja tiadenidsa tojahitohui,



onajaro. ⁸ Jehe, Dio Attissa tinanaridsamanadsapi pina uva inine cacabonojide rajarissa tiquinanijine. Nema tinanamanani madija qqui toquinadsapa occa Abidsa: “Jehe, Diopa bica tahi” quinahijine. Jehe, nema tinanamanadsapi pajissa occa madija tiquejenani ahuato tanitohui –nade Jeso.

**Jeso pocca mamari
tabaqqidsa:
–Otessedeni –najari**

⁹ –Ohuapi tiadenidsa ohuati huana tehe nema onajonajaro. Pina Abi ohuadsa huati huana tajarissa onajaro. Occa tohuati huanehedsa tajimana tejeraji. ¹⁰ Occa dossenijidsa iboraqqiri tiquinadsapi occa tohuati huanehedsa timadimanani paji nanijine. Aji pina ohua occa Abicca dossenijidsa ibora onadsa pocca tohuati huanehema omadididsajarossa tiquinaji, onajaro.

¹¹ –Aji huati onajaropi occa huatidsehe tiadenidsa onananijine. Occa huatidsehe tibodidenidsa pajiranissa tanijine, onajaro. ¹² Ajjaropi tiadenidsa occa dosseniji: Pina tetideni cahanerara canaji. Pina aji ohua tiadenidsa ohuati huana tajarossa tiquinaji. ¹³ Tohuati huanehe deni tojajaropi ajima najarona paji: Madija pohua tesse tocassiejerahijinepa pohuana pohua ccaccorajarina paja. ¹⁴ Nadsama occa dossenijissa tinanamanadsapi otesse tiquejenani. ¹⁵ Jidapapi tiadenidsa: “Occa medsedeni” onejerani. Madija medse inanabaqquijaripa pocca medsedeni pocca ima ssamoqqiri najari. Naraha ohuapi occa Abi ohuadsa huati huati tajari nemanehe

tiadenidsa ohuacomerajaro. Najaroa aji tiadenidsa: “Otessedeni” onajaropaji.

¹⁶ –Tiadenipi otohui tiquinapojeraraha ohuana tiadeni ocatejidsa-baqquijaro. Nani tiadenina ohuatti mari ticanabaqquiridsahijine. Nahi madija ohuadsa toquejenahijine. Najaro imapi pina uva inine huajjiradsa cacabono najarissa tiquinanitohui. Najari bonopa madija Diodsa toquejena-dsanapojari. Nema nadsapi ohua onima huati huati titiquina nadsapi Abipa ticcadeni huatinaja tiadenidsa da da nanaja nahitohui. ¹⁷ Nadsama ajjaropi tiadenidsa occa dosseniji: Tetideni cahanerara canaji, onajaro –nade Jeso.

**Ajjaro namicca imadsa
madimanajaridenipa
Jesodsa huattajojo,
pohua huatimadenidsa
huattajojo tajari**

¹⁸ –Ajjaro namicca imadsa madimanajaridenipa tiadenidsa jiperaqqiri nadsapa tibodideni huatomanaji: Pohuadenipa ohuadsa jiperaqqiri napojari. ¹⁹ Tiadenipi ajjaro namicca imadsa timadimanadsapi pohuadenipa tiadenidsa jipaqqiri nahitohuiraha nema tiquinejerajaro. Ajjaro namicca imadsa timadimanaporaha ohuapi tiadeni ocatejidsabaqquijaro, ajjaro namicca imatohui timadimana-jeranijine. Jidapapi ajjaro namicca imatohui timadimana-jerarojine tiadenidsa jiperaqqiri najari. ²⁰ Aji tiadenidsa huati onapjarocca tetideni huatoma-manana. Medsedenipa pohuadeni medsededsa deni toquejena-jarahi. Ohuadsa

jara jara quinadsapa tiadenidsa naco jara jara quiquinanahitohui. Occa marinajadsa jehe quinadsapa ticcadeni marinajadsa naco jehe quinahitohui. ²¹ Jehe occa tiquejenajarojine jidacca huati onapojaro huapima tiadenidsa nama quinahitohui. Occa Abi ohua Cadossededa noccodeni jidsaquiri nadsa nama quinajari.

²² –Nadsama pohuadenidsa huatide occajona-jeradsapi pohuadenipa ima cappiramanahitohuiraha. Pohuadenidsa huati onaraha pajissa quina-jaradsapa ima cajimanajari. Pohuadenijinena poccadeni ima inatabaccoramanajaro.

²³ Ohuadsa huattajojo tadsapa occa Abidsa naco huattajojo tajari.

²⁴ Nadsama ojinepi pina madija ohuahajinessa nejerani. Occa nahatohue denima bica tanicca qqui toquina-jaradsapa ima cappiramanahitohuiraha. Naraha occa nahatohue bica tani qqui qqui toquinaraha pajissa quina-jaradsapa ima cajimanajari. Nama quinadsapa ohuadsa huattajojo, Abidsa naco huattajojo tajari. ²⁵ Nadsama poccadeni imapi pina Dio Atti dsodo napojarossa najaro inanamana-jaro: “Tabaccorehe onana-jeraraha pohuama ohuadsa huattajojo tajari” najaro Dio Atti dsodo nanidsa.

²⁶ –Tiadeni Acco Camade tiadenidsa dosse onaronahitohui. Pohuapa Abihuajicca, pohua oni ohuahapa Dio Corime Pajissehe Maride. Nidsa najari ccaronadsana otahimari tiadenidsa ahuatoma ahuatoma nanitohui. ²⁷ Tiadeni naqui otahimari tecomera-ridsamananitohui. Aji, ohuadsa tiquejenapodsapa ohua qqui tajonamanajarojine jidapana

otahimari nahatoquiri tiquinanidsa tani –nade Jeso atti.

**Jeso huatimadedeni
tedsejemadenicca ima
huati tapojari**

16 ¹ –Aji tiadenidsa huati onajaropi ticcadeni jehe-niji tinebomana-jeranjine. ² Jodio poccadeni Dio Atti mamarihuaji jai tijedsimapoma-jeranjine tiadenidsa: “Ahuajipi jai tijedsima tejeraji” quiquinanahitohui. Nidsa ima onihi naqui tiadenidsa ssonarinitohui. Madija pohuadeni tocamaidسانيmanadsa bodidenipa: “Ohuapi Diocca ima ohuacahuanissa tana” quinadsapa tiadeni inanadsoqqe-manaje camanitohui. ³ Ajijaro imapi nema inamananitohui. Pohuadenipa Abidsa noccodeni jidsaquiri, ohuadsa naco noccodeni jidsaquiri najari. ⁴ Nidsa aji huati huati onajaro tiadenidsa bacco tadsapi tibodideni huatoma-mananitohui: “Ja, Jeso atti nama napode” tiquinanitohui. Najaro imapi tiadenidsa huati onapo-jerade, tiadenidsa omadiridsaccani onadsa –nade Jeso.

**Dio Corimepa
ia Acco Camade**

⁵ –Naraha jidapanana ohua Cadossedehuaji occanini onadsapi tiadenipi ohuadsa huati tineje cama-jerani. “¿Nejecohuaji ticcarnijine?” tiquinejerani. ⁶ Naraha occanini onani timittamanadsapi oji tiquinabote nadsa tibodideni huanacossajaro. ⁷ Pajissara tiadenidsa huati onana: Ohua occanidsapi tiadenidsa ima bicani tojanijine. Occani-jeradsapi tiadeni Acco

Camade nohuerahitohui. Naraha occanidsana tiadeni Acco Camade dosse onaronahitohui –nade.

⁸ –Nidsa tiadeni Acco Camade bacco naronadsapa ajijaro dsamacca madijadeni imasiri cajimanahi pohuadenidsa ahuato inananitohui. Ima onihi naqui: Imasiri cappiramanajaridenina Diodsa toquejenahijine pajiramanahi ahuato inananitohui. Ima onihi naqui: Imasiri cajimanajaridenipa Dio ettajobaquidsa nanajidso toquejenahijine ahuato inananitohui. ⁹Tiadeni Acco Camadepa madija ohuadsa pajissa quina-jaradsapa imasiri cajimanahi pohuadenidsa ahuato inananitohui. ¹⁰Ima onihipi: Imasiri cappiramanadsa Diodsa toquejenahijine pajiramanajaripa aji ohuapi imasiri jirehe omadidsa occa madie pajiranissa tajarojine. Nema onadsapi Diohuaji occaninitohui. Nadsapi ohua qqui tiquinapoma-jeranitohui. ¹¹Ima onihi: Dio huahuattajo inanabaquidsa nanajidso toquejenahijine ahuato inanajaropi tahide ajijaro dsamacca dodossedede Satana Diojine huahuattajo tojapojaripaja –nade Jeso.

¹² –Denima tiadenidsa ima huati onanijine ima ocajiraha najaro huapima timittamananijine tipajiramana-jeraccani. ¹³Naraha nidsa tiadeni Acco Camade Dio Corime Pajissehe Maride bacco naronadsana ima huapima pajissaccara tiadenidsa inanadsanaponijine. Najaropi pohua mottacca ima jerani, Abi Dio huati tajari mittadsa tiadenidsa huati toquimahitohui. Itedsejemacca ima naqui tiadeni tonahattabaquihitohui. ¹⁴Pohuadsa occa ima ahuato onanadsa

tiadenidsa ahuato inananitohui. Nadsapa pohuajine ohuadsa: “Jehe, Jesopa nahato tahi, deni tojahi” tiquinanitohui. ¹⁵Occa Abicca huapimapi ohua naqui occa. Najarojine ohuattipi: Dio Corimeadsa ahuato onanadsapi tiadenidsa ahuato inananitohui, onajaro –nade Jeso.

Poccadeni ojiepi huatidsehe tojanitohui

¹⁶ –Nidsa dsotodepi ohua qqui timanimana-jeranitohui, naraha denimapi ohua qqui timanimanapomanitohui –nade Jeso.

¹⁷Nadsapi ia pohua huatimadedeni iara imahaha icanade: –¿Nejecotohui atti nama najari? –inade. –¿Nejecotohuira iadsa: “Nidsa dsotodepi ohua qqui timanimana-jeranitohui, naraha denimapi ohua qqui timanimana-pomanitohui” napa? ¿Nejecotohuira iadsa atti: “Ohuapi occa Abi madihihuaji occaninijine” nanaja najarinaja? ¹⁸¿Nejecotohuira pohua attipa: “Nidsa dsotodepi” nanaja najarinaja? Pohua huati huati tajaripassamoquiri inani –inade pohua huatimadedeni iapi.

¹⁹Naraha Jesopa pohua bodi nahato tapoja najari. Iapi pocca imatohui pohuadsa huati inanitohuiraha manacora iadsa huati tajaride: –Nadsa tiadenidsa huati onapopa: Nidsa dsotodepi ohua qqui timanimana-jeranitohui. Naraha denimapi ohua qqui timanimanapomanitohui, onajarojinea aji tiadeni motta imahaha ticanajaropaji. ²⁰Nadsapi pajissara tiadenidsa huati onana: Tiadenipi oji tiquinanitohui. Tibodideni naqui ocassera

tanitohui. Naraha madija ajijaro namicca imadsa madimanajarideni huapimapa huatidsemanahitohui. Tiadenipi tibodideni ocassera taraha ticcadeni ojiepi huatidsehe tojanitohui. ²¹ Ajijaro imapi pina amoneje idsoni comajarossa najaro. Ejedeni comene nacassera taraha tossonahi nattipa comene huatini ajima najaro. Nadsapi ponicca ejedeni tossonajarijine ponipi huatidsejaro. ²² Tiadeni naqui nema tiquinanitohui. Ocasserani temanaraha dsotodepi tiadeni qqui omanibaqqi-pomanitohui. Nadsapi tibodidenidsa huatidsehera tojanitohui. Najaro huatidsehepi madija ohuahajine tossamo-jeranitohui, onajaro.

²³ –Nidsa dsotodepi tohui tiquina-niccatohui ohuadsa huati tiquine-jeranitohui. Pajissara tiadenidsa huati onana: Tohui tiquinaniccatohui ohua onima Abidsana huati tiquinadsapi Abina tiadenidsa da da ihinananitohui. ²⁴ Tiadenipi ohua onima Abidsa huati huati titiquina nejeraccani. Nadsapi ohua onima Abidsa huati huati titiquina naji, ticajimananijine. Nani ticcadeni huatidsehe pajiranissa tanijine –nade Jeso.

**Jesopa ajijaro dsamacca
imadsa deni tojajari**

²⁵ –Occa marinaja ajijaro namidsa imadinicca ima tadsajani tiadenidsa mari mari ohonana-jaro. Naraha nidsa dsotodepi occa marinaja ajijaro namicca ima tadsajani tiadenidsa huati onapoma-jeranitohui. Abi tahimari ahuato tanijinena tiadenidsa huati onanitohui. ²⁶ Najaro huada bacco tadsapi

tiadenina ohua onidsa huati huati titiquina nani bica tani. Nadsama ohuapi ticcadeni huatinaja Abidsa huati oqquima-jerani. Puhuapa tettideni mittahi. ²⁷ Abipa tiadenidsa huati huana tahi. Ohuadsa tetideni huana tadsa: “Pajissa Diohuaji ccaronajari” tiquinadsapi Abipa tiadenidsa huati huana tahi. ²⁸ Ohuapi Abi madihihuaji omadiraha ajijaro namihuaji occaronajarode. Jidapapi ajijaro dsama onebods Abihuaji occamacossanitohui, onajaro –nade Jeso.

²⁹ Nadsapi ia pohua huatimadeni pohuadsa huati inade: –Jehe, jidapanana huati tinanissa tani. Ajijaro namicca ima jirehe huati tinadsapi imittani –inade. ³⁰ –Tiapi ima huapima nahatojide tijirani nahatoqquri inajaro. Jidapapi tiadsa imatohui huati inejersa naqui, ibodicca icca huatinaja nahato tinani, inajaro. Najarojinea pajissa Diohuaji ticcaronani nahatoqquri inajaro –inade Jesods.

³¹ Naraha Jeso iadsa huati tade: –¿Jidapanana pajissa tiquinanissa tajarocchi? ³² Jidapapi ohuadsa ima tojabote nani. Tiadenipi ticcadeni odsahuaji jai tijaniridsanitohui. Ohua tiaquibonimananitohui. Nadsapi ohua motta ojanitohui. Naraha ohuapi ohua motta jerani. Abipa ohuadsa madihi. ³³ Aji ima huapima tiadenidsa huati onajaropi tibodideni huatoto cana-jeranijine. Ohuadsa tiquejenadsapi jonehe, huatidsehe pajissacca ticajimananitohui. Ajijaro dsamacca timadimanaccadsapi ocasserani temanaraha dacoco tijiraji. “Epeje inana” tiquinejerana. Ajijaro namicca dodossedepa ajamani tojahi.

Ohuana pohuadsa deni ojani –nade Jeso.

Jeso pocca Abidsa huati tajari

17 ¹Najaro ima huati taha jicadsapa Jeso memehuaaji qqui tamacossadsa Diodsa huati tade: –Abi, jidapanana onajorehe jicani. Memehuaajicca deni tojehe ticca ejedenidsa da taji. Nahi ticca ejedenipa ticca nahatohue deni tojehecca ahuato inananijine huapimadsa. ²Aji ohua ticca ejedenipi madija huapimadsa tijine tamine ojajaro. Aja ohuadsa tinanabaqquijaridenipa pohuadenidsa camittehe jiquejeranicca da onaridsanijine. ³Najaro camittehe jiquejeranicca cajimanahijinepa Tiadsa noccodeni tojidserajari. Tiana Dio ojari tajaro. Tiana ia Cacahuade pajissacca. Aji ohua Jesocristo ohua dosse taronajaropi ohuadsa naco noccodeni jidseraqquri nahi. Madija Tiadsa, ohuadsa pajissa quinadsapa camittehe jiquejeranicca cajimanahitohui.

⁴ –Nadsama ticca deni tojehepi ahuato onanajaro ajijaro dsamadsa. Aji ohua ticadossejaro huapimapi onajicanissa tani. ⁵Abi, dsama nahato-jeraccadsama Tia tedseje deni tojehe icajijarode. Jidapapi najaro ohuadsa tinananiji, onajaro –nade Jeso.

**Jeso pohua
huatimadedenitohui
Diodsa huati tajari**

⁶ –Jehe, madijapa ajijaro namiccama imadsa madimanaraha tidinibaqquidsa ohuadsa tinanabaqquijari. Najarideni onahattabaqquidsapa ticca imadsa nahatoqquri

nahi. Najaridenipa ticcaraha ohuadsa tinanabaqquijari. Tettidsa iboraqquri nadsa ticca marinaja ecahuamananissa tani. ⁷Jidapapa nahatoqquri nahi aji huapima ocajijaro naqui ticca daniji. ⁸Aji ohuadsa Tetti da tajaropi pohuadenidsa da onaridsani. Najaropi pohuadenidsa tojani. Pohuadenipa Tiahuaaji occajonanicca ima tocahatterara canahi. Pohuadenipa ohuadsa: “Pajissa Dio dosse inaronajari” quinahi.

⁹ –Ohuapi najaridenitohui Tiadsa huati onajaro. Ajijaro namicca imasiridsa madimanajaridenitohui huati onejerajaro. Aja ohuadsa tinanabaqquijaridenitohuira Tiadsa huati huati onajaro. Pohuadenipa ticca. ¹⁰Aja occa huapimapa ticca. Ticca huapima naco occa, inajaro. Occa deni tojehepi pohuadenidsa ahuato tajaro.

¹¹ –Jidapapi ajijaro namidsa omadidsanapo-jerani. Tiahuaaji occaniraha aja pohuadenipa ajijaro namidsa madimanacchitohui. Jehe, Abi bicabote tijani. Aja ohuadsa tinanabaqquijaridenipa ticca dacorehedsa tecahuabaqquijo, huapima ojariqquimanahijine. Pina Tia ohua tedseje ijariqquijaro-sa quinahijine. ¹²Ajijaro namidsa pohuadenidsa omadiridsadsapi aji ticca dacorehe ohuadsa tinanajarodsa ohuacahuabaqquihissa tajari. Pohuadenipa ojaria amossinaja cama-jararaha ojariana paja amossi narihi nahitohui. Najaripa najidsohue jiquejeranihuaji tojahitohui, pina aji Tetti dsodo napojarossa nehe tojanitohui.

¹³ –Jidapapi Tiahuaaji occanina. Naraha ajijaro namidsa

omadiccadsama ajijaro ima Tiadsa huati huati onajaro, nahi pohuadenipa pina aji occa huatidsehe ocajijarossa najarodsa huatidsemaneri nahijine. ¹⁴Nadsama ticca marinajapi pohuadenidsa onanaridsaraha ajijaro namicca madijaha pohuadenidsa huattajojo tajari. Pohuadenipa ajijaro namicca imadsa toquejena-jarahi. Pina ohua ajijaro namicca ojajerajarossa quinajari. ¹⁵Naraha Tiadsa: “Pohuadeni tiaccamacossani-baqquijo” onejerani. Imasiri jinede Satanacca maidsehedsa tojaparimana-jarahijine onadsa “Tecahuabaqquijo” onajaro. ¹⁶Ohuapi ajijaro namicca ojajerani. Pohuadeni naco pina aja ohuassa quinajari. Ajijaro namicca quejena-jarahi. ¹⁷Ticca pajissehedsara tinanabaqquijo, onajaro, imasiri jirehe madimanahijine. Tetti pajissa ponira. ¹⁸Ajijaro namidsa oadinijinepi Tiana ohua ticadossejarode. Najarossa najaro ohuapi pohuadeni ocadossebaqquijari, ajijaro namicca madija motadeni mari icanabaqqui-ridsahijine, onadsa. ¹⁹Occa madie nemanehede Tiadsa accora onajaro. Aja occa mamari tabaqquideni naco pina ohuassa quinahijine poccadendi madie nemanehede Tiadsa accoraqquri nahijine dissera onajaro. Ticca pajissehedsara madimandansanopohuijine —nade Jeso.

**Pohuadsa pajissa
quinajaridenitohui
Diodsa huati tajari**

²⁰ —Ohuapi occa mamari tabaqqui bodideni acco ticamabaqquijo onadsa Tiadsa huati huati onaraha dsotodedeniccatohui naqui Tiadsa

huati huati onajaro. Nidsa occa mamari tabaqqui otahimari eccoraridsa-manadsapi madija ohuaha dsotodedenicca naco ohuadsa pajissa quinahitohui. ²¹Najarideni naco ojariqquimanahissa tahijine, Abi, pina ohua Tia tedseje ijariqquijarossa quinahijine Tiadsa huati onajaro. Pohuadeni naco iadsa ojariqquimanahissa tahijine, onajaro. Nahi ajijaro dsamacca madijapa ohuadsa: “Pajissa Dio dosse inaronajari” quinahijine. ²²Aji occa deni tojehe ohuadsa da tajaropi pohuadenidsa naqui da onaridsani. Nahi pohuadenipa ojariqquimanahissa tahijine, pina ia ijariqquijarossa quinahijine, onajaro. ²³Ohuapi pohuadenidsa, Tiapi ohuadsa inajaro. Nahi pohuadenipa ojariqquimanahissa tahijine. Nadsapa ajijaro dsamacca madija nahatoqquri nahijine ticca dosse-niji occajonajarode. Ajijaro ima naqui nahatoqquri nahijine: Tiapi pajissa quinajaridenidsa teti huana tajaro. Pina ohuadsa teti huana tajarossa najaro.

²⁴ —Nadsama Abi, ohuadsa tinanabaqquijaripa occaridsanihuaji ohuadsa jahiridsahijine, ticca daniji occa deni tojehe qqui toquinahijine onadsa. Najaro deni tojehepi dsama inahato-jeraccadsama Tiapi ohuadsa teti huana tadsa ohuadsa da tajarode. ²⁵Abi, ticca imapi pajiranissa tani. Ajijaro namicca madija Tiadsa noccodeni jidsaqquri nahi. Naraha ohuapi Tiadsa onocco jidsara tani. Aja ohuadsa toquejenajaridenipa nahatoqquri nahi: Ohuadsa: “Ajararipa Diocca dosse-niji” quiquinanajari. ²⁶Nadsapa ojine Tiadsa noccodeni jidseraqquri

nahi. Naraha denima noccodeni tojidsera-dsanapohuijinepa nema odsanaponitohui. Aji ohuadsa tohuati huanehe ticajijaropi pohuadeni naco cajimanahijine. Ohua naqui pohuadenidsa omadiridsanijine –nade Jeso atti pocca Abidsa huati huati tadsa.

Jeso dama quinahi

Mateo 26.47-56; Maraco 14.43-50;

Roca 22.47-53

18¹ Jeso Imehidsa huati taha jicadsapa Jeso pohua huatimade iapi pohua tedseje bijini oni Sedro jippehuaji jaijajarode. Aja Jeso itedseje toqquedsimahihuaajipi ppa nahi caji tade. ² Joda Iscariotepa Jeso ccaccorade, pohua naco nahihuaji nahato tajari. Nanihuajipi Jeso pohua huatimade iapi pohua tedseje maitta ihiqueriqqi rade. ³ Nahihuajina Jodapa romanodenicca soldado, dada toqqimahuajicca cacahuadedeni tedseje eccajonabaquijaride. Dada toqqimade taminedeni, marinaja onini pariseodsa jehe quinajarideni tedseje dosse inajonabaquimanajari. Bacco najonamanadsapa dsepedenima jahijonade. Jojororo, huahuacca, huahuajina, massito najonamanajaride. ⁴ Jesopa pohua todsepe tojahijine nahato taporaha pohuatohui jahijonajaridenihuaji toccadsa huati tade: –¿Nejecojaritohui jai tijajonajaro? –nade. ⁵ Naraha pohuadeni cacomeramanade: –Jeso Nasaretihuajiccatohui jaijajonajaro –quinade. Naraha Jeso pohua cacomerade: –Ohuapi aji –nade. Aja Jeso pohua ccaccorade Joda naco pohuadenidsama quejemade. ⁶ Jesopa

–Ohuapi aji –nadsa pohuadeni nattiuhaji ttiri tanimananaja edima bohua bohua bohua quinade namidsa.

⁷ Naraha Jeso pohuadenidsa huati tapomade: –¿Nejecojaritohui jai tijajonajaro? –napomade. Naraha pohuadenipa: –Jeso Nasaretihuajiccatohui –quinade. ⁸ Naraha Jeso huati tapomade: –Nadsa huati onapopa: “Ohuapi aji” ohonanapa. Otohui tiquinadsapi aja ohuatimadedenipa pohuadeni jai tojaniridsana, onajaro –nade.

⁹ Najaropi pina Jeso Imehidsa huati tapodsa: –Abi, aja ohuadsa tinanabaquijaripa amossinaja cama-jarana –napojarissa inananijine. ¹⁰ Naraha Ssino-Pedropa pohua nacoricca massito dsoppa taneje jeo, taminecca medse oni Maoco huaribo nahatonihuajicca ca taneje tajo canade. Maocopa dada toqqimadedenicca tamine deni toजारicca medse. ¹¹ Naraha Jesopa Pedrodsa huati tade: –Ticca massito tinacridsa dso ticadsaniji. Ajijaro imapi occa Abicca dosse-niji ocasserani ohuanijine. Pohua Attidsa ibo onejerani –nade Jeso. ¹² Nadsapa soldado huapima poccadeni tamine tedseje, jiodideni mota aja Diodsa dada toqqimahuajicca cacahuadedeni quinadsa Jeso dama quinadsapa biji jore quinade.

Tamine tahidecca Anasahuaji Jeso iaccamanajari

Mateo 26.57-58; Maraco 14.53-54;

Roca 22.54

¹³ Nadsapa dada toqqimadedenicca taminebote onipa Anasacca odsahuaji iaccamanade. Pohuapa Caipacca coco. Caipapa najari

huajanodsa dada toqquimadedeniccata mine deni tojajari. ¹⁴Caipana jodiodenidsa huati tapojaride: –Madija ojaría huapima manaconedeni dsoqquehina bica tahi, ia icca dsamacca huapima naco inajicaridsamana-jeranijine –napojaride Caipa atti.

**Pedro pohua
namaidsapohuicca ima**

*Mateo 26.58, 69-70; Maraco 14.54,
66-68; Roca 22.55-57*

¹⁵Ohuapi Huano, Ssino-Pedro tedseje Jeso natti icadamissade. Dada toqquimadedeniccata mine deni tojajaricca boronidsa Jeso iaquedsimamanajaride. Aja taminepa ohuadsa nocco jidsera tajarijine pocca boronidsa oqquedsimajarode. ¹⁶Naraha Pedropa taminecca boroni huapihuaji siba hua nahuajaninicca noccobijidsa huade. Naraha oqquenadsa najaro odsacca medse noccobiji cacahuade tojajarodsa huati onadsapi Pedro naco qquedsimade. ¹⁷Naraha Pedro qquedsimadsa najaro odsacca medse dsohuato noccobiji cacahuade huajaropi pohuadsa huati tade: –¿Tiapi aja dama quinajari huatimade tija-jeraqui? –nade. Naraha Pedro pohua namaidsadsa: –Ohuapi najaricca ojajerani –nade.

¹⁸Nadsapa dsome tossirini nadsa tamine deni tojajaricca dodosse tabaqqui, Diodsa dada toqquimahuajicca cacahuadedeni tedseje dsippo inadsamanadsa jia quinaride. Pedro naco nahi huapima domo huahihuaji pohuadenidsama jia najaride.

Dada toqquimadedeniccata mine deni tojapojari tahidecca Jeso pohua cacomerahijine huati icanajari

*Mateo 26.59-66; Maraco 14.55-64;
Roca 22.66-71*

¹⁹Naraha dada toqquimadedeniccata minebote Anasana Jesodsa pocca mamari tabaqquicca imatohui huati, pocca marinajatohui huati tajari: –¿Ticca marinaja naqui nejecomanajaro imara mari mari titicana-baqqui najaritta? –nade tamine atti.

²⁰Naraha Jeso huati tade: –Nadsa madija huapima mittamanahijine mari mari ohocanabaqquiridsa nade. Jodiodeni quequeriqquimana nahihuaji aji icca Dio Atti mamarihuaji, aji Diodsa dada toqquimahuaji mari mari ohocanabaqquiridsa nade. Ohuapi cacomehedsa huati huati ohonana-jerade. ²¹Nadsapi ¿nejeco imatohui ohuadsa huati tinajaro? Aja occa marinaja mitta-manajaridenidsara huati tinaji: “¿Jesocca marinajapi nejecomanajarotte?” taji pohuadenidsa. Pohuadenipa occa marinaja nahatoqqui nahi –nade Jeso.

²²Jeso atti nama nadsapa pohua inorihuaji huajari Diodsa dada toqquimahuajicca cacahuadepa Jeso pano pohua dsepedsa idanide. Nanaja Jesodsa pohua attipa: –Iapi dada toqquimadedeniccata mine deni tojajaridsapi nema inejerajaro –nade. ²³Naraha Jeso attia: –Jehe, jidacca huati huati onajaro ohuatti tabaccora tadsapi huapima mitta-manahijine huati tinaji. Naraha jidacca huati onajaro tabaccora tejeradsapi ¿nejecotohui opano tidanijaroneje? –nade Jeso atti.

²⁴Nadsapa tamine Anasa attipa:
 –Manaco Caipahuaji toccana
 –nadsapa Jeso biji jore nahi nama
 naha Caipahuaji iaccamanade.
 Caipapa dada toqqumadedenicca
 tamine deni tojajari.

**Pedro pohua
 namaisapomajaricca ima**

*Mateo 26.71-75; Maraco 14.69-72;
 Roca 22.58-62*

²⁵Jesopa odsa bodihuaji nanajidso
 tojaraha Pedropa boronidsa dsippo
 jiade tojajari. Nadsapa nahi dsippo
 jiade toquejenarideni Pedrodsa
 huati toquinajaride: –¿Tiapi ajajari
 maqquideje huatimade tija-jeraqui?
 –quinajaride. Naraha Pedro pohua
 namaisapomade: –Ohuapi najari-
 cca ojajerani –nade.

²⁶Naraha dsotode naco dada
 toqqumadedenicca tamine deni
 tojajaricca dodossepa Pedrodsa
 huati tade. Najaripa Pedro pohuajine
 huaribo ca tocajidsajaricca madija.
 Najari attia: –¿Tiapi aja ahua ppa
 nahihuaji dama quinajari tedseje
 tia qqui onajerattaqui? –nade
 Pedrodsa. ²⁷Naraha Pedro pohua
 namaisapomadsapa: –Ohua jerade
 –nanaja tacara huahua najaride.

**Tamine Piratodsa Jeso
 iaccamanajari**

*Mateo 27.1-2, 11-14; Maraco 15.1-5;
 Roca 23.1-5*

²⁸Ssiajadsa dsidsidsamassapi Jeso
 Caipacca odsadsa iaquenamana-
 dsapa manaco tamine Piratocca
 odsahuaji iaccamanajaride. Tamine
 Piratopa romanodeni. Pahuapa jodio-
 denicca dsama cacahuade tojajari.
 Naraha ejete *Pascoa baccho teje
 najaro Piratocca odsa bodihuaji jai

tojedsima-jarade. Ia jodiodeni icca
 marinajapi: –Pascoacca jipaquuedsa
 ijipa-jeraccadsa jodio quejena-jara-
 jaridenicca odsahuaji iqquedsima-
 nijine *oppina tani –ihinanajaro.
 Najaro noppineni cappinamanadsapa
 Piratocca odsa bodihuaji jai toje-
 dsima-jarajaride. ²⁹Najaria aja Pirato
 qqenadsa pohuadenidsa huati tajari-
 paja: –Ajajari maqquidejepa ¿nejeco
 ima cajidsa teccajonamanajari?

–nade. ³⁰Manaco Piratodsa huati
 toquinade: –Pohuajine tabaccora
 tejeradsapi tiadsa eccajona-jararaha
 –quinade. ³¹Naraha Pirato attipa:
 –Ticcadeni ima cacatemahuajira
 tiaccamanajo. Pocca ima tabaccora
 tadsapi tiadenina tinajidsomanajo.
 Pina ticcadeni marinajassa tinana-
 manaji –nade. Naraha jodiodenipa
 –Jeso dsoqquehitohui –quinadsa
 Piratodsa huati toquinapomade: –Ia
 jodiodenipi madija inanadsoqque-
 hijinepi icca cacahuaniji jerani.
 Romanodeni tiadenina ticcadeni
 cacahuanijina paji. Madijacca ima
 tabaccora tadsapi tiadenina titinana-
 dsoqquemana najari –quinade.

³²Nadsama najaropi pina Jeso pohua
 dsoqquehijinecca ima pohua huati
 huati tapojarissa nehe tojajarode.

³³Nadsapa Pirato pocca odsa-
 huaji toqquedsimani-pomade.
 Toqquedsimanidsapa Jeso huahua
 idsimadsa huati tade: –¿Tiapi jodio-
 denicca tamine tijaqui? –nade.

³⁴Naraha Jeso Piratodsa huati
 tade: –¿Najaropi tibodi huato-
 dsa ohuadsa tetti nema tajaroqui?
 ¿Madija huati toquinahi timitta-
 dsarane? –nade. ³⁵Naraha Pirato
 huati tade: –¿Ohuapi jodio ojaqui?
 ¡Jodio ojajerani! ¿Nejecoma nadsa
 ticca madijacca marinajadsa ima

tinanajaro nahato onanijine?
 Aja ticca dsamacca madija, dada
 toqqumade taminedeni tedseje
 ohuadsa tia eccajonamana-
 jaro. ¿Nejeco ima tinanadsatte?
 –nade Pirato. ³⁶Naraha Jeso pohua
 cacomerade: –Occa cacahuehepi
 ajijaro dsamacca jerani. Nassa jodio-
 deni ohua dama quina-geranijine
 occa mamari tabaqqi jodiodeni
 tedseje cahadirenaja. Naraha ajijaro
 dsamacca jerani –nade. ³⁷Naraha
 Pirato attia: –¿Tetti nema tadsapi
 tamine tijaqui? –nade. Naraha
 Jeso pohua cacomerade: –Pajissa
 ohuapi tamine, aji huati tinajaropaji.
 Nadsama ohuapi ajijaro dsamadsa
 ossonajaropi pajissara huati huati
 ohonabaqqi nahijine occajona-
 jarode. Huapima pajisseheda jipa-
 qquiri najaridenina ohuatti mitta-
 manajari –nade Jeso. ^{38a}Naraha
 manaco Pirato pohua cacomerade:
 –¿Nejecoma najarona pajissehe?
 –nade Jesodsa.

**Jeso tappa inahijineraha
 Barabana tohui quinajari**

*Mateo 27.15-21; Maraco 15.6-11;
 Roca 23.17-19*

^{38b}Najaro huati taha jicadsapa
 tamine Pirato qquenapomadsapa
 jodiodenidsa huati tapomade: –Jehe,
 ohuapi ajajari maqquidejecca ima
 omittadsapi tabaccora tanicca nohue-
 rani. ³⁹Naraha aji ticcadeni ejete
 Pascoa tojadsapi toponi cocorodsa
 coro todsimajarideni ojaría qquena-
 hijine tohui tiquinadsapi ohuadsa
 huati huati titiquina nade. ¿Nejeco-
 jarina tappa onadsa qquenahijine
 tohui tiquinajaro? Aja ¿“jodiodeni-
 cca tamine” quiquinanajaripa tappa
 onahijineco? –nade Pirato. ⁴⁰Naraha

jodiodenipa johuahua johuahua
 canapomade: –¡Najaripa pohua!
 ¡Tappa tinajarajo! ¡Paja coro todsima-
 pojari Barabana tijine qqenajo!
 –quinade Piratodsa. Naraha Baraba
 pohuapa toponi nanajidsoderaha.

**–Porimacossanidsa Jeso coba
 tidsanamanana –quinajari**

Mateo 27.22-23; Maraco 15.12-14;

Roca 23.20-22

19 ¹Nadsapa tamine Pirato sol-
 dado icadossebaqquidsa Jeso
 cossi quinade. ²Soldadodeni Jeso
 taticca cotihi atinema icohuamanaha
 jicadsapa tatidsa ettarimanade.
 Nadsapa etero macconi motaranicca
 pina tamineccassa najarodsa Jeso
 inehedsamanade. ³Nadsapa Jesodsa
 jai tojessidsa pohuadsa maidsamana-
 jari: –¡Jodiodenicca taminepa bica
 tahi, bica tahi! –quinade. Nadsapa
 pano idanimanade.

⁴Nadsapa Pirato qqenapoma-
 dsapa jodiodenidsa huati tade: –Jari,
 ohuattidsa Jeso eqquenamana-poma-
 hijine. Pohua qqui tiquinadsapa
 nahatoqqiri tiquinanijine: Ohuapi
 najari maqquidejecca ima omitta-
 dsapi pocca ima tabaccora tanicca
 nohuerani –nade. ⁵Nadsapa Jeso
 tatidsa cotihi atinema huittari,
 taminecca etero macco tajaro huedsa
 naha eqquenamanade. Nadsapa
 Pirato atti: –¡Jari, ajajari maqqi-
 deje qqui tiquinajo! –nade. ⁶Naraha
 dada toqqumade taminedeni, Dio-
 dsada toqquma odsa cacahuade-
 deni tedseje Jeso qqui toquinadsapa
 paja johua toquinarihi nade: –¡Ahua
 porimacossanidsa dsoqquena,
 dsoqquena! –quinade. Naraha
 Piratopa: –¡Tiadenina tiaccamana-
 dsapa ahua porimacossanidsa coba

tidsanamanana! Ohuadsapi pocca ima tabaccora tanicca nohuerani –nade. ⁷Naraha jodiodenipa pocca-deni ima huati toquinade: –lapi icca marinaja ecahuadsapi Jesopa inana-dsoquena, inajaro. Pohua attipa: “Ohuapi Dio Bedi ojani” nanaja naraha najaro ima iadsa bica tejerani inajaro –quinade.

**Jeso pohua cacomerahijine
tamine Pirato huati tapomajari**

⁸Tamine Piratopa jodiodeni attideni: –Jesopa Dio Bedi ojani nahi –quinahi mittadsapa denima cappinade. ⁹Nadsapa Jesodsa huati tahijine pocca odsahuaji toqquedsi-mani-pomade. Jesodsa pohua attipa: –Tiapi ¿nejecohuajicca tijani? –nade. Naraha Jesopa pohua cacoma nade. ¹⁰Naraha Pirato attia: –¿Ohuadsapi tia tecomajaroqui? –nade. –¿Ohuadsa ssamo tinajarorane? Ohuapi ajijaro dsamacca daco ojirajaropi ohuatti ocajini. Tiquenanijine huati onadsapi tiqqenanitohui. Tidssoquena onadsa naqui, tia coba idsanamananitohui –nade Pirato atti. ¹¹Naraha Jesopa pohua cacomerade: –Tiapi ohuadsa deni tija-jeraraha Dio tia cadossedsa deni tijadsa tetti ticajijaro –nade. –Tijine ohuadsa tabaccora taraha aja ohua ccaccajonadenicca imana denima tabaccora tajaro –nade. ¹²Nadsama Pirato Jeso atti nama nahi mittadsapa Jeso tappa inahijinecca imatohui huati tapomaraha jodiodenipa johua johua quinade: –¡Jeso tappa tinadsapa romanodenicca tamine deni tojahicca pohua tesse tija-jerani! Madija attipa: “Ohuana tamine ojani” nadsapa romanodenicca tamine deni tojahicca huadi tojajari –quinajari Piratodsa.

**Piratopa Jeso dsoquehijine
pohua eccorajari**

*Mateo 27.24-26; Maraco 15.15;
Roca 23.23-25*

¹³Tamine Pirato jodiodeni atti nama quinahi mittadsapa Jeso amossinihuaji iaqqenamana-pomahijine huati tajaride. Nadsapa Piratopa ima cacattemahuajicca huihuittaridsa huittarjaride. Pocca huihuittaripi pocca huahuari deni toja nahihuaji huittarjaride. Nanidsapi siba ppa naridsani, sseque tajaro. Jodiodeni atti ebreodsapi: Gabata, quiquinanjari. ¹⁴Najaro huadadsapa *jassinajacca huadatohui najoramanapojaride. Najaro jassinajacca huada sabadopi ejete Pascoacca jassinaja tojanijine. Nadsapa maji itetepi bacco tadsa Pirato jodiodenidsa huati tade: –¡Aja pajaha ticcadeni tamine! –nade. ¹⁵Naraha jodiodenipa johuahua johuahua canadsapa: –¡Dsoquena, dsoquena! ¡Ahua porimacossanidsa coba tidsanajo! –quinade. Naraha Pirato attipa: –¿Ohua ticcadeni tamine coba odsanahijineco? –nade. Naraha dada toqqumade taminedeni pohuadeni cacomeramanade: –¡Najaripa icca tamine tojana inejerani! ¡Romanodenicca tamine deni tojahiccarajarina inajaro! –quinade. ¹⁶Nadsapa Pirato pohuadenidsa Jeso da inade. Ahua porimacossanidsa coba idsanamanahijine soldadodeni iaccamanade.


**Jeso ahua porimacossanidsa
coba idsanamanajari**

*Mateo 27.32-44; Maraco 15.22-32;
Roca 23.26-43*

¹⁷Nadsapa Jeso iaccamanadsapa pohua coba dsanahijine *ahua

porimacossani dsojo inade. Ssono Totati Tonanissa nani quiquina-nahihuaji jai tojemorajari. Najaro ssono onini jodiideni atti ebreodsapi: –Cocotta –quiquinanajaride. ¹⁸Nahidsana Jeso ahua porimacossanidsa coba idsanamana-jaride. Jesopa nahi madija cobaba dsanahi nocconidsa toजारide. Pohua inoridsa ahuaui ahuaui quinade. ¹⁹Nadsapi ima dsodo nani tamine Pirato dosse inajonadsa Jeso tetepihuaji coba idsanamanajarode. Najaro dsodo nanipi: –Jesopa Nasareti-huajicca, Jodiidenicca Tamine –najarode. ²⁰Najaro dsodo nanipi jodiideni huapima hua quinade. Aja Jeso coba dsanahihuajipi odsa panani huajira tade. Najaro ima dsodo nanipi jodiideni pohuadeni atti *ebreodsa, dsama *Cresiacca madija attidenidsa, romanodeni attidenidsa najarode. ²¹Naraha dada toquimade tamedeni qqui toquinadsapa tamine Piratohuaji jai tojanidsa huati toquinade. Pohuadeni attipa: –Aji tijine dsodo nani “Jodiidenicca Taminepi” dsodo tejeraji. “Ajajari maquideje attipa: ‘Ohuapi jodiidenicca tamine ojani’ nanaja nade” najarora dsodo taji –quinade. ²²Naraha Piratopa: –Ojine dsodo najaropi, epeje –nade. ²³Nadsapa soldadodeni Jeso coba idsanamana-ha jicadsapa eteroripi soldado 4 quinajarideni inaccamanadsa pohuadenidsa pohuadenidsa naridsade. Pocca etero dequericca naqui idimanade. Naraha najaropi ssequirani nemaneha ba naronani. ²⁴Nadsapa soldadodeni pohuadenira imahaha canadsapa: –Jehe, ssoja inari-jerana. Itesse ojariadsa tojanijine siba bedenidsa coro coro

inadsa qqui inana. ¿Nejecojaridsana tojanijine? –quinade. Najaro imapi Dio Atti dsodo napojarossa inamanajarode. Imapi ajima najaro: –Occa eteropi icajaribaqqi-mananito-hui –naponi nade Dio Atti dsodo nanidsa. –Occa etero dequericca naqui ¿nejecojaridsa tojanijine? quinadsa siba bedenidsa coro coro quinahitohui –naponi nade Dio Atti dsodo nanidsa. Soldadodeni-pa pina najarossa inamanajarode. ²⁵Nadsama nahi Jeso coba dsanahidsapa Jeso pocca ami, poni imanicotani, poni tassani Cleopacca amoneje Maria, Maria Madarenahuajicca quinadsa domoni huajarode. ²⁶Nanidsa Jeso pocca ami huani qqui tajaride. Ohuapi



Jeso huatimade. Ohuadsana Jeso huati cahanari canajaride. Ohuapi Jesocca ami inorinidsa ohuani Jeso ohua qqui tadsapa imenidsa huati tajaride: –Ami, aja tinoricca huajaripa ticca ejedeni tojana –nade Jeso. ²⁷Pohua huatimade ohuadsa naco huati tajaride: –Aji occa amipiticca ami tojana –nade. Nama nadsapa pohua huatimade ohuapi Jesocca amipi occa odsahuajina onamadjarode.

Jeso huatiajari

*Mateo 27.45-56; Maraco 15.33-41;
Roca 23.44-49*

²⁸Pohuadenidsa huati taha jicadsapa Jeso pohuajine huapima inapajiranissa tani nahato tajari. Dio Atti dsodo napojarossa inanijine naqui huati tade: –Obacco dsarini –nade. ²⁹Naraha nahidsa uva ppejene ssicatahi jojodsa cajimanajaride. Uva ppejene ssicatahidsa huassa tajari edsippamana, ahua isopo ininidsa oro quina-dsapa Jeso ajaridsa da inamacossamanade. ³⁰Jesopa uva ppejene ssicatahi so inaha jicadsapa huati tade: –Huapima jicanissa tani –nade. Nadsapa tocattedsa nadsa huatiade.

Jeso ejinamanajari

³¹Jeso dsoqquehicca huadapi viernes. Najaro huadadsa jodiodenipa jassinajacca huadatohui najoramanapojari. Ahua porimacossanidsa assiredeni coba dsanamanahi paja naccahijine jiperaqu岸ari najari. Najaro jassinajacca huada sabadopí ejete Pascoacca jassinaja ima deni tojanicca. Nadsapa jodiodenipa

tamine Piratodsa huati toquinade: –Soldado ticadossebaquidisa coba dsanamanajarideni issodeni iaquidejidsa-ridsamanana. Cacotadsapa assiredeni naco dicca quinaridsana –quinade. Pirato jehe nadsapa soldado icadossebaquijari. ³²Nadsapa soldado coba dsanamanajarideni issodeni iaquidejidsaridsamanahijine jai tojade. Bacco toquinadsapa tahide Jeso inoricca cobaba dsanajari issodeni iaquidejidsa-ridsamanapode. ³³Naraha Jeso huatiahi qqui toquinadsapa pohua isso iaquidejidsa-manajarade.

³⁴Jesopa huatiaraha nama nahapari huahuajinadsa soldado dso tanaja, pora, emene qquena, passo qquena nade.

³⁵Ajijaro tiadenidsa huati onajaropi ohua onocodsas qqui onajaro. Tiadenidsa pajissara huati onajaro Jesodsa jehe tiquinanijine. Ohuapi nahato onajaro ohuattipi pajissa. ³⁶Jeso tone idejidsamanajararicca imapi Dio Atti dsodo napojarocca imadsa pajiranissa tani. Nani Dio Atti dsodo napojaropi: –Tone ojaría jai inamana-jarahitohui –naponi nade Dio Atti dsodo nanidsa. ³⁷Dio Atti dsodo napojaró onihí naqui: –Ejinamanahi naco cattomama canahitohui –naponi nade Dio Atti dsodo nanidsa, inade.

Jeso ppa idsamanajari

*Mateo 27.57-61; Maraco 15.42-47;
Roca 23.50-56*

³⁸Jeso ejinamanahi nattipa Dsodse odsa Arimateahuajicca madijapa Jeso assire ppa idsahijine tamine Piratodsa huati tajaride. Pohuapa Jesoccaraha jodiodeni

noppine pohua cacomadsa madijari. Nadsapa Pirato jehe nadsa Dsodse tocanajoranidsa Jeso assire dicca inadsapa dsojo inade. ³⁹Nicodemo naco nahidsa bacco nade. Najaripa tahide dsomeraha Jesodsas qquide toccadsa pohuadsa huati huati tajaride. Najarina 30 kilo majojo eccajonajarode. Najaros majojopi ahua amani tada tani onini mirra, ahua onihi majiconi onini aloe quejemajaro. Majoni bica tajaro. ⁴⁰Dsodsepa Nicodemo tedseje Jeso assire etero dsorani onini linodsas jore inaquimnade, ahua majiconi majoni bica tajaro icanejemamanadsa. Jodiodenipa poccadeni madija dsoqqedsapa poccadeni ppanijipi nama nama quiquinanajaride. ⁴¹Nadsama nahi Jeso coba dsanahi huajira tanidsapa ppa nahi caji tajaride. Nanidsapi tonocobiri dsati sibadsa hui todsimani anijarode. Najarodsapa madija dsoqqehei podsa-jaracchahi. ⁴²Jodiodenicca jassinajacca huada bacco tabote najarojine najaro tonocobiri huajira tanicadsa Jeso assire ibedsamanajaride.

Jeso nahatonijari

Mateo 28.1-8; Maraco 16.1-8;

Roca 24.1-8

20 ¹Nadsapi semana tojapomanicca huada tahidecca domingo dsidsidsamassa dsidsi tani paji naraha Maria Madarenahuajiccapi Jeso noccobirihuaji toccajarode. Bacco tadsapi qqui taneje tonoccobiripi tohuabeje najaro. Sibapi pajimaranihuajina huitteje najaro nade. ²Nadsapi Maria joppa nanijaro, Ssino-Pedro ohua inajarodenidsa bacco nanijarode. Ohuapi Jeso pohua

huatimade. Ohuadsana denima huati huana tajari. Maria attinipi ajima nanide: –¡Jeso noccobiri tohuabapa! Pohua assire idinemanadsa dsojo quinajarirana. ¿Nejecohuaji ibamananaja? Ssamomo inani –nanide Maria Madarenahuajicca attini.

–¿Pajissaqui? –quinadsa Pedro Huano tedseje qquide dsaja tajari

Roca 24.9-12

³Nadsapi Jeso huatimade ohua Pedro tedseje ima imittadsapi dsaja inade, Jeso noccobirihuaji. ⁴Ipamehe dsaja inaraha Jeso huatimade ohuana huassi oneje najaro. Jeso noccobirihuaji bacco onapojarode. Naraha Pedropa dsotode bacco namissade. ⁵Nadsama Jeso huatimade ohuapi odihuaji ocattedsimaneje Jeso jojore naqqi eteroa qqui onaraha oqquedsima-jerade. ⁶Naraha dsotodecca Ssino-Pedro bacco namissadsana Jeso noccobiri bodihuaji toqquedsimade. Pohua naco qqui taneje Jeso assire jojore naqqi eteroa podseje nanira qqui tajaride. ⁷Pohua tati teteppepi pajimaranidsana padsoninehe podseje nani naqui qqui tajaride. ⁸Dsotode ohua naqui oqquedsimadsana qqui onadsana: –Pajissa Jesopa nahatonijaria –onade. ⁹Iapi Dio Atti dsodo naponicca ihimittapo naraha iadsa pina ponimassa nade. Najaros ima dsodo napojaropi: –Dsoqqueraha, nahatonihitohui –napojarode. ¹⁰Nadsapi icca odsahuaji icadanide.

Jesopa Maria Madarenahuajicadsa ahuatomajari

Maraco 16.9-11

¹¹Maria Madarenahuajiccapi nani Jeso noccobiri huapihuaji



ibodsa oji oji najaro. Oji oji naneje odi bodihuaji tocattedesima najaro. ¹²Nanaja Diocca dodosse tabaqqi memehujicca eterorideni nopopo taha pamidsadsa canahi nade. Jeso assire podsahijinedsa pamidsajari nade. Ohuahapa tatijinehuaji huittari, ohuahapa amorijinehuaji huittari najari. ¹³Nadsapa Diocca dodosse tabaqqipa Mariadsa huati toquinajari: –¿Nejecotohui oji oji tajaro? –quinahi nade. Naraha Mariapi poni cacomerajaro: –Ohua Medsede dsojo ininemanajari. Amossi nadsa oji oji onajaro. ¿Nejecohuajina ibamanahi? –nani nade.

¹⁴Najaro huati tehe jica, poni idenihuaji qqui tanaja Jeso hua canahi nade. Mariapi Jeso qqui taraha nocconi jidsa tajaro.

¹⁵Naraha Jeso ponidsa huati tajari: –¿Nejecotohui oji oji tajaro? ¿Nejecotaritohui qqui qqui taridsajaro? –nahi nade. Naraha Maria poni bodinipi: –Ajararipa ahujicca ahua mohue ppa nahi cacahuade

itide –nani nade. Nadsapi pohuadsa huati tajaro: –¿Tiana aja dsoqqejari assire dsojo tininejari itide? Jehe tadsapi ¿nejecohuaji tinebonaja? Ohuana tohui occadsa dsojo onanihijine, onajaro –nani nade.

¹⁶Naraha manaco Jesopa ponidsa huati tajari: –¡Maria! –nahi nade. Naneje pohuahujaji qqui napomadsa jodiodeni atti ebreodsa huati tajaro: –¡Raboni! –nani nade. (Ettidsapi: ohua Maride, najaro.) ¹⁷Naraha Jeso attia ponidsa: –Ohua mari tidsana-jeraji. Occa Abihuaji occamacossani-geraccani. Pina ticcanidsa ohuatti ohuemecotedenidsa huati tinanina: “Jeso attipa: ‘Occa Abi Diohuaji occamacossanina. Najaripa ticcadeni Abi Dio’ napaja” tinanina –nahi nade Jeso.

¹⁸Nadsapi Maria Madarenahuajicca toccanidsa pohua huatimadedenidsa bacco tanidsapi huati tajaro: –¡Ia Medsede qqui onapa! –nanijaro. Pocca ima naqui huati nanide.

**Jeso pohua
huatimadedenidsaha
ahuatonipojari (Tomas
pohuadenidsa nohueraccadsa)
Mateo 28.16-20; Maraco 16.14-18;
Roca 24.36-49**

¹⁹Jeso nahatonihicca huada najaro dsomedsa pohua huatimadedeni iapi odsadsa iqueriqquijarode. Noccobiji ecossaridsade, jodiodenicca taminedeni noppine. Nadsapi jassi inahuajaniraha Jesopa nahi nocconidsa ahuatomadsa iadsa huati tade: –Nija, ticappinamanajeraji. Diocca biquehera tiadenidsa tojana –nade Jeso. ²⁰Najaro

huati taha jicadsapa pohua dsepe capamehecca perecojine nohue, pohua pparicca huahuajinajine nohue inade. Iapi ia Medsede pajissa qqui inadsapi etidsede.

²¹Nadsapa Jeso huati tapomade: –Ticappinamana-jeraji. Diocca biquehera tiadenidsa tojana. Pina occa Abi ohua dosse naronajari-ssa najaro ohua naqui tiadeni dosse onaridsabaquina –nade. ²²Nadsapa Jeso iahuaji jappo nadsa huati tade: –Dio Corimera ticajimanaji. ²³Dio Corime ticajimandasa madijacca imasiridsa: “Epeje, eti ajimani” tiquinadsapi jicani. Dio naco najaricca imasiridsa huati ajamahi. Naraha madijacca imasiridsa: “Epeje, eti ajimani” tiquina-jeradsapi pocca imasiri jiquejerani. Dio naco najaricca imasiridsa huati ajama-jarajari –nade.

²⁴Nadsapa Jeso huatimadedeni ia 12 inajaro ojariapa Tomas. Pohua tessedenipa pohuadsa: Baba quiquinanajari. Jeso ahuatonipodsapa Tomas iadsa nohueradsade. ²⁵Naraha dsotode Jeso huatimadedeni iapi Tomasdsa huati inade: –Maitta ia Medsede qqui inade –inaraha Tomas attipa: –Pohua dsepecca qqui onadsa odsepedsa perecojine odinidsa oro onadsana pajissa onanitohui. Pparicca toponi huahuajinajinedsa naqui odsepedsa oro onadsana pajissa onanitohui –nade Tomas.

**Jeso ahuatonipomajari
(Tomas qqui tadsa)**

²⁶Nadsapi huada 8 nani nattini Jeso huatimadedeni iqueri-qquipomade. Nadsapa Tomas iadsama quejemade. Noccobiji

ecossaridsaraha jassi inahuajanini nocconidsa Jeso ahuatopomade. Nadsapa iadsa huati tapomade: –Nija, tiadenidsa Diocca jonehera tojaji –napomade Jeso. ²⁷Nadsapa Tomasdsa huati tade: –Tomas, odsepecca opparicca qqui taji. Tidsepedsa perecojine, huahuajinajine odinidsa oro taji –nade. –“Pajissa onejerani” tejeraji. Pina jehe taji –nade Jeso. ²⁸Nadsapa Tomas atti: –¡A, ohua Medsede, occa Dio! –nade. ²⁹Naraha manaco Jeso Tomasdsa huati tade: –Ohua qqui tinadsa pajissa tajaro. Madija ohuahapa ohua qqui toquina-jararaha ohuadsa pajissa quinajari. Najaridenidsana Diopa ima bicani inandaridsanitohui –nade Jeso.

**Ajijaro papeo dsodo onajaropi
Jesodsa: –Pajissa, Dio
Bedi –tiquinanijine**

³⁰Nadsama ajijaropi Jeso huatimade ia imadiridsadsa Jeso canahato-huajapohui canaridsa-jaride –Pajissa, Dio Bedi –inanijinede. Aja canahatori canajaricca ima motapi huapi taraha ajijaro papeodsapi dsodo onejerani. ³¹Nadsama ajijaro ojine papeodsadsodo najarodsa naqui –Pajissa Jesopa *Cristo-Mesia, Dio Bedi –tiquinanijine, onajaro. Pajissa tiquinadsapi ticassiejeranijine, onajaro.

**Jeso pohua huatimadedenidsa
ahuatonipomajari**

21 ¹Dsotode naco dsama aro-beni Carireacca coridsa onini Tiberia inididsa Jesopa pohua huatimadedeni iadsa ahuatoni-pomajaride. ²Nanidsa



iqueriquijaropi Jeso pohua huatimade 7 inade. Ssino-Pedro, Tomas (pohua tessedeni pohuadsa: Baba quiquinanjari), Natanahe (dsama Carireacca odsa panani Canacca madija), Sebedeo bedi ohua, ocote Satiaco, denima Jeso pohua huatimade ohuaha pama nade. ³Ssino-Pedropa: –Aba corode occana –nade. Naraha: –Ia naqui tiadsa jajjana –inade. Nadsapi jajjedsippadsa canoa imenidsa jajjedsade. Nadsapi najaro dsomedsa aba coro inaraha nohuerade.

⁴Nadsapi ssiajajonadsa Jeso ssiquidsa huahi qqui inaraha ssamoquiri inade. ⁵Naraha Jeso iadsa huahua nade: –Dsabissondeni jaba ticajimanaqui? –nade. Naraha: –Aba nohuerahi –inade. ⁶Nadsapa Jeso attia: –Nani tibijideni nahatonihuaji tajapa coro ticadsippamanaji –nade. Nadsapi Jeso attissa inanamanadsa tajapa coro icadsippadsapi aba ijijari. Joca icanimoraraha ipajira-gerade.

⁷Nadsapi ohuapi Jeso huatimade ohuadsana huati huana tajari. Ohuattia Pedrodsa: –¡A, najaripa ia Medsede! –onade pohuadsa. Nadsapa Ssino-Pedropa pocca etero bodiccadsara aba coro coro naridsaraha ohuatti mittadsapa huassinaja pocca etero huedsa, joppa, cojo nadsa ssiquihuaji cona tajaride. ⁸Naraha Jeso huatimade mota iapi canoadsa jajjade. Tajapa abama ori icanade. (Ssiquipi huaji tejerade, pina 100 metrossa najarode.)

⁹Nadsapi ssiquidsa bacco inadsa jajjemoradsapi qqui inanaja pan aba naha dsippo jadari tanidsa huadsana nade. ¹⁰Nadsapa Jeso atti: –Aba jidapana coro nahi mota tequemoramanojo –nade. ¹¹Nadsapa Ssino-Pedro canoadsa toquedsanidsa tajapa equidi, ssiquihuaji joca icanimorade. Tajapadsapa aba birirajari 153 naha tocahuajaride. Aba huapi taraha tajapapi tajoppi nejerade. ¹²Nadsapa Jeso pohua huatimadedeni iadsa

huahua nade: –Nija, tijipamanaji
–nade. Naraha iapi: –¿Nejeco
madija tijani? –inanitohuiraha
huapima icappinaquide. Naraha
ibodidsapi: –Ia Medsede –inade.
¹³Nadsapa Jeso ccajonajari, pan idi
nadsa iadsa da inaridsade. Aba naco
da inaridsade.

¹⁴Jesopa huatiaraha nahatoni-
jari. Nahatonihí dsotodepa pohua
huatimadedeni iadsa ahuatonijari.
Dsotode ahuatonipomajari. Dsotode
ajijaro imadsa iadsa ahuatonipoma-
jari, nade.

**Jesopa Pedro pohua
cacomerahijine huati
huati tajari**

¹⁵Najaro ssiaja dsidsidsamassa
ijipehe jicadsa Jesopa Ssino-Pedro-
dsa huati tade: –Ssino, *Huano
bedi tijani ¿tiana tibodidsa denima
ohuadsa teti huana tajaroqui?
¿Titessedenipa ohuadsa poccadeni
tohuati huanehe ajimani tojajaro
tajaroqui? –nade. Nadsapa Pedro:
–Jehe ohua Medsede, tiana nahato
tinajaro tiadsa jipa onani –nade.
Nadsapa Jeso Pedrodsa: –Nadsama
occa edede bedi tititapabaqqi nana
–nade.

¹⁶Naraha denima huati tapomade:
–Ssino, Huano bedi tijani ¿tiapi
ohuadsa teti huana tajaroqui?
–napomade. Naraha Pedro huati
tapomade: –Jehe ohua Medsede,
tiana nahato tinajaro tiadsa jipa
onani –nade. Nadsapa Jeso attia:
–Nadsama occa edede tecahua-
baquina –nade.

¹⁷Naraha Jesopa pohuadsa huati
tapomade: –Ssino, Huano bedi
tijani ¿tiapi ohuadsa jipa tina-
jaroqui? –napomade. Jesopa

Pedrodsa huati tajari, huati nimani-
jari, huati nimanipomajari nadsapa
Pedro pohuadsa tocasserani nadsa
bodi qquedsajari. Nadsapa pohua
cacomerade: –Ohua Medsede tiana
nahato tinehe jicajaro. Nahato
tinajaro tiadsa jipa onani –nade.
Nadsapa Jeso huati tade: –Occa
edede tititapabaqqi nana, onajaro.
(Aja Jeso atti nama najaripa “Occa
madija mari mari titicanabaqqi
nana” najari.) ¹⁸Ohuapi pajissara
tiadsa huati onajaro: Dsabisso
tijadsapi ticca etero tedsadsa tia
tohuini tanihuaji titicca naraha
jadahi ticajadsapi tibiji da tadsa
madija ohuahana ticca etero
tia nehedsahitohui. Jipera tina-
raha nani motta tia iaccamana-
nitohui –nade Jeso. ¹⁹Jeso ima
huati tajaripa: –Pedro ajama
nadsa dsoqquehitohui –najari.
Pocca dsoqquehe nema nadsapi
huapimadsa Diocca deni tojehe
ahuato tanijine. Nadsapa Jeso attia:
–¿Ohuadsa dissera tinaji! –nade
Pedrodsa.

**Pedropa Jeso pohua
huatimade pocca cacatidsecca
imatohui huati tajari**

²⁰Nadsapa Pedro pohua nattihuaji
qqi naninaja, Jeso huatimade ohua
pohuadeni natti occamissajarode.
Ohuadsana Jeso huati huana tajari.
(Ohuana ejete Pascoacca dsome
tahideccadsa ijipaquidsa Jeso
inoridsa ohuittaridsa pohuadsa
huati onajarode: –¿Nejecojarina
tia ccacorahijine? –onade Jeso-
dsa.) ²¹Nadsapa Pedro ohua qqi
tadsapa Jesodsa huati tade: –Ohua
Medsede ¿ajajaripa nejecoma
napadsaja? –nade. ²²Naraha

Jesopa: – Jipa onadsapi Huanopa
 ajiaro dsamadsa madi-dsanapo-
 huipaja nadsa occanipomadsa
 naco madihipaja onanahitohuiraha
 najaropi ticca cacahuehe jerani.
 Ohuadsara dissera tinaji –nade
 Jeso Pedrodsa. ²³Nadsapi imecote
 huapimadsa ponima ima tojaridsa-
 jarode. – Jeso huatimade Huanopa
 huatia-jarahitohui –nanaridsa-
 mana najaride. Naraha Jeso attipa:
 –Dsoqqe-jarana –najararaha,
 Jeso pohua attipa: –Jehe, jipa
 onadsapi Huanopa occanipomadsa
 madihipaja nahitohuiraha najaropi
 ticca cacahuehe jerani onajaro-
 raha –najaride Jeso. Aja Jeso huati

huati tajaripa ohua Huano occa
 ima.

–**Jeso tahimari dsodo**
onajaropi pajissa
 –**najari Huano**

²⁴Ajiaro ima nemanehapi pajissa.
 Jeso huatimade ohua qqui onajaro
 dsodo onajaro. Nadsama najaropi
 nahatoqqiri inajaro. Najaropi
 pajissa. ²⁵Nadsama aji Jeso inahato-
 ridsajaro naqui huapi taraha najaro
 motapi dsodo onejerani. Obodidsa
 ohuattipi najaro tohuatti huapima
 dsodo onehe jicadsapi papeo dsama
 huapima ijiridsanitohuiraha.
 Epejeni.

Jesocca dodosse tabaqqi tahimarideni

Los Hechos de los Apóstoles

Ajjaro imapi Roca dsodo inajaro. Rocapa doctoro. Pohnuapa Jeso tahimari dsodo inapojaro. Najaro papeopi dsodode onidsa Roca, inajaro. Dsotodena Jesocca dodosse tabaqqi dsepedeni ijridsamanajari tahimari-deni dsodo inajaro. Jesodsa jehe quinajarideni tohuapi-dsanapojari tahimarideni naqui dsodo inajaro.

Rocapa Jesodsa ccaridsa-jararaha Jesocca dodosse Pablodsa ccaridsa-dsa Pablo tahimari, Jesocca dodosse tabaqqi ohuahadeni tahimarideni naqui dsodo inajaro. Pohnuadenidsa huati tadsa pohnuadeni tahimari mittajari. Ajjaro imapi Roca pohnu tesse Teofirodsa dsodo inajaro, Jesocca dodosse tabaqqi tahimarideni nahato tahijine.

Dio Corime madijadsa tojaridsahijine tahimari huati tapojari Jeso

1 ¹⁻³ ¿Nija Teofiro? Ohuapi Roca. Tiadsa Jesocristo tahimari dsodo onapojaro. Aja pohnu dsepe ihiji najaricca ima dsodo, aja madija mari mari ihicanabaqqi najaricca ima dsodo onajonajaroa pohnu toccamacossanihi bacco tajaropaji. Jesopa dsoqquedsa ppa idsamanaraha nahatonidsapa memehuaji toccamacossani-jaraccadsa pocca dodosse tabaqqidsa aja pohnu icattejjidsabaqqipojaridenidsa ahahuatoni najari. Pohnuadenidsa madiridsapomaccajari. Jesodsana Dio Corime madidsa pocca dossenijicca ima pohnuadenidsa huati huati tataja najari. Pocca bejo naqui pohnuadenidsa nohue inadsapi: –Jehe, Jesopa pajissa assire madinipomajari –quinajari. Nadsapa huada 40 nehe

pohnuadenidsa madiridsapomadsa naco Diocca cacahuehecca ima mari mari ihicanabaqqi najari.

⁴Nadsama pocca dodosse tabaqqidsa madiridsapomadsa naco ajjaro ima pohnuadenidsa huati tajari: –Jehe, aji odsa panani Jerosare tinebomana-jeraji. Occa Abi huati tapojaricca *ima bicani pajissa tiadenidsa tojanijine tohuini timadimanaccaji. Najaro imapi tiadenidsa huati onapode. ⁵Tahide-dsama tibodideni cacajiqquimera-dsapi: “Occa imasiri onebona” tiquinadsapi Huanopa passodsa tiadeni topa todsanabaqqiraha nidsa huada onihidsana Dio Pohnu Corime tiadenidsa da inaridsadsapa tibodideni denima cacajiqquimera-nitohui. Diopa tibodideni dsati inananitohui –najari Jeso.

⁶Huada onihidsa Jesodsa queriqquipomadsapa pocca dodosse tabaqqi pohnuadsa huati toquinajari: